

Directorate of Distance Education

**UNIVERSITY OF JAMMU
JAMMU**



**SELF LEARNING MATERIAL
FOR
M.A. DOGRI (SEMESTER - 1st)**

COURSE NO. : 102

UNIT : I - V

PRABANDH KAVYA

LESSON NO. : 1 - 12

Course Co-ordinator :

Dr. Jatinder Singh

T/Incharge M.A. Dogri

Mob.:- 9596888080

<http://www.distanceeducationju.in>

Printed and Published on behalf of Directorate of Distance Education
University of Jammu, Jammu by the Director, DDE, University of Jammu,
Jammu.

M.A. DOGRI

Course Contributors

Dr. Sandeep Dubey

Lesson No. 1 to 6

Asstt. Prof.

Dept. of Dogri

University of Jammu, Jammu

Dr. Padam Dev Singh

Lesson No. 7 to 12

Asstt. Prof.

Dept. of Dogri

University of Jammu, Jammu

Content Editing/Proof Reading

Dr. Manoj Heer

T/Incharge M.A. Dogri
DDE, University of Jammu

© Directorate of Distance Education, University of Jammu, Jammu, 2022

All rights reserved. No part of this work may be reproduced in any form, by mimeograph or any other means, without permission in writing from the DDE, University of Jammu.

The script writer shall be responsible for the lesson / script submitted to the DDE and any plagiarism shall be his / her entire responsibility.

Printed By : Sushil Printers / 2022 / 300

UNIVERSITY OF JAMMU
Syllabus for M.A. Dogri Semester – 1st
(Non-Choice Based Credit System)

**(Syllabus for the examinations to be held in December 2019,
December 2020 & December 2021)**

Course No.: DOG102

Title: Prabandh Kavya

Duration : 03 hours
Credits : 6

Maximum Marks : 100
a) Semester Examination : 80
b) Sessional Assessment : 20

सलेबस

1. महात्मा विदुर – ज्ञान सिंह पगोच, कमला प्रकाशन, भटयाड़ी, हीरा नगर
2. वीर गुलाब– दीनू भाई पन्त, डोगरी संस्था, जम्मू
3. महाकाव्य दियां परिभाशां, लक्षण, तत्व ते डोगरी च महाकाव्य दा उद्भव ते विकास

सलेबस दी बंड

यूनिट– 1

‘महात्मा विदुर’ महाकाव्य दे पैहले च’ऊं सर्गे दे आधार पर सप्रसंग व्याख्या ते पाठ्य समग्री बारै सुआल 8,8

यूनिट– 2

‘महात्मा विदुर’ महाकाव्य दे अगले पज्जे सर्गे दे आधार पर सप्रसंग व्याख्या, पाठ्य-समग्री ते रचनाकार बारै सुआल

- | | |
|--------------------------------|----|
| (a) Long Answer Type Question | 12 |
| (b) Short Answer Type Question | 04 |

यूनिट– 3

‘वीर गुलाब’खण्ड काव्य दी पाठ्य-समग्री ते रचनाकार बारै सुआल

- | | |
|--------------------------------|----|
| (a) Long Answer Type Question | 12 |
| (b) Short Answer Type Question | 04 |

UNIVERSITY OF JAMMU
Syllabus for M.A. Dogri Semester – 1st
(Non-Choice Based Credit System)

**(Syllabus for the examinations to be held in December 2019,
December 2020 & December 2021)**

Course No.: DOG102

Title: Prabandh Kavya

यूनिट- 4

महाकाव्य दियां परिभाशां, लक्षण ते तत्त्व बारै सुआल

(a)	Long Answer Type Question	12
(b)	Short Answer Type Question	04

यूनिट – 5

डोगरी महाकाव्य दे उद्भव ते विकास बारै सुआल

(a)	Long Answer Type Question	12
(b)	Short Answer Type Question	04

NOTE FOR PAPER SETTING:

There will one question from each unit (containing a&b part) with 100% internal choice and the candidates will be required to answer all the questions (total questions to be attempted will be five).

सहायक पुस्तकां:

1. डोगरी शोध – 1999 – पोस्ट ग्रेजुएट डोगरी डिपार्टमेंट, जम्मू यूनिवर्सिटी, जम्मू
2. दीनू भाई 'पन्त' दा कविता-साहित्य, प्रकाशक : डोगरी संस्था, जम्मू
3. डोगरी साहित्य दा इतिहास : शिवनाथ, साहित्य अकादेमी, नर्मी दिल्ली ।
4. डोगरी साहित्य दा इतिहास:जितेन्द्र उधमपुरी, जे. एण्ड के. स्टेट बोर्ड ऑफ स्कूल एजुकेशन
5. डोगरी भाशा ते अदब दी तिहासक परचोल: देशबन्धु डोगरा 'नूतन',अरुणिमा प्रकाशन, उधमपुर
6. भारतीय काव्य शास्त्र के सिद्धान्त : कृष्ण देव झारी, अशोक प्रकाशन, नई सड़क, दिल्ली ।
7. काव्य के रूप : बाबू गुलाब राय, आत्माराम एण्ड संस, कश्मीरी गेट, दिल्ली-06.

विशे-सूची

यूनिट सं.	लेख	सफा न.
यूनिट - 1	सप्रसंग व्याख्या (महात्मा विदुर) (पाठ सं. 1-2)	5
यूनिट - 2	कवि दा जीवन-परिचे ते डोगरी काव्य च उंदा योगदान (पाठ सं. 3)	22
	'महात्मा विदुर' महाकाव्य दा सार (पाठ सं. 4)	28
	'महात्मा विदुर' महाकाव्य दा मूल्यांकन (पाठ सं. 5)	40
	'महात्मा विदुर' महाकाव्य दा सार मूल्यांकन (पाठ सं. 6)	48
यूनिट - 3	दीनू भाई पंत दा जीवन-परिचे ते डोगरी साहित्य गी उंदा योगदान (पाठ सं. 7)	59
	डोगरी कविता साहित्य गी दीनू भाई पंत दा योगदान	68

(पाठ सं. 8)	
'वीर गुलाब' खण्ड काव्य दा मूल्यांकन (पाठ सं. 9)	75
यूनिट – 4 महाकाव्य दी परिभाषा, लक्षण, तत्व बारै सुआल (पाठ सं. 10–11)	88
यूनिट – 5 डोगरी च महाकाव्य दे उद्भव दे विकास (पाठ सं. 12)	101

M.A. DOGRI

Course No. 102

Unit - I

Semester - I

Lesson : 1

महात्मा विदुर

- 1.0 रूपरेखा
- 1.1 उद्देश्य
- 1.2 पाठ-परिचे
- 1.3 पाठ-प्रक्रिया
 - 1.3.1 पैहले पद्यांश दी सप्रसंग व्याख्या
 - 1.3.2 दुए पद्यांश दी सप्रसंग व्याख्या
 - 1.3.3 त्रिये पद्यांश दी सप्रसंग व्याख्या
 - 1.3.4 चौथे पद्यांश दी सप्रसंग व्याख्या
 - 1.3.5 पञ्चमे पद्यांश दी सप्रसंग व्याख्या
 - 1.3.6 अभ्यास
- 1.4 सारांश
- 1.5 विद्यार्थीये दे अभ्यास आस्तै किश सोआल
- 1.6 सहायक पुस्तकां

1.1 उद्देश्य

- (क) काव्य दे पद्यांश दी व्याख्या पढ़ियै विद्यार्थी पूरे संदर्भ दी पछान करी लैडन ।
- (ख) पद्यांश च दित्ते गेदे विचारें दी गूढ जानकारी हासल होई सकग ।
- (ग) सप्रसंग व्याख्या पढ़ियै विद्यार्थी विशे समग्री समझियै अपने विचारें गी व्याख्यात्मी रूप च प्रकटने दी समर्थ हासल करी सकडन ।

1.2 पाठ-परिचे

इस पाठ च 'महात्मा विदुर' महाकाव्य दे पैहले पंजें सर्गे चा किश पद्यांशें दी व्याख्या कीती गेदी ऐ ।

1.3 पाठ-प्रक्रिया

- (क) पद्यांश दे संदर्भ च काव्य दे लेखक दा नां दित्ता गेदा ऐ ।
- (ख) पद्यांश दा चेचा संदर्भ प्रसंग दे अन्तर्गत दित्ता गेदा ऐ तां जे विद्यार्थी गी विशे वस्तु दा पता चली सकै ।
- (ग) पद्यांश च व्यक्त विचारें दी व्याख्या इस ढंगा कन्नै कीती गेदी ऐ जे विद्यार्थी उसी समझियै आपूं व्याख्या करने दी समर्थ हासल करी सकन ।

1.3.1 पैहले पद्यांश दी सप्रसंग व्याख्या

हां रानी गी पुत्रर थहोना ।
पर जरमे दा अन्ना होना ॥
एह माऊ दे दो पुआड़े ।
उन सनमुख निहें नैन गुहाड़े ॥
अन्नै-मुन्नै काज केह करना ?
कुल-राखी जां राज केह करना ?
तां तुस होर कुसै गी भेजो ।
करै रौनक ते लो इस थेह जो ॥

संदर्भ :-

एह काव्य-अंश साढी पाट्य क्रम च लग्गे दे महाकाव्य 'महात्मा विदुर' दे पैहले सर्ग थमां लैता गेदा ऐ । इसदे रचनाकार 'ज्ञान सिंह पगोच' होर न ।

प्रसंग :-

इस पद्यांश च रिशी वेदव्यास मां सत्यावती गी रानी अम्बिका गी प्राप्त होने आहले अन्ने पुत्र बरै सनांदे न ।

व्याख्या :-

भीषम दे साथें रिशी वेदव्यास जिसलै मां सत्यावती दी परेशानी हल करने आस्तै मैहलें पुजदे न तां रानी सत्यावती उ'नेंगी सारी गल्ल सनाइयै अपनी नूह अम्बिका गी पुत्र प्राप्ती लेई उ'ंदे कमेरे च भेजदी ऐ । पर रानी अम्बिका वेदव्यास दे रूप गी दिक्खी डरै कन्नै अपनियां अक्खी बंद करी लैदी ऐ । तां सत्यावती दे पुच्छने पर रिशी गलांदे न जे अम्बिका दे घर पुत्र ते जरूर होग पर ओह जन्म थमां गै अन्ना होना ऐ । इस पिच्छें रानी दा अपना गै दोश ऐ की जे उस मिगी दिक्खदे गै अपनियां अक्खी मिट्टी लेइयां हियां । तां सत्यावती रिशी वेदव्यास गी गलांदी ऐ जे एह अन्ना राज-काज कि'यां सांभग अपने कुलै गी एह कियां तारग । अपने वंश दी रक्षा कियां करग । मां दी बधदी परेशानी दिक्खियै रिशी गलांदे न जे तुस कुसै होर गी मेरे कोल भेजो जिसदा पुत्र तुंदे वंश गी चानन करी सके ।

1.3.2 दुए पद्यांश दी सप्रसंग व्याख्या

औंगली दा फड़ी, एह टुंडाली भारी बड़ी,
गुड्डी साकनी दी चढी, अऊं रेही धिक्के खाने गी !
उऐ राज-रानी, निक्के-बड्डे दी जबानी,
मेरी बीती कथ-कहानी, बस सुनने-सुनाने गी !
शातियै च सल्ल, जिज्जां खुब्बी गेदी भल्ल,
पीड़ मारै जिंदु जल्ल, पलै-पलै तड़फाने गी !
अगें पिच्छें दुक्ख, हून मारी गेदी भुक्ख,
सब सुखना-न-सुख, सुक्की सीर सिमकाने गी !

संदर्भ :-

एह काव्य-अंश साढ़ी पाठ्य क्रम च लग्गे दे महाकाव्य 'महात्मा विदुर' दे दुए सर्ग थमां लैता गेदा ऐ । इसदे रचनाकार 'ज्ञान सिंह पगोच' होर न ।

प्रसंग :-

इक अन्ने ज्ञ्याने गी जन्म देने पर रानी अम्बिका दे मनै पर जो गुजरदी ऐ उसदा वर्णन कवि नै इ'नें सत्तरें च कीते दा ऐ ।

व्याख्या :-

हस्तानापुर दिथें रानियें ते दासी दे गर्भ थमां पैदा होऐ दे धृतराष्ट्र, पांडू ते विदुर करी, हस्तानापुर च चबक्खा खुशी दा वातावरण हा । पर रानी अम्बिका अपने अन्ने पुत्ररै गी दिक्खियै मनोमन पछतांदी ऐ । ओह सोचदी ऐ जे हून सारी उमर दुखें-कलेशें च गै लडनी ऐ, इस अन्ने गी उमर भर आँगल लाइयै चलाना पौग । ते सारे लोक उसी रमजां कराडन ते उसदी साकन रानी अम्बालिका दा उस शा बद्ध इज्जत-मान करडन । दिनै-रातीं उसी एह सोच सतांदी ते तड़फांदी रौहदी ऐ । अपने अगगें-पिच्छें उसी छड़े दुख गै दुख नजरी आँदे न । ते सुख सुखना मात्र सेही होंदे न । कवि ने प्रस्तुत काव्य-अंश च इक अन्ने ज्ञ्याने गी जन्म देने करी रानी अम्बिका दे मनै च पैदा होने आहले ही हीन भावें गी बांदे करने दी कौशिश कीती दी ऐ ।

1.3.3 त्रिये पद्यांश दी सप्रसंग व्याख्या

ज्ञान जलै दी मच्छी ऐ,
बड़े क्रठने ने हत्थ औना ऐं ।
इक लत्ता स्हारै बगले दा,
चित्त-ध्यान जआनै पौना ऐ ॥

संदर्भ :-

एह काव्य-अंश साढ़ी पाठ्य क्रम च लग्गे दे महाकाव्य 'महात्मा विदुर' दे त्रिये सर्ग थमां लैता गेदा ऐ । इसदे रचनाकार 'ज्ञान सिंह पगोच' होर न ।

प्रसंग :-

इस काव्य-अंश च गुरुकुल च गुरु द्वारा अपने चेलें गी दित्ते गेदे उपदेश दा वर्णन कीता गेदा ऐ ।

व्याख्या :-

जिसलै त्रैवै भ्रा शिक्षा ग्रहण करने आस्तै गुरुकुल च जंदे न तां गुरुकुल दे नियमें मताबक उंदी शिक्षा शुरु होई जंदी ऐ । गुरु रोज अपने आसन पर बेहियै अपने चले गी उपदेश दिंदे न । ओह अपने हर अमीर-गरीब शिश्यें गी इक बराबर समझदैं होई एह समझांदे न जे ज्ञान अर्जित करना उन्ना गै कठन ऐ जिन्ना पानी चा हत्थें मच्छी पकड़ना अर्थात् जिन्ने चिर मनै पर काबू नेई होऐ ज्ञान रूपी मच्छी हत्थ नेई ओंदी । इसकरी मने दी एकाग्रतागै ज्ञान गी पाने दा इक मात्र रस्ता ऐ । फरैत जां भटकदा मन ज्ञान गी प्राप्त नेई करी सकदा । इस आस्तै गूढ तपस्या ते ध्यान दी जरूरत होंदी ऐ । जि'यां इक बगला इक लते पर खड़ोइयै एकाग्रता कन्नै अपने शिकार गी पकड़ने च सफल होंदा ऐ ठीक उरसै चाल्ली माहनू बी इक ध्यान होइयै गै कुसै चीज गी सिक्खी सकदा ऐ ।

1.3.4 चौथे पद्यांश दी सप्रसंग व्याख्या

दऊं धड़ें बिच लोक बंडोये, शोर शरावा करदे ।

भीम सेन पर जान वारदे, दुर्योधन पर मरदे ॥

द्रोण ने शारा कीता, आखै दोऐ जने तुस जीते ।

अश्वतथामा गब्भै आई जोद्धे बक्ख-बक्ख कीते ॥

संदर्भ :-

एह काव्य-अंश साढ़ी पाठ्य क्रम च लग्गे दे महाकाव्य 'महात्मा विदुर' दे चौथे सर्ग थमां लैता गेदा ऐ । इसदे रचनाकार 'ज्ञान सिंह पगोच' होर न ।

प्रसंग :-

इस पद्यांश च कवि नै आचार्य द्रोण आसेआ गुरुकुल च शिक्षा ग्रहण करनै परैत भीम ते दुर्योधन दी परिक्षा गी भरे सभा मंडप च वर्णनत कीता दा ऐ ।

व्याख्या :-

गुरु द्रोण दे आखने पर राजा जिसलै जागतें दे शिक्षा-गुणें गी दिक्खने आस्तै इक सभा मंडप दा निर्माण करांदा ऐ ते इस उत्सव लेई पूरे नगरै च ढंढोरा फेरियै सभने गी औने दा सादा दित्ता जंदा ऐ । दुऐ दन भीषम, विदुर, धृतराष्ट्र, गंधारी, कुन्ती, देवकी आदि सब अपने-अपने थाहर आई बाँहदे न । गुरु द्रोण मंगलाचरण कराइयै अपने चेलें गी अपने-अपने जोहर दसने दा इशारा करदे न । भीमसेन ते दुर्योधन खाड़ै उत्तरियै अपने गुरजे कन्नै आपू बिच्चें इन्ना लड़दे न जे सारे लोक काहले पेई जंदे न । सभा मंडप च आई दी जनता बी द'ऊं धड़ें च बंडोई जंदी । अद्धे भीम दा मनोबल बधांदे न ते अद्धे दुर्योधन दा । पूरे सभामंडप दौनी दा युद्ध दिक्खियै जित्थें घाबरी जंदा उत्थें गै गुरु द्रोण थमां ग्रहण कीती दे उं'दी शिक्षा गी सराहदा बी ऐ । आखर गुरु अपने पुत्तर अश्वत्थामा गी शारा करदे न ते ओह दौने दे बिच जाइयै उ'नेंगी बक्खरा-बक्खरा करदा ऐ । ते गलांदा ऐ जे तुस दवै योद्धे ओह ते इस परिक्षा युद्ध च तुंदी दौने दी जित्त होई ऐ ।

1.3.5 पजमां पद्यांश दी सप्रसंग व्याख्या

अऊं सेवक हा, खरा सेवक अऊं
इक पिच्छें चलन की नौकर द'ऊं ?
तन नरोआ, शैल न कर पैर बी,
अपनै कशा रक्खना भी गैर की ?

संदर्भ :-

एह काव्य-अंश साढी पाठ्य क्रम च लग्गे दे महाकाव्य 'महात्मा विदुर' दे पजमें सर्ग थमां लैता गेदा ऐ । इसदे रचनाकार 'ज्ञान सिंह पगोच' होर न ।

प्रसंग :-

इस काव्य-अंश च कवि नै गुरुकुल थमां शिक्षा ग्रहण करियै मैहलें परतोई आए दे विदुर दा अपने सेवकें प्रति दया भाव प्रगट कीते दा ऐ ।

व्याख्या :-

धृत, पांडू ते विदुर गुरुकुल थमां शिक्षा ग्रहण करियै जिसलै अपने मैहलें परतोई औंदे न

तां राज मैहलें च विदुर गी अपनी सेवा च हर पल मौजूद हत्थ बद्धे दासैं गी दिक्खियै चंगा नेई लगदा । ओह् मणे मन सोचदे न जद में अपने कम्म आपूं करी सकनां ऐं, मेरे हत्थ पैर सलामत न तां पही भला इ'नें हत्थ बद्धे दासैं दी केह् लोड़ । ते जेह्ड़ा आदमी अपने कम्म आपूं करी सकदा होऐ तां ओह् दुएं पर की निर्भर रवै । ओह् गलादे न जे मैं पैहलें बी सेवक हा ते हून बी इक सेवक साहीं जीवन गजारड । इस करी इक सेवक गी अपनी चाकरी आस्तै दुएं सेवकें दी भला केह् लोड़ ।

1.3.6 अभ्यास :-

ख'ल्ल दित्ते दे पद्यांशें दा संदर्भ ते प्रसंग दस्सियै व्याख्या करो :-

- (क) राज-मैहल सब सुन्ने पेदे ।
दफतैनी न्हरे बस रोह दे ॥
उच्चे भवन-भला कित्त कारी ।
जिसदे जीव सल्लहे महामारी ॥
घर केह् ओह् जित जगे निं दीये ।
केह् बाग बिना कोल पपीहे ॥
चितरधन ते वचित्तर भाई ।
औतर गे, नां बेल बधाई ॥
मां चौंता बिच मक्कै करदी ।
पल-पल खिन सुक्कै करदी ॥
- (ख) पौनपट्ट चुक्की, निक्की गल्लुएं च मुक्की,
किश है शरम तुकी मेरी जिंद दिहां रोलदा ।
पानी अरुं नुआगी, शैल करियै नुल्हागी,
चिट्टे टल्लू बी लुआगी, निंहा अप्पूं जिंद गोलदा ।
बड़ा शैल सोहना, मेरा बच्चू मन मोहना,

तेरे बिनां मेरा होना, कोई जिञ्जां पानी छोलदा ।
तूं ऐं मेरे कोल, समां लंघै दा ऐ डोल,
तेरे मुहां बोल-बोल, मिगी मोतियें ने तोलदा ।

(ग) एह गल्ल इजां ऐ कोई जिजां,
भड पी-पी ऐ उपदेश करै ।
नेई करो नशा, एह ऐब बुरा,
एह खरे भले दी अकल चरै ॥
जां इजां ऐ, कोई जिजां,
गंद-गारै कन्नें भरोए दा ।
सबने गी आखै न्हौन खरा,
एह लक्खन-नरे-नरोए दा ॥

(घ) बचन दित्ता याद, गद्दी सौंपनी,
मात गंगा धार उप्पर त्रौंकन ।
ब्याह पैहलें करन तां गल्ल बनकदी,
घड़ी मुड़ियै सोच मत्थै ठनकदी ॥
बिच्चो-बिच तपाश, त्रै नग तुप्पने,
होन बी गुणवान बक्खबक्ख चुक्कने ।
करन घर वस्तार जेहड़े सांभियै,
सुन्न बड्डै सार, सेवा आंभियै ॥

(ङ) अत्त भली, एह सोच सनुहाकी, तूं आखी मैं मन्नी ।
मिगी मान तूं अज तक मेरी कित्ती कदें निं भन्नी ॥

इञ्जां बी दिन ढालै पेदा, झिलमिल पंज सत घड़ियां ।
समैं सारथी रथ जुगड़े दा हत्थ बिच बागां फड़ियै ॥
पर संसारी पिरत पुरानी बड्डा गै घर सांभै ।
होर कुसै दा हक्क निं बनदा जिन्नां मरजी आंभै ॥

1.4 सारांश :

इस पाठ च विद्यार्थिदें आस्तै 'महात्मा विदुर' महाकाव्य दे सर्गे बिच्चां किश गद्यांश दी सप्रसंग व्याख्या दित्ती गेदी ऐ। कन्नै गै विद्यार्थियें गौ संदर्भ, प्रसंग ते व्याख्या बारै जानकारी हासल होई सकगा बक्खरे बक्खरे सर्गे थमां लैते गेदे एह सर्ग केहड़े केहड़े सर्ग बिच्चां लैता गेदा ऐ।

1.5 विद्यार्थियें दे अभ्यास आस्तै किश :

अंश पाठ्य-पुस्तक थमां

1.6 सहायक पुस्तकां :

महात्मा विदुर, डोगरी साहित्य दा इतिहास : जितेन्द्र उधमपुरी

---0---

M.A. DOGRI

Course No. 102

Unit - I

Semester - I

Lesson : 2

रूपरेखा

- 2.0 रूपरेखा
- 2.1 उद्देश्य
- 2.2 पाठ-परिचय
- 2.3 पाठ-प्रक्रिया
 - 2.3.1 पैहले पद्यांश दी सप्रसंग व्याख्या
 - 2.3.2 दुए पद्यांश दी सप्रसंग व्याख्या
 - 2.3.3 त्रिये पद्यांश दी सप्रसंग व्याख्या
 - 2.3.4 चौथे पद्यांश दी सप्रसंग व्याख्या
 - 2.3.5 पञ्चमे पद्यांश दी सप्रसंग व्याख्या
 - 2.3.6 अभ्यास
- 2.4 सारांश
- 2.5 विद्यार्थीयें दे अभ्यास आस्तै किश सोआल
- 2.6 सहायक पुस्तकां

2.1 उद्देश्य

- (क) महाकाव्य दे पद्यांश दी व्याख्या पढ़िये विद्यार्थी पूरे संदर्भ दी पछान करी लैडन ।
- (ख) पद्यांश च दित्ते गेदे विचारें दी गूढ जानकारी हासल होई सकग ।
- (ग) सप्रसंग व्याख्या पढ़िये विद्यार्थी विशे समग्री समझिये अपने विचारें गी व्याख्यात्मी रूप च प्रकटने दी समर्थ हासल करी सकडन ।

2.2 पाठ-परिचे

इस पाठ च 'महात्मा विदुर' महाकाव्य दे खीरले च'ऊं सर्गे चा किश पद्यांशें दी व्याख्या कीती गेदी ऐ ।

2.3 पाठ-प्रक्रिया

- (क) पद्यांश दे संदर्भ च काव्य दे लेखक दा नांS दित्ता गेदा ऐ ।
- (ख) पद्यांश दा चेचा संदर्भ प्रसंग दे अन्तर्गत दित्ता गेदा ऐ तां जे विद्यार्थी गी विशे वस्तु दा पता चली सकै ।
- (ग) पद्यांश च व्यक्त विचारें दी व्याख्या इस ढंगा कन्ने कीती गेदी ऐ जे विद्यार्थी उसी समझिये आपूं व्याख्या करने दी समर्थ हासल करी सकन ।

◆ पैहले पद्यांश दी सप्रसंग व्याख्या

बाण चलाया पांडू दा हरणे दी जिन्दू लग्गा ।

हरण निहां, हुन साधु हा इक एह कैसा ढंग बज्झा ॥

जायां निं सुक्का, शाप तुगी तूं इस्सै मौती मरगा ।

जदुं जनानी छूहगा अपनी होना जिन्दू हरजा ॥

संदर्भ :-

एह काव्य-अंश साढ़ी पाठ्य क्रम च लग्गे दे महाकाव्य 'महात्मा विदुर' दे पैहले सर्ग थमां लैता गेदा ऐ । इसदे रचनाकार 'ज्ञान सिंह पगोच' होर न ।

प्रसंग :-

इस काव्य-अंश च कवि ने पांडू राज की किन्दम मुनि द्वारा थोने आहले शराप दा वर्णन प्रस्तुत कीते दा ऐ । ते इ'यै शराप खीर उसदी मौत दा कारण बनदा ऐ ।

व्याख्या :-

इक बारी पांडू राज जंगल च शिकार खेढन जंदा ऐ तां उत्थें उसी हिरण-हिरणी अपनी काम लीला च मगन लभदे न । पांडू शिकार की सामने दिक्खियै रेही नेई पांदा बगैर किश सोचे-समझे काम वासना च लीन हिरण पर तीर चलाई दिंदा ऐ । पर बदकिस्मती दिक्खो जे ओह हिरण नेई किन्दम मुनि हे । पांडू राज पछतांदा दे बड़ा पर किन्दम मुनि मरदे-मरदे उसगी शराप दिंदे न जे जि'यां तूं मेरै कन्नै कीती, जेह्डी मौत में मरा करना खीर तूं बी इस्सै मौती मरगा । किन्दम मुनि पांडू की शराप दिंदे होई गलांदे न जे तूं जिस दिन बी कुसै जनानी की छूहगा उससै दिन उस बेल्लै गै तेरे प्राण नश्ट होई जाडन ।

◆ दुए पद्यांश दी सप्रसंग व्याख्या

मैहलै आई रूप दासी दा धारी !

चुक्की प्रभु की ते बट्टी डुआरी !!

मौहरा मली दुद्ध अपना पिलाया !

इक सीक खिच्ची लऊ बी मुकाया !!

संदर्भ :-

एह काव्य-अंश साढ़ी पाठ्य क्रम च लग्गे दे महाकाव्य 'महात्मा विदुर' दे दुए सर्ग थमां लैता गेदा ऐ । इसदे रचनाकार 'ज्ञान सिंह पगोच' होर न ।

प्रसंग :-

इस काव्य-अंश च कवि कृष्ण लीला दा बखान करदे होई, ज्याने कृष्ण द्वारा रूप बदलियै आई दी राक्षनी पुतना दे बध दा बड़ा सुंदर वर्णन प्रस्तुत कीते दा ऐ ।

व्याख्या :-

अपने भने हत्थें मौती थमां डरे दे कंस की जिसलै पता चलदा ऐ जे उसगी मारने आहला

गोकल ग्रां च जशोदा दे घर पला करदा ऐ तां ओह कृष्ण गी मारने दी हर ममकन कौशश करदा ऐ । ते इक दिन ओह अपनी दासी राक्षनी पुतना गी ज्याने कृष्ण गी मारने आस्तै गोकल भेजदा ऐ । पुतना बड़ी चोरी-चलाकी कन्नै, इक सुंदर जनानी दा रूप धारी जशोदा दे घर जाई पुजदी ऐ । ते उत्थें सुत्ते दे ज्याने कृष्ण गी अपने हत्थें च चुक्की लाड़ लांदे-लांदे अपने स्तनें पर मौहरा मलियै दुद्ध पलान लगदी ऐ । पर प्रभु दी लाला दिक्खो जे प्राण लैन आई दी पुतना गी आपूं अपने प्राणें थमां हत्थ धोने पौंदे न । ज्याना कृष्ण दुद्ध पींदे-पींदे इक ऐसी सीक बटदा ऐ जे लहू चूसियै उसदे प्राण बी कड्डी टकांदे ऐ ।

◆ त्रिये पद्यांश दी सप्रसंग व्याख्या

बाहरें लिम्बन-पोच, मनै बिच होआ कोले !
 एह दुबधा दा भाव, करै दा अपने खोले !!
 करनी-कथनी फर्क च माहनू पापी बनदा !
 मोह हा मुहाई, झूठे तम्बू तनदा !!

संदर्भ :-

एह काव्य-अंश साढ़ी पाठ्य क्रम च लग्गे दे महाकाव्य 'महात्मा विदुर' दे त्रिये सर्ग थमां लैता गेदा ऐ । इसदे रचनाकार 'ज्ञान सिंह पगोच' होर न ।

प्रसंग :-

प्रस्तुत सतरें च कवि नै धृतराष्ट्र च अन्दरो-अन्दर पलने आह्ले पांडुएं प्रति दोखी सवा दा वर्णन कीते दा ऐ ।

व्याख्या :-

जिसलै विदुर नै खुश होइयै एह खुश-खबरी धृतराष्ट्र गी सनांदा ऐ जे कौरव कुल दी बेल जागतें होर बधाई ऐ तां धृतराष्ट्र गी एह लगदा ऐ जे द्रुपद राजे दे जग च उसदी धी कृष्णा दा ब्याह उसदे दुर्योधन कन्नै होया होना, ओह विदुर गी आखदा ऐ जे मिगी पैहलें गै पता हा जे दुर्योधन नै उत्थै जस्स कमाया ऐ । तां परते च विदुर धृत गी सनांदे न जे एह जस्स दुर्योधन नै नेई अर्जुन एह कमाया ऐ । ते इस ओह पंजै भ्रा द्रुपद राज च गै रौंवा करदे न । एह गल्ल सुनदे सार गै धृतराष्ट्र दा मन ढठी गेआ । ओह मनोमन जलन-भुजन

लगा। पर विदुर दे सामनै ओह अपने मनोभावें गी बुआसरदा नेई ते गलांदा ऐ जे मिगि कौरव ते पांडव दौनी च कोई फर्क नेई, दवै मेरी लेई बराबर न । ते मेरी पीड़ समझदे न। पर अंदरो-अंदरी ओह जलियै कोला होई जंदा ऐ । धृतराष्ट्र दा इ'यै दोगला सभा गै उसदा ते उसदे बंश दी तवाही दा कारण हा । कवि गलांदा ऐ जे धृतराष्ट्र साहीं सुहैं पर झूठें दे महरकखे चाढ़ने आहले लोग खीर पाप दे दल-दल च खुबदे जंदे न ।

◆ चौथे पद्यांश दी सप्रसंग व्याख्या

हे धर्म-मूरत ! युधिष्ठिर बचाओ !

बड़ा चर्ज ! थ्वाड़ी नजर निं चकोंदी !

बली भीम ! गुरजे गी चुक्को दना भर !

तुस चुप्प ! नेई गल्ल मूहां गलोंदी !

अर्जुन ! तुस्सै बाणें बरखा ब'राओ !

कुत्थें धनुष ? की निं डोरी खचोंदी ?

नकुल-सैहदेवो ! चलाओ हां शस्त्र,

खाल्ली ! कोई भल्ल बर्छी निं थ्हांदी !

संदर्भ :-

एह काव्य-अंश साढ़ी पाठ्य क्रम च लग्गे दे महाकाव्य 'महात्मा विदुर' दे चौथे सर्ग थमां लैता गेदा ऐ । इसदे रचनाकार 'ज्ञान सिंह पगोच' होर न ।

प्रसंग :-

इस पद्यांश च कवि नै, द्रोपदी दा भरी सभा च पंजें पांडुरें अगगें अपनी इज्जत बचाने लेई तरले-मिनतां करने दा बरलाप प्रस्तुत कीते दा ऐ ।

व्याख्या :-

जिसलै युधिष्ठिर अपने भ्राएं समेत अपना आप गी ते कृष्णा (द्रोपदी) गी बी जुऐ हारी दिंदा ऐ तां दुशासन कृष्णा गी बालें थमां घसिटियै भरी सभा च लेई औंदा ऐ ते कर्ण दे आखने पर उसी निरवस्त्र करन लगदा ऐ । तां अपनी इज्जत दी रक्षा लेई बे-बस कृष्णा कौरवें

दे दास बनी चुके दे शूरवीर पंजें पांडुऐं अगें छन्दे करदी ऐ । सभनें शा पैहलें ओह धर्म दी मूर्त युधिष्ठिर अगें बास्ते पांदी ऐ जे ओह उसदी रक्षा करै पर शर्मसार युधिष्ठिर उस कन्नै अपनियां अक्खीं तक नेई मलाई सकदा । पही बलकारी भीम ते धनुषधारी अर्जुन अगें फरयाद करदी ते उं'दी वीरता गी झंकोरदी ऐ । नकुल-सैहदेव जनेह वीर योद्धाएं अगें बी रौंदी-रझांदी ऐ । पर जुऐ च हरे दे पंजो-पंज पांडु पुत्तर कौरवें कन्नै द्रोपदी दे इस अपना दा बदला बे-बस होंदे न ते भरी सभा च अपना-अपना सिर झुकाई बैठे दे रौंहदे न ।

◆ पजमें पद्यांश दी सप्रसंग व्याख्या

तुस, धर्म अवतारी
जग न्यां दी जोत जगाई ।
थवाड़े पैरें दी घास्सा,
होनी ऐ लोक भलाई ।
मूरख अक्खी दा अन्नै,
भी डप्पर पर गमूरी ।
लहुऐ दे नाडू बगाने,
हून ऐ जुद्ध जरूरी ।

संदर्भ :-

एह काव्य-अंश साढ़ी पाठ्य क्रम च लग्गे दे महाकाव्य 'महात्मा विदुर' दे पजमें सर्ग थमां लैता गेदा ऐ । इसदे रचनाकार 'ज्ञान सिंह पगोच' होर न ।

प्रसंग :-

इ'नें पंक्तियें च विदुर भगवान कृष्ण गी कौरवें पांडवें मझाटै मठोंदी तनोतनी करी अपने समूलचे कुल दी लाज बचाने दा अनुरोद करदे न ।

व्याख्या :-

प्रस्तुत पद्यांश च विदुर अपने घर आए दे भगवान कृष्ण गी अनुरोद करदे न जे ओह कौरव

ते पांडवें दी सुलाह कराइयै उंदा कुल बचान पर कृष्ण विदुर गी गलांदे न जे तусें सारी उमर कोई माड़ा कम्म नेई कीता ते अजें बी तुस अपनी पूरी कौशश करा करदे ओह जे एह विनाश थोई जा । तुस चिंता छोड़ो जो जि'यां करग ओह उ'आं गै भरग । पर विदुर कृष्ण गी गलांदे न जे तुस चाहो तां एह धर्मयुद्ध होने शा रुकी सकदा ऐ । की जे तुंदी मर्जी कन्नै गै एह सारी दुनिया चलदी ऐ। परते च भगवान कृष्ण गलांदे न जे धृतराष्ट्र अक्खीं दा ते अन्ना ऐ गै पर हुन ओह अपने पापें करी दमागै दा बी अन्ना होई गेदा ऐ। जेहड़ा तुंदे जनेह महात्मा दी गल्ल नेई मनदा ओह मेरी केह सुनग । हुन ते लहुऐ दे हाड़ बगने न, इस युद्ध गी हुन कोई नेई रोकी सकदा ते समूलचे संसार च शांती लेई एह धर्म युद्ध होना बी जरूरी ऐ ।

अभ्यास :-

ख' ल्ल दित्त दे पद्यांशें दा संदर्भ ते प्रसंग दस्सियै व्याख्या करो :-

- (क) पलै बिज्ज धरती चम्माके-चम्माके !
 गड़ा-गड़, गड़ागड़, धम्माके-धम्माके !!
 भी मोहलधारें ही बरखा दी बोल्ली !
 अखचौ जिञ्जां लद्द इन्द्र ने खोल्ली !!
 भिड़ै बात अगें फुहारें गी धिक्के !
 धरती ते अम्बर होई गेदे इक्कै !!
- (ख) सलगै अगनी जाड़, तां उहऐ जीव न बचदे ।
 धरती अन्दर थाहर, बनाई जो तप तपदे ॥
 बाहुऐं अपनै जोर, दा होना मता जरूरी ।
 पौंदे मुहऐं भार, जिंदे कशा छड़ी गमूरी ॥
 जप, योग तप ध्यान, ज्ञान दी लो जगानी ।
 सील-सभाऽ सच-ठंड, बी जिन्नी बधै बधानी ॥
- (ग) उस्सै समैं भी गधे, कुत्ते, गिद्ध,

आई सभा सामने हे हुआं के !
हे राम ! अपसगन दिक्खी डरे सब,
धृत पाप बांडे भी अपने हे झांके !
झट डरदे मारे पांडू मुक्त कीते,
गेई दासता वर कृष्णा गी बांके !
पांडू चले बो सुयोधन दुखी,
पच्छ हिरदे दा थम्मी 'यै लांदा ऐ टांके !

(घ) तुं अजें निं भलेआं भाखी,
अर्जुन दी जुद्ध कमाई ।
तीरें दी बरखा कन्ने,
जग सारा देग रुढ़ाई ।
तूं विदुर महात्मा जैसे
गुरुएं दी गल्ल निं मन्नी ।
मां बब्बै बी समझाया,
इक सिक्ख निं गंठी ब'न्नी ।

2.4 सारांश

इस पाठ च विद्यार्थियें आस्तै 'महात्मा विदुर' महाकाव्य दे किश खीरले चेऊ सर्गे बिण्णा दी सप्रसंग व्याख्या दिती गेदी ऐ। कन्नै गै संदर्भ, प्रसंग ते व्याख्या बौर जानकारी हासल होई सकग। बक्खरे –बक्खरे सर्गे थमां लैते गैद एह कहड़े सर्ग बिच्चां लैता गेदा ऐ।

2.5 विद्यार्थियें दे अभ्यास आस्तै किश – अशं पाठ्य-पुस्तक थमां

2.6 सहायक पुस्तकां – 'महात्मा विदुर'

डोगरी साहित्य दा इतिहास : डॉ जितेन्द्र उधमपुर

.....0.....

M.A. DOGRI

Course No. 102

Unit - II

Semester - I

Lesson : 3

LIFE AND CONTRIBUTION OF POET AND STUDY IN DIFFERENT ASPECTS OF "MAHATMA VIDUR-"

कवि दा जीवन-परिचे ते डोगरी काव्य च उंदा योगदान

3.0 रूपरेखा

3.1 उद्देश्य

3.2 पाठ-परिचे

3.3 पाठ-प्रक्रिया

3.3.1 श्री ज्ञानसिंह पगोच ते डोगरी काव्य-साहित्य गी इंदा योगदान।

3.4 सारांश

3.5 कठिन शब्द

3.6 अभ्यास आस्तै सोआल

3.7 सहायक-पुस्तकां

3.1 उद्देश्य

इस पाठ गी पढिये विद्यार्थिये गी डोगरी दे मशहूर कवि 'श्री ज्ञानसिंह पगोच' हुंदे जीवन-परिचे ते डोगरी काव्य-साहित्य गी उंदे नमुल्ले योगदान बारै विस्तृत जानकारी

हासल होग ते इंदे व्यक्तित्व ते कृतित्व दे बारे च विद्यार्थी कुसै बी किस्मा दे सुआलें दे उत्तर देने च समर्थ होडन ।

3.2 पाठ-परिचे

इस पाठ च श्री ज्ञानसिंह पगोच हुंदे व्यक्तित्व ते कृतित्व सरबंधी लोडचदी जानकारी दिती गेदी ऐ ।

3.3 पाठ-प्रक्रिया

3.3.1 श्री ज्ञानसिंह पगोच ते डोगरी काव्य-साहित्य गी इंदे योगदान ।

- (क) श्री ज्ञानसिंह पगोच हुंदा जीवन-परिचे
- (ख) श्री ज्ञानसिंह पगोच हुंदियां रचनां
- (ग) श्री ज्ञानसिंह पगोच हुंदे काव्य-साहित्य दा मूल्यांकन
- (घ) श्री ज्ञानसिंह पगोच ते डोगरी काव्य-साहित्य गी उंदे योगदान

1. जीवन-परिचे

डोगरी काव्य-साहित्य च अपना टकोहदा नां रक्खने आहले होनहार कवि 'श्री ज्ञानसिंह पगोच' हुंदा जन्म 15 मेई 1948 ई. च जिला कटुआ दी तसील हीरानगर दे इक ग्रां पटयारी च इक राजपूत घरा च होआ । एह इक ऐसे साहित्यकारन जेहड़े अपनी काव्य-साधना च रूज्जे दे रौहदे न ते कवि गोश्टियें जां मुशायरें च कदें गे जंदे न ।

इंदी मुंडली पढाई अपने ग्रां च गे होई ते जिला कटुआ दे डिग्री कालेज थमां इनें 12मीं जमात पास कीती । 12मीं पास करने बाद एह अपने ग्रां वापस आई गे । घरै दी माली हालत खस्ता होने करी एह अपनी पढाई अगें जारी नेई रक्खी सके । 1972 च इनें जम्मू यूनिवर्स्टी दे कमिस्ट्री विभाग च बतौर स्टोर कीपर अपनी नौकरी शुरू कीती । ते पही आखर 31 मेई 2008 च एह सर्विसिज ट्रांसपोर्ट ते एस्टेट विभाग थमां असिस्टेंट रजिस्ट्रार दे औहदे परा रिटायर होए । इंदियां धर्मपत्नी होर मतियां पढी-लिखी दियां ते नेई पर बड़ियां परोपकारी, सैहनशील ते पतिव्रता न । पगोच हुंदी साहित्य सिरजना इंदे खास जोगदान रेहा ऐ ।

2. साहित्य-रचनां

ज्ञानसिंह पगोच होरें गी बचपन थमां गै धार्मिक ते पौराणिक ग्रंथें दा गूढ अध्ययन करने च रूचि ही । इ'नें ग्रंथें दा अध्ययन करने दा इ'दे पर इ'न्ना असर होआ जे सन् 1972 थमां एह शुद्ध शाकारारी होई गे । पौराणिक ग्रंथें दा अध्ययन करियै एह उ'दे पात्रें शा इ'न्नें मुतासर होए जे किश-ना-किश लिखने दी योजना बनादे रेह । इ'नें डोगरी साहित्य गी इक खंड-काव्य ते दो महाकाव्य देइयै डोगरी काव्य-साहित्य गी सगोसार कीता ।

इ'दी रचनाएं दा ब्यौरा इस चाल्ली ऐ :-

- (क) न्यां (महाकाव्य 1984)
- (ख) मतंग आश्रम (खंड-काव्य 1986)
- (ग) महात्मा विदुर (महाकाव्य 2003)

3. ज्ञानसिंह पगोच हुंदा डोगरी काव्य-साहित्य गी योगदान

(क) न्यांS

सन् 1984 च छपने आह्ला एह महाकाव्य डुग्गर दे प्रसिद्ध शहीद करसान बावा जित्तो दे जीवन पर अधारत ऐ । पगोच हुंदी डोगरी च छपने आहली एह पैहली साहित्यक रचना ऐ । एह गाथा सत्तें सर्गें च बंडोई दी ऐ ते इसदा अधार बावा जित्तो दी कारक ऐ । सामंतवादी शक्तियें दे खलाफ न्यां लेई लडदे होई बावा जित्तो नै किस चाल्ली अपना बलिदान दित्ता उसदा बड़ा मार्मिक चरित्रण इस महाकाव्य च होए दा ऐ ।

(ख) मतंग आश्रम

ज्ञानसिंह पगोच हुंदा एह काव्य 1986 च प्रकाशत होआ । एहदा कथानक बालमीकी रामायण च आए दे 'राम-शबरी मिलन' प्रसंग पर अधारत ऐ । एह काव्य बी सत्तें सर्गें च बंडोए दा ऐ । भील जाती दी धी शबरी बड़ी सोहल सुभा दी ते उच्च बचारें आहली नारी ही । उसदे जीवन दा मता समां दक्खनी भारत च पम्पा नदी दे कंठै मतंग रिशी दे आश्रम च बीतेआ ते उ'दे शा गै उसने भक्ति दा सूखम ज्ञान प्राप्त कीता । शबरी दे सुभा-सुआत्म, अथाह प्रेम, भक्ति ने कवि गी इस काव्य गी लिखने दी प्रेरणा दित्ती । पगोच होरें शबरी दे जीवन बारै, संघर्ष ते ईश्वर-प्रेम गी बड़ी बखूबी प्रस्तुत कीते दा ऐ । इस खंड-काव्य

पर पगोच होरें गी जे.एंड. के अकैडमी आफ आर्ट, कल्चर एंड लैंग्वेजिज जम्मू आसेआ सम्मान हासल ऐ ।

(ग) महात्मा विदुर

इन्दा त्रिया काव्य 'महात्मा विदुर' अगस्त 2003 च प्रकाशत होइयै पाठकें सामने आया । महाभारत दी कथा गी अधार बनाइयै इनें इस महाकाव्य दी रचना कीती । पूरा महाकाव्य महाभारत दे इक पात्र 'विदुर' दे जीवन-चरित्र पर अधारित ऐ । इस महाकाव्य च दस्सेआ गेदा ऐ जे किस चाल्ली इक दासी पुत्तर 'महात्मा विदुर' नै इक बनाशकारी युद्ध गी रोकने दा जतन कीता हा । पूरे महा-काव्य च 'महात्मा विदुर' गी इक्क सोहगा-सियाना, कुशल कूटनीतिज्ञ, अहिंसावादी, धर्म दा पालन करने आला इक म्हान संत दे रूपै च प्रस्तुत कीते दा ऐ। महाकाव्य दे 'रुवें ते लक्षणें पर पूरा उतरने आह्ला एह इक सबूरा महाकाव्य ऐ । पूरा महाकाव्य पढ़नै परैन्त पाठकें गी पता लगदा ऐ जे महाभारत दे धर्म युद्ध च किस चाल्ली नै धर्म दी जित्त होई ते पांडवें, कोरवें गी कियां हराया ।

इस महाकाव्य लेई ज्ञान सिंह पगोच होरें गी जम्मू कल्चरल अकैडमी ते साहित्य अकादमी दिल्ली पाससेआ सम्मानित कीता गेदा ऐ । एह महाकाव्य खासी रूची बनाई रखने आह्ला ते पाठकें गी सिख-मत देने आह्ला ऐ ।

एहदे इलावा डोगरी साहित्य दे खेतर च पगोच हुन्दा अपना इक्क खास थाहर ऐ । इन्दियां एह कृतियां डोगरी साहित्य गी इक्क म्हत्त्वपूर्ण देन ऐ । मन्ने परमन्ने दे डोगरी साहित्यकारें पगोच हुन्दी गिनतरी कीती जन्दी ऐ ।

'मतंग आश्रम' खंड काव्य ते 'न्यां' ते 'महात्मा विदुर' महाकाव्य दे बगैर बी ज्ञान सिंह पगोच हुन्दियां केई होर साहित्य रचना बी मिलदियां न, जेड़ियां शीराजा डोगरी ते लोऽ पत्रिकाएं च छपी चुकी दियां न ।

इनें कृतियें च "धरती दे चित्रगुप्त", "आसरा" (रेडियाई नाटक), "भाव, भक्ति, विचार", "मन" ते "गोपी" लेख बगैरा शामिल न ।

ज्ञान सिंह पगोच होरें डोगरी दे प्रबंध-साहित्य गी एह अमर रचना प्रदान करियै इस साहित्य गी सगोसार करने दा बड़ा चेचा योगदान दित्ते दा ऐ।

डोगरी साहित्य सिरजना च लगातार रूज्जे दे न। इनें डोगरी साहित्य जगत च इक अमित

छाप छोड़ी दी ऐ ते इन्दा नां डोगरी दे मन्ने-परमन्ने दे कवियें च औंदा ऐ ।

अपनी रिटॉयरमेंट दे बाद बी पगोच होर लगातार डोगरी साहित्य सिरजना च रूज्जे दे न ।

3.4 सारांश

इस पाठ गी पटियै विद्यार्थियदें गी डोगरी दे प्रसिद्ध कवि 'ज्ञान सिंह पगोच' हुंदी सरोखड़ जानकारी हासल होई सकग। इसदे लावा उदे द्वारा डोगरी काव्य दे जोगदान बारै बी जानकारी हासल करी सकड़न। डोगरी च उंदा अनमुल्ला जागदान रेहा ऐ। इसदे लावा उंछिये रचनाएं बारै बी जानकारी हासल करी सकडा।

3.5 कठिन शब्द

- | | | |
|------------|------------|-----------|
| 1) विस्तृत | 2) लोड़चदी | 3) टकोहदा |
| 4) जमात | 5) पौराणिक | 6) न्यां |
| 7) होनहार | 8) नमुल्ला | |

3.6 अभ्यास आस्तै सोआल

- 1) ज्ञान सिंह पगोच हुंदा जीवन परिचे अपने शब्दें च लिखो।

.....

.....

.....

.....

.....

- 2) 'न्यां' महाकाव्य बारै विस्तृत जानकारी देओ

.....

.....
.....
.....
.....
3) 'महात्मा विदुर' महाकाव्य दे पैहले त्र'ऊं संगे दा सार लिखो।

.....
.....
.....
.....
4) पगोच हुंदी रचनाएं बारै नोट लिखो।

3.7 सहायक पुस्तकां

डोगरी साहित्य दा इतिहास : डॉ. जितेन्द्र उधमपुरी

.....0.....

M.A. DOGRI

Course No. 102

Unit - II

Semester - I

Lesson : 4

सार

- 4.0 रूपरेखा
- 4.1 उद्देश्य
- 4.2 पाठ-परिच
- 4.3 पाठ-प्रक्रिया
 - 4.3.1 पैहले सर्गे दा सार
 - 4.3.2 दुए सर्गे दा सार
 - 4.3.3 त्रिये सर्गे दा सार
 - 4.3.4 चौथे सर्गे दा सार
 - 4.3.5 पजमें सर्गे दा सार
 - 4.3.6 छेमें सर्गे दा सार
 - 4.3.7 सतमें सर्गे दा सार
 - 4.3.8 अठमें सर्गे दा सार
 - 4.3.9 नौमें सर्गे दा सार

4.4 सारांश

4.5 कठिन शब्द

4.6 अभ्यास आस्तै सोआल

4.7 सहायक पुस्तकां

4.1 उद्देश्य

इस पाठ गी पढ़ियै विद्यार्थी समूलचे महाकाव्य 'महात्मा विदुर' दे कथानक कन्नै बाकफ होडन ते नौ सर्ग च बंडोए दे इस महाकाव्य दे हर सर्ग गी समझनै च एह पाठ विद्यार्थिये लेई मदगार साबत होग । ते विद्यार्थी कुसै बी चाल्ली दे सुआले दे उत्तर देने च समर्थ होडन ।

4.2 पाठ परिचे

इस पाठ च 'महात्मा विदुर' महाकाव्य दे सभनै सर्ग दे सार दित्ते गेदे न ।

4.3 पाठ-प्रक्रिया

'महात्मा विदुर' महाकाव्य दे नौ सर्ग दे सारे दा ब्यौरा ।

1. पैहले सर्ग दा सार
2. दुए सर्ग दा सार
3. त्रिये सर्ग दा सार
4. चौथे सर्ग दा सार
5. पजमें सर्ग दा सार
6. छेमें सर्ग दा सार
7. सतमें सर्ग दा सार
8. अट्ठमें सर्ग दा सार
9. नौमें सर्ग दा सार

4.3.1 पैहले सर्गे दा सार

महाकाव्य 'महात्मा विदुर' दी शुरुआत गुरु वंदना कन्नै कीती गेदी ऐ । महाकाव्ये दे कथानक दी शुरुआत मांडय मुनि थमां शुरु होन्दी ऐ । मांडय मुनि बचपन थमां गै बड़े पंगेबाज हे । जि'यां इ'नें जवानी च पैर पाया तां इनें गी आत्मज्ञान होई गेआ ते ओह क रिशी बनी गे । संसारी मोह माया गी छोड़ियै जंगलै च ईश्वर भक्ति करनै लेई चली गे । उथें इन्दे नै इक्क बड़ी गै अजीव घटना घटी, चोर राजे दा धन चुराई लेई आए ते राती दे न्हैरे च इन्दे अगै आनी सुट्टेआ । धनै दी पड़ताल पेई तां राजे दे सैनिकें मुनि गी चोर समझी पकड़ी लेता ते राजे दे दरबार लेई गे । राजे नै मुनि गी फांसी दा हुक्म सुनाई दिता । मांडय मुनि इस बे-न्याई गी दिक्खी क्रोधित होई जन्दे न ते राजे गी शाप देई दिन्दे न जे तू दासी पुत्तर बनी जागा ।

हस्तनापुर दी रानी सत्यवती गी इस गल्ला दा बड़ा दुख हा जे ओहदे बंश गी बधाने आहला कोई नेई ऐ । ओहदियां त्रै नूहां विधवा होई गेदियां हियां ते इक पुत्तर भीषम ने सारी उमर ब्रह्मचारी रौहने दा प्रण पाए दा हा । अपनी चिन्ता गी रानी अपने पुत्र भीषम कन्नै बखानदी ऐ । चानचक्क उसी चेता आई जन्दा ऐ जे ओहदे पिता बड़े धर्मी कर्मी हे, जेहड़े राहगीरें गी किशती पर बटाइयै नदी पार करांदे हे । इक बारी रिशी 'पराशर' उस नदी 'र आए हे । अ'ऊं उस किशती दी भेती ही ते मेरे पिता नै मिगी शारा करियै आक्खेआ जे तू मुनीवर गी नदी पार टपाई आ । पराशर रिशी दे मनै च अपने कुले गी अगें बधाने दा मोह हा इस करी उनें अपनी माया ते शक्ति नै सत्यवती गी इक पुत्तर दित्त हा ते कन्नै गै आक्खेआ हा जे इक दिन एह इक म्हान रिशी वेद व्यास बनडग । बचपन च गै रिशी वेद व्यास अपनी माऊ गी छोड़ियै जंगलै च तपस्या करनै आस्तै चली गे हे ।

सत्यावती गी इस दुखै आहले बल्लै पुत्र, वेद व्यास दा चेता औंदा ऐ ते ओह भीष्म गी वेद व्यास गी तुपनै लेई आखदी ऐ । मां दे दुखी होने दी गल्ल सुनियै रिशी वेदव्यास झटपट हस्तनापुर आई जन्दे न, ते मां गी वचन दिन्दे न जे कुलै दी सुकदी बेल गी परतियै हरा-भरा करी देगडन । सत्यवती अपनी त्रौनें नूहें गी बारी-बारी रिशी वेद व्यास कोल भेजदी ऐ । पैहली नूह अम्बिका जिसलै वेद व्यास दे वचित्र रूप गी दिक्खदी ऐ तां ओहदे आन्ने परत मारी दिन्दे न । वेद व्यास मां गी आक्खदे न जे इसदे घर होने आहला पुत्तर अन्ना होग । फही मां दूई नूह अम्बालिका गी भेजदी ऐ ओहदा रंग वेद-व्यास गी दिक्खियै पीला ही जन्दा ऐ तां वेद व्यास माऊ गी गलान्दे न जे इसदे घर पुत्तर ते होग पर ओह सदा गै कसरी रौहग । फही सत्यावती अपनी बड़ी नूह गी वेद-व्यास कोल भेजदी ऐ पर

बड़ी नूह चलाकी नै दासी गी वेद-व्यास दे कक्ष च भेजी दिन्दी ऐ । दासी बड़े शान्त सुभा नै वेद-व्यास दी सेवा करियै उसी खुश करदी ऐ । वेद-व्यास दासी दे शांत सुभाऽ ते सुन्दर रूप गी दिक्खियै अपने अदभुत तेज दी बरखा ओहदे घर करदे न ते गलान्दे न जे तेरे घर होने आह्ला पुत्र इक म्हान आत्मा होग। इस चाली अम्बिका दे घर अन्ने धृतराष्ट्र, अम्बालिका दे घर कसरी पांडू राज ते दासी दे घर महात्मा विदुर दा जन्म होन्दा ऐ ।

4.3.2 दुए सर्गें दा सार

हस्तनापुर नग्गर इक बारी पही रस्सी-बस्सी जंदा ऐ जिसलै हस्तनापुर दी रानियें ते दासी घर धृतराष्ट्र, पांडूराज ते विदुर पैदा होए । हस्तनापुर दा वातावरण इकदम बदली जन्दा ऐ । चवक्खै खुशियां छाई जन्दियां न । अम्बिका अपने अन्ने पुत्रे गी दिक्खी मनोमन पछतांदी ऐ पर इसी अपनी किस्मत दा फेर समझी उसी झट्ट गलै नै लाई लैंदी ऐ । दूई रानी अम्बालिका अपने पीले-भुस्से पुत्रे गी दिक्खी बड़ी दुखी होन्दी ऐ । ओह बड़ी गै भोली-भाली ऐ । अपनी किस्मत गी कोसदी ऐ । पर तौलै गै ओहदे मनै च भरोची दी ममता फुट्टी पौन्दी ऐ ते ओह अपने बमार ते पीले-भुस्से गिल्ले गी छाती नै लाइयै पूरा प्यार दिन्दी ऐ ।

दासी पुत्र विदुर सभाऽ दा बड़ा चंचल हा । ओह सभ्नी दा बड़ा लाडला हा, सभ्ने उसी बड़ा प्यार करदे हे । दादी सत्यावती दा ओह सभ्ने सा लाडला पोत्रु हा, ओह उसी बड़ा प्यार करदी ही । भीष्म तारु बी ज्याने विदुर नै ज्याना बनी जन्दे हे ते ओह्दै नै खेढदे ते शरारतीं करदे हे । विदुर च शरारातीपन होने दे कन्नै-कन्नै गंभीरता ते संवेदना बी ही ओह अपने अन्ने भ्राऽ धृतराष्ट्र ते बमार रोहनै आहले भ्राऽ पांडू दी जरूरत पौने 'र पूरी-पूरी मदद करदा हा । इस चाल्ली धृतराष्ट्र, पांडू ते विदुर दी शिक्षा-दीक्षा शुरू होई जन्दी ऐ ते उनेंगी चंगा ज्ञान हासल करनै लेई गुरुकुल भेजी दिता जन्दा ऐ । दुए सर्ग च त्रैवै भ्राऽ गुरुकुल शिक्षा ग्रहण करन जन्दे न ।

4.3.3 त्रिये सर्गें दा सार

इस सर्ग च गुरुकुल दी मर्यादा दे मताबक त्रोनी भ्राएं दी शिक्षा शुरू होई जन्दी ऐ । गुरु रोज अपने आसन 'र बेहियै अपने शिष्यें गी उपदेश दिन्दे न । गुरु अपने शिष्यें गी उपदेश दिन्दे होई कर्म दा महत्व दस्सदे न । शिष्यें गी आक्खदे न जे तुस कर्मयोगी बनो ते संसार च यश कमाओ । गुरुकुल च मैहलें थमां आए दे राजकुमार ते झुगियें थमां आए दे गरीब

जागत बी हे । पर शिक्षा दे उस मन्दर च कोई उच्च-नीच दी गल्ल नेई करदा हा । उत्थें सब्भै इक्कै बारावर हे । धृत, पांडू ते विदुर चा विदुर सब्भने थमां स्याना ते सेहतमंद हा । इस करी विदुर नै गुरु जी दा मन जीती लैते दा हा, ते उन्दे मनै च खासा थाहर हा विदुर लेई । विदुर म्हेशा अपने मनै दी अवाज सुन्दा ते ओहदी संवेदना ते परोपकार दी भावना उसी म्हेशा दुखियें दी सेवा लेई प्रेरित करदी ही । गुरुकुल च इन्दी पढाई पूरी होई जन्दी ऐ इस लेई ओह मैहलें च जाने लेई बड़े उत्साहित हे । उ'नेंगी एह पता नेई हा जे कदूं उनेंगी कोई लैने गितै औग ते कदूं ओह घल पुजडन ।

आखर उन्दे ताऊ भीषम उनेंगी लैन आई जन्दे न । त्रौने भ्राएं गी जित्थे घर जाने दी खुशी ही उत्थें गै गुरुकुल छोड़ने दा दुख बी हा । ते आखर गुरु जी अपने भावें गी दबाइये उनेंगी विदा करदे न ।

इस सर्ग च धृतराष्ट्र, पांडू ते विदुर गुरुकुल च शिक्षा ग्रहण करना ते उन्दा मैहलै वापस परतोने दा वृत्तान्त ऐ ।

4.3.4 चौथे सर्गें दा सार

इस सर्ग च धृत पांडू ते विदुर अपनी शिक्षा पूरी करियै गुरुकुल थमां घर परतोई औंदे न । त्रौनें अपनी माताएं ते दादी गी चरण वन्दना कीती ते हिरख भरोचे हत्थ उन्दें सिर फेरियै उनेंगी छाती लाई लेआ । दादी सत्यावती दी इच्छा होई जे त्रैवे अपनी पढाई पूरी करी बैठे न ते हुन इन्दें ब्याह करी देने चाहिदे । त्रौनी आस्तै उचित कुड़ियें दी तोप पेई गई । बड़े भ्राऽ धृतराष्ट्र व्याह गंधारी कन्नै होआ ओह शिवें दी बड़ी भक्तन हे । पांडू राज दा व्याह राजा सूरसेन दी कुड़ी कन्नै होआ । राजकुमारी दा नां कुन्ती हा ते ओह दुवासा रिशी दी बड़ी भगतन ही । पांडू राज नै मदर देस दे नरेश दी कन्या मादरी कन्नै इक होर व्याह कीते दा हा । धृत ते पांडू राज दे वाद फही विदुर दे व्याह दी बाही ही । इस करी विदुर लेई उचित कन्या दी तपाश शुरु होई गई । भीषम हुन्दी नजरी च इक बड़ी शैल ते सुशील कन्या ते ऐ ही पर इक्कै गल्ले दी त्रुटी ही जे कन्या इक शुदर नारी दी धीऽ ही । उसदा नां हा देवकी ।

देवकी गी दिक्खनै आस्तै भीषम विदुर गी लेई जन्दे न । विदुर बड़ा संस्कारी ते ज्ञानवान हा, ओह गलांदा ऐ जे कोई बी उच्च-नीच वरास्त च नेई थ्होंदी एह ते कर्म अनुसार मिलदी ऐ । इक नीच कुलै च जन्मे दा माहनू अपने करमैं करी ते चंगै सोच-विचारें नै उच्चा होई सकदा ऐ । इस चाल्ली विदुर देवकी गी स्वीकार करी लैन्दा ऐ ते विदुर दे

व्याह दियां त्यारियां शुरू होई जन्दियां न । सत्यवती अपने पूरे परिवार समेत जान्नी लेइयै विदुर गी देवकी नै व्याहने लेई जन्दी ऐ ।

इस चाल्ली विदुर दा ब्याह देवकी कन्नै होई जंदा ऐ ।

4.3.5 पजमें सर्गें दा सार

इस सर्ग च त्रैवै भ्राएं दे घृस्त-जीवन दा वर्णन कीता गेदा ऐ । दादी सत्यावती दे मना च एह चिता लग्गी दी ही जे राज-पाठ हून कुसदे हथ सौंपेआ जा । राज-घराने दी मर्यादा दे मताबक राज-पाठ म्हेशां बड्डे पुतरा गी दित्ता जंदा ऐ । पर धृतराष्ट्र दे अन्ने होने करी सत्यवती ते भीषम ने एह फैसला कीता जे पांडू राज गी हस्तनापुर दा राजा बनाया जा । सत्यावती ते भीषम विदुर दी कौशलता गी जानदे हे इस करी विदुर गी बजीर दा ओहदा देने दा फैसला कीता गेआ ।

इक बारी पांडू कुतै जंगल च शकार पर गेदा होंदा ऐ तां उत्थें हिरण ते हिरणी काम लीला च रुज्जे दे हे, पांडू हिरण उप्पर वाण चलांदा ऐ, ओह हिरण नेई आपूं किन्दम मुनि हे जेहड़े पांडू गी शराप दिंदे न जे तूं जदूं बी अपनी स्त्री दा स्पर्श करगा तां तूं उसलै गै नष्ट होई जागा । पांडू इस शराप कोला बड़ा दुखी होंदा ऐ ते अपनी दुखी व्यथा गी कुन्ती अग्गें प्रकट करदा ऐ ते गलांदा ऐ जे साढ़ा कुल हून कियां अग्गे बधग । कुन्ती उसी साह्रा दिंदे होई गलांदी ऐ जे दुर्वासा रिशी आसेआ दित्ते दा मन्त्र जरूर कोई चमत्कार करग । मंत्र कारण कुन्ती दे घर पंज ते वेदव्यास दी शक्ति कारण गंधारी दे घर 100 पुत्र पैदा होंदे न ।

पांडू राज इक बारी मादरी कन्नै जंगलै च भ्रमण करने गी जंदा ऐ । जंगलै दे वातावरण च ओह अपने संयम गुआई दिंदा ऐ ते मादरी दा स्पर्श करने दी कोशश करदा ऐ, मादरी दे मना करने पर बी ओह नेई रुकदा ऐ ते अपना जान गुआई बाँहदा ऐ । धृतराष्ट्र गी हस्तनापुर दा राजा बनाई दित्ता जंदा ऐ ।

दुर्योधन ने पांडवें गी नुकसान पुजाने दियां मतियां कोशशां कीतियां पर ओह कामजाब नेई होआ । कौरवें ते पांडवें च बल अजमाई आस्तै अखाड़े दा अयोजन कीता गेआ हा, जिथें अर्जुन सभनें थमां तेज, धनु-धर बनियै सामनै आया । कौरव स गल्ल गी दिक्खियै जली-भुज्जी गे, पर कौरवें दी बक्खी दा कर्ण ने अर्जुन कन्नै मकाबला करने दी चनौती दित्ती ही । इस चाल्ली कर्ण ते अर्जुन च मकाबला होआ । एह दृश्य दिक्खियै कुन्ती बे-होश होई जंदी ऐ । की जे कर्ण बी कुन्ती गी सूरज देव आसेआ दित्ती दी ओहदी लुआद ही ।

4.3.6 छेमें सर्गें दा सार

‘महात्मा विदुर’ महाकाव्य दे छेमें सर्ग च विदुर ते देवकी च होई दी गल्लबात दा वर्णन ऐ । विदुर कृष्ण भागवान दी पूरी कहानी देवकी गी सुनांदे न । मथुरा दे राजा उगरसेन दे घर कंस नां दा जागत होआ । पंते भविक्खवाणी कीती एहदी मैत एहदे भनेए दे हत्थें होनी ऐ । इस लेई कंस इस गल्लै थमां डरी ते उसने एह प्रण पाई लैता जे अपनी भैनु दा इक बी जागत जिन्दा नेई रौहन देग । कंस नै अपनी भैन देवकी ते अपने भनोए वासुदेव गी जेलै बन्द करी दित्ता । उन्दे जिन्ने ज्ञ्याने होन्दे उनेंगी मारदा जन्दा हा । पर होनी गी कोई नेई टाली सकदा । भगवान कृष्ण नै उसी मारनै लेई आपूं कंस दी भैन देवकी दे घर जन्म लैता । कृष्ण दा जरम होन्दै गै वासुदेव गी आकाशवाणी होई जे ओह ज्ञ्याने गी चुकियै वृंदावन नंद दे घर छोड़ी औन ते जशोदा दे गर्भ च पैदा होई दी कुड़ी लेई औन । वासुदेव कृष्ण गी टोकरी च पाइयै नंद दे घर गोकुल छोड़ी औंदे न ते जशोदा दी धीऽ गी मथुरा लेई औंदे न । कंस गी जिसलै पता लगदा ऐ जे देवकी नै ज्ञ्याने गी जन्म दित्ता ऐ तां ओह उसी मारनै लेई जेलखाने पुज्जी जन्दा ऐ ते उस कन्या गी देवकी शा खुसियै पत्थरै ‘र पटकदा ऐ । ओह कंजक देवी रूप ही जेहड़ी ओहदे हत्थै च निकलियै समानै ‘र मीलक बनियै चमकदी ऐ ते आकाशवाणी करदी ऐ जे तुगी मारने आह्ला जशोदा दे घर पला करदा ऐ । ओह कृष्ण गी मारने दी पूरी कोशिश करदा ऐ ते अपनी राक्षनी पुतना गी गोकल भेजदा ऐ । कृष्ण दे प्राण लैन आई दी पूतना दे अपने प्राण निकली जन्दे न । कृष्ण दुद्धै राहें पूतना दी शक्ति दा एहसास होन्दा ऐ । फही ओह अपने दौं राक्षसं गी कृष्ण गी मारनै लेई भेजदा ऐ पर ओह बी कृष्ण दी शक्ति अगैं बेवस होइयै अपने प्राणें थमां हत्थ धोई दिन्दे न ।

कंस कृष्ण गी मरानै लेई नित नमियां योजना बनांदा ऐ । इक बारी ओह अपने इक दूत गी गोकल भेजदा ऐ ते कृष्ण गी मरानै लेई नित नमियां योजना बनांदा ऐ । इक बारी ओह अपने इक दूत गी गोकल भेजदा ऐ ते कृष्ण ते बलराम गी न्योता भेजदा ऐ जे मैं इक अखाड़े दा आयोजन कीते दा ऐ ते सारें गी उत्थें अपनी-अपनी जोर-अजमाई लेई साहा दित्ते दा ऐ । कृष्ण ते बलराम माऊ-बब्बै दा आशीर्वाद लेइयै मथुरा जाने दी त्त्यारी करदे न । मथुरा पुज्जियै कृष्ण पैहलें राक्षसं दा सफाया करदे न ते फही कंस गी मारी मुकान्दे न ते फही अपने पिता वासुदेव ते मां देवकी गी जेल दा कड्डियै अपने नाना उगरसेन गी मथुरा दा राजपाठ सौंपी दिन्दे न ।

4.3.7 सतमें सर्गें दा सार

देवकी, विदुर शा जिसलै कृष्ण भगवान दा गुणगान सुनदी ऐ तां मनोमन सोचन लगदी ऐ जे साढ़े भागें च बी कर्दे कृष्ण मुरारी दे दर्शन लिखे दे होगन । देवकी सोचदी ऐ जे कर्दे नर-नरायण दा मेल होई गोआ तां हस्तनापुर दे सारे दुख क्लेश मिट्टी जाडन । कौरवें जिसले पांडवें गी खत्म करने दी इक नमीं चाल सोची तां विदुर दी कुशल बुद्धि उंदी इस कूट नीती गी समझी गई ही । इस लेई उनें युधिष्ठिर कन्नै इस सारे भेद गी खोल्ली दित्ता ते उनेंगी चौकने रौहने ताई आखेआ । कौरवें सोचे दा हा जे जिसलै पांडू जंगल जाई उथें वाराणवत उत्सव मनागन तां लकड़ी दे बने दे मैहलें च उनेंगी फूकी दित्ता जाग । विदुर नै युधिष्ठिर गी सारी गल्ल समझाई दित्ती ही । जदूं पांडव जंगलै च जाई उस लकड़ी दे मैहल च रौहदे न तां विदुर दे गुप्तचर मैहलें दे अन्दरो-अन्दर इक सुरंग कड्डी दिन्दे न तां जे मैहलै च गग लगनै घर पांडव इस सुरंग राहें बाहर निकली सकन । सारे हस्तनापुर वासियें ते कौरवें एह सोची लैता जे पांडव मैहलें अन्दर फकोई गे न । कौरव बी लोकाचारी अपना दुख दस्सन लगे पर अन्दरो-अन्दरी मते खुश हे । कौरवें दी एह चाल बी कामयाब नेई होई । पांडव ते विदुर दे गुप्तचर अपने बनाई दी खोए (सुरंग) रस्तै ठीक-ठाक बाहर आई गे ।

कृष्णा द्रुपद राजे दी धीऽ ही, ओहदे लेई शैल वर तुप्पनै गितै राजा द्रुपद नै इक जग दा अयोजन कीता ते उस जगै च इक शर्त रक्खी जे जेहड़ा माहनू थल्लै रक्खे दे तेला दे कढाटै च दिक्खियै उप्पर घूमदी मछली गी नशाना लाई देग, उयै मेरी धीऽ दा वर बनड । उस जगै च पंजै पांडू भ्राऽ ब्राह्मनें दा भेस बदली औंदे न । दर्योधन, कर्ण ते केई होर राजकुमार बी औंदे न । दर्योधन सभनें शा पैहलें उठदा ऐ पर ओह इस कोशश च कामयाव नेई होन्दा । आखर धनु-धारी अर्जन कमान चुकियै उप्पर घूमदी मछली दी अक्खीं च नशाना लांदा ऐ । ते फही कृष्णा अर्जुन दे गल्ल वरमाला पाई दिंदी ऐ ते राजा द्रुपद गी अपनी धीऽ आस्तै मनचाहेया वर मिली जंदा ऐ । राजा धृतराष्ट्र नै एह सोचे दे हा जे कृष्णा दा व्याह कौरवें दे कुसै राजकुमारै नै होना ऐ पर जिसलै उसी विदुर कोला एह पता लग्गदा ऐ जे पांडव जिन्दे न ते द्रुपद राजे दे जग च ओहबी गेदे हे तां ओह मनै कोला बड़ा दुखी होंदा ऐ । विदुर जाई द्रुपद राजे नै मिलदा ऐ ते पांडू पुतरें गी घर वापस औने लेई आखदा ऐ ।

4.3.8 अठमें सर्गें दा सार

कौरवें, पांडवें कन्नै वायदा कीते दा हा जे जिसलै ओह हस्तनापुर वापस औडन तां उनेंगी

बक्खरा राजपाठ दिता जाग । वायदै दे मताबक पांडवें गी इन्द्रप्रस्थ दा राजपाठ सौंपेआ
 गेआ । पांडवें अपनी इन्द्रप्रस्थ दी सीमाएं गी उत्तर, पूर्व ते दक्षिण कन्ना मिलाई लेआ ।
 पांडवें अपनी वीरता ते सच्चाई दे अधार उप्पर पूरे भारत 'र अपनी जित्त दा झंडा चाढ़ी
 दिता । इक बारी पांडवें दे मनै च जग करने सोच आई । उनें जग कीता जगै च कौरवें
 समेत केई उच्च ब्राह्मणें गी ते केई रिशी-मुनियें गी साद्दा दिता । पांडवें दा राज-पाठ
 दिक्खी कौरव फकोई गे । इन्द्रप्रस्त दा राज-पाठ खुस्सनै लेई हस्तनापुर आइयै केई
 स्कीमां बनाने लगे । युद्ध च ओह पांडवें गी जिती नेई सकदे, पर सोचदे न किस चाल्ली
 उनेंगी इन्द्रप्रस्थ दा राज-पाठ थोए, इस करी शकुनी नै इक नमीं चाल चलदा ऐ ।
 पांडवें गी जुआ खेलनै लेई हस्तनापुर बलांदा ऐ । मकारी कन्नै कौरव, युधिष्ठिर कोला
 सुन्ना, चांदी, हाथी घोड़े सेना ते राजपाठ जिती लैन्दे न । युधिष्ठिर नै अपने आप गी ते
 अपने चौनीं भ्राएं गी दाऽ उप्पर लाई दिंदा ऐ ते भ्राएं समेत अपने आपे गी हराई जंदा ऐ
 । विदुर स बे-न्याई गी दिक्खियै बड़ा दुखी होन्दा ऐ । युधिष्ठिर गी शकुनी उकसांदा
 ऐ जे ओह कृष्णा गी दाऽ उप्पर लाई देऐ । पांडव आखर कृष्णा गी बी हारी दिन्दे न ते
 दुशासन कृष्णा गी वे-इज्जत करनै लेई बालें दा फड़ियै राज-दरबार तोड़ी त्रीड़ी आंनदा
 ऐ । भरी सभा च कर्ण दुशासन गी आखदा ऐ जे कृष्णा गी निवस्त्र कीता जा । कृष्णा
 गी जिसलै एह लगदा ऐ जे इस राज-सभा च कोई बी ओहदी इज्जत नलाम होने शा नेई
 बचाई सकदा तां ओह सच्चौ मनै नै भगवा कृष्ण गी याद करदी ऐ । कृष्ण भगवान द्रोपदी
 दी इज्जत बचानै लेई दौड़ी औंदे न । दुशासन द्रोपदी दी साड़ी खिचदा जंदा ऐ पर ईश्वर
 शक्ति नै साड़ी बधदी गै जन्दी ऐ । बारी-बारी सारे कौरव कोशश करदे न पर नाकामी
 दा मुंह दिक्खना पौन्दा ऐ । धृत इस प्रभु माया गी समझी जन्दा ऐ, इस लेई दरबार
 बरखास्त करियै पांडवें गी राज-पाठ बापस देई दिन्दा ऐ । इस गल्लै थमां दुखी होइयै
 सुयोधन क नमीं चाल चलदा ऐ । पांडवें गी परती जुआ खेलने लेई सद्दी भेजदा ऐ । शर्त
 बड़ी कठन ही, जेहड़ा जुऐ च हारग, ओह राजपाठ छोड़ियै तैहरां बरे वनवास करन चली
 जाग । पांडव इस बारी फही हारी जन्दे न ते शर्त मताबक उनेंगी तेहरें बघे दा बनवास
 होई जन्दा ऐ । पांडव कृष्णा गी लेइयै तेहरां बरे बनवास कट्टन चली जन्दे न । अपनी
 मां कुन्ती गी चाचा विदुर दी देख-रेख च छोड़ी जन्दे न ।

4.3.9 नौमें सर्गे दा सार

मां कुन्ती पुत्तरें दी बनवास चली जानै 'र बड़ी चिन्ता च रौहन्दी ऐ । कुन्ती गी विदुर
 बे-फिकर होने लेई गलांदे न । जेहदे पुत्तर युधिष्ठिर जनेह धरमी, भीम जनेह

बल-शाली , अर्जुन जनेह धनुष-धारी ते नकुल ते सहदेव जनेह वीर होन उसी चिन्ता करने दी कोई लोड़ नेई । धृतराष्ट्र गी विदुर इक बारी फही समझाने दी कोशश करदे न पर ओह पुट्टा गै जबाव दिन्दा ऐ । इस गल्ला थमां दुखी ते निराश होइयै ओह कुन्ती गी देवकी कोल छोड़ियै आपूं जंगलै पाससै पौन्दे न । उत्थें उन्दी मलाटी पांडवें नै होन्दी ऐ । विदुर पांडवें नै मिलियै कृष्ण कोल चली जंदे न ते कौरवें-पांडवें च सुलाह कराने दी इक्क होर कोशश करदे न । ओह कृष्ण अगें प्रार्थना करदे न जे ओह हस्तनापुर जाइयै कौरवें-पांडवें च सन्धि करान ।

कृष्ण भगवान धृतराष्ट्र कोल जन्दे न । पर धृत कौरवें-पांडवें दी सन्धि दे प्रस्ताव गी टुकराई दिन्दे न । कृष्ण अपनी कोशश च नाकाम होइयै परतोई औंदे न ते पांडवें गी युद्ध दी तयारी लेई प्रेरित करदे न । पांडव मानसिक तौर 'र अपने भ्राएं कौरवें नै युद्ध करनै लेई तयार नेई हे पर कृष्ण उनेंगी समझान्दे न जे धरम दे इस युद्ध च अधरम दा नष्ट होना निश्चत ऐ भाएं ओह अपना किन्ना बी सक्का की नेई होऐ । फही कुरुखेतर च कौरवें ते पांडवें दा महा युद्ध होंदा ऐ जिस च धृतराष्ट्र दे सारे पुत्तर मारे जन्दे न । युद्ध जीती पांडव हस्तनापुर वापस औंदे न । पांडव अपने सक्के-सरबन्धियें गी मारियै बड़े दुखी हे पर कृष्ण उनेंगी समझान्दे न जे जिनें भरी सभा च नारी गी निरवस्त्र करने दी कोशश कीती ते नारी दी इज्जत नेई भाखी उन्दा इयै हाल होन्दा ऐ । हस्तनापुर च परती राम-राज्य आई जंदा ऐ ते प्रजा सुखी जीवन व्यतीत करन लगदी ऐ । धृतराष्ट्र राजपाठ छोड़ी सन्यासी बनी जन्दा ऐ । इस धरम युद्ध च विदुर ने भाएं कोई शस्त्र ते नेई चुकेआ पर धर्म ते सच्च दे राहें पांडवें गी परती राज-पाठ दुआनै च इक म्हत्वपूर्ण भूमिका नभाही । आखर इस धरम युद्ध च बुराई पर अछाई दी जित्त होंदी ऐ ।

4.4 कठिन शब्द

- | | | |
|------------------|-----------|------------|
| 1) मददगार | 2) बंश | 3) मोह |
| 4) किशती | 5) कसरी | 6) कोसदी |
| 7) शिक्षा-दीक्षा | 8) घृस्त | 9) कौशलता |
| 10) प्रण | 11) सुरंग | 12) कढ़ाटै |
| 13) धनुश-धारी | 14) मकारी | |

4.6 अभ्यास आस्तै सोआल

1) 'महात्मा विदुर' महाकाव्य दे पैहले त्र'ऊं दा सार अपने शब्दों च लिखे।

.....

.....

.....

.....

.....

2) 'महात्मा विदुर' महाकाव्य दे लेखक दा जीवन परिचे लिखो।

.....

.....

.....

.....

.....

3) 'महात्मा विदुर' महाकाव्य दे अठ्मे सर्ग दा सार लिखो।

.....

.....

.....

.....

.....

4.7 सहायक पुस्तकां

- 1) 'महात्मा विदुर'
- 2) डोगरी साहित्य दा इतिहास : डॉ. जितेन्द्र उधमपुरी

.....0.....

M.A. DOGRI

Course No. 102

Unit - II

Semester - I

Lesson : 5

‘महात्मा विदुर’ महाकाव्य दा भाव ते विशें दे अधार पर मूल्यांकन

5.0 रुपरेखा

5.1 उद्देश्य

5.2 पाठ-परिचे

5.3 पाठ- प्रक्रिया

5.3.1 महात्मा विदुर महाकाव्य दा मूल्यांकन भाव-पक्ख दे
आधार उप्पर

5.4 सारांश

5.5 कठिन शब्द

5.6 अभ्यास आस्तै सोआल

5.7 सहायक पुस्तकां

5.1 उद्देश्य

इस पाठ गी पढ़ियै विद्यार्थी समूलचे महाकाव्य च आरे दे बक्ख-बक्ख विशें ते इसदे भाव-पक्ख कन्नै बाकफ होडन ते पूरे काव्य च कवि ने केह आक्खना चाहेदा ऐ विस्तृत जानकारी हासल करडन । ते काव्य बारै कुसै बी चाल्ली दे प्रश्नें दे उत्तर देने च समर्थ होडन ।

5.2 पाठ-परिचे

इस पाठ च 'महात्मा विदुर' महाकाव्य च आए दे विशें ते भाव-पक्ख सरबंधी सरोखड़ जानकारी मसालां देइयै दिती गेदी ऐ ।

5.3 पाठ-प्रक्रिया

5.3.1 'महात्मा विदुर' महाकाव्य दा मूल्यांकन भाव-पक्ख दे आधार उप्पर

काव्य कवि दे मनै दी चीज ऐ ते जि'यां मनै दी की सीमां जां थाह नेई होंदी उस्सै चाल्ली काव्य दी बी कोई सीमां जा हद्द बन्ना नेई होंदा । सन् 2003 च छपने आह्ला 'ज्ञान सिंह पगोच' हुंदा महाकाव्य 'महात्मा विदुर' विश्व प्रसिद्ध महाकाव्य 'महाभारत' गी आधार बनाइयै रचेआ गेदा ऐ। इस महाकाव्य दा कथानक महाभारत दे विशेष पात्तर 'विदुर दे जीवन-चरित्र पर आधारत ऐ। रचनाकार नै अपने इस महाकाव्य च 'विदुर' दे सम्पूर्ण व्यक्तित्व दियें चरित्रिक खूबियें गी गोहाड़ने दी सफल कोशिश कीती दी ऐ । कवि ने विदुर गी इक सोहगे-स्याने, धर्म दे पालक, इक म्हान संत दे रूपै च अपनी इस रचना च पेश कीते दा ऐ । जि'नें धर्म युद्ध च सच्च दा साथ दित्ता । काव्य च उ'दे इस चाल्ली दे योगदान ते सुशील गुणें करी गै कवि नै विदुर गी महात्मा दा पद दित्ते दा ऐ । पगोच होरें अपने इस समूलचे महाकाव्य गी नौं सर्गें च बंडियै 240 सफें च सम्पूर्ण कीते दा ऐ । महाकाव्य दे पैहले सर्ग दी शुरुआत गुरु-वंदना कन्नै करियै कवि ने मां सरस्वती दी वंदना बड़े सुच्चे ते सुंदर शब्दें च किश इ'यां करदा ऐ ।

हथ वीना ते हंस सुआरी ।

गल माला फुल्लें दी भारी ॥

वेद मंत्र विद्या दी दाती ।

कवि कला-कौशल परतापी ॥

तूं निर्मल बुद्धि दी दाता ।

दया करो सभनै पर माता ॥

मंगलाचरण दे मगरा मुनि वेदव्यास दे अदभुत तेज ते रूप थमां डरियै रानी अम्बिका ते अम्बालिका गी प्राप्त होने आह्ले अन्ने ते बमार पुत्तरें दा वर्णन कवि इस चाल्ली करदा ऐ ।

हां रानी गी पुत्र थोना ।
पर जरमे दा अन्ना होना ॥
एह् मारु दे दो पुआड़े ।
उन सनमुख निहें नैन गुहाड़े ॥

x x x x x x

निक्की नूंह अम्बालिका रानी ।
भेजी सुनमुख वेद-ज्ञानी ॥
दिखदे गै होआ तन पीला ।
खेढी पल अन-चाही लीला ॥
दिखदे सार गै बोल्ले जोगी ।
फल्ल ते थोग, ब भुस्सा रोगी ॥

मुनि थमां प्राप्त दो रोगी पोत्तरुं दी गल्ल सुनियै सत्यावती अपनी बड्डी नूंह गी शैल चाल्ली समझाइयै वेद व्यास कोल जाने गी गलांदी ऐ पर डरी-त्राही दी नूंह अपने थाहर अपनी दासी गी मुनि कश भेजी दिंदी ऐ । ते इस भोली-भाली आज्ञाकारी दासी दी कुक्खा चा वेद व्यास दे तेज कारण क स्वस्थ पुत्र विदुर दा जन्म होंदा ऐ । वेद व्यास थमां दासी गी थोने आहले नरोए पुत्र दे वरदान गी कवि नै अपनी सुंदर भाशा राहें इस चाल्ली बखाने दा ऐ :-

मन मेरा जीती तूं लेदा ।
तेरै खोट कपट निं रेहदा ॥
सुन्दर-शैल शबीला सोहना ।
घर तेरै इक पुत्र होना ॥

दुऐ सर्ग च धृत, पांडू ते विदुर दे जन्म करी हस्तिनापुर च खुशी दे वातावरण गी प्रस्तुत कीते दा ऐ ते कवि विदुर दे बाल-रूप ते उसदे शलैपे गी इ'यां वर्णत करदा ऐ ।

लाल लाल बुल्ल जि'यां क्यालुएं दा फुल्ल,
सारै मची गेदी हुल्ल, कोई दिक्खने गी नस्सै दा ।
शलैपे दा ओ धनी, जिघ्यां चौतड़ै प मणीय
अगं पिच्छें कनी कनी लोई अपनी च दस्सै दा ।

त्रिये सर्ग च गुरुकुल च शिक्षा ग्रैहण करन गेदे त्रौने भ्राएं ते गुरुकुल च रेहियै विदुर च
पलने-मठोने आह्ले स्याने गुणें गी बांदै कीता दा ऐ ।

सोचन गुरु, "मेरा बच्चू एह"
मेरे कदुं हुकम दै थल्लै ऐ ।
मन-औंदी सब किश देआं इसी,
जो किश बी मेरै पल्लै ऐ ॥
किन्ना करमठ इक जोगी एह,
जागत पर धरम ज्ञानी ऐ ।
हे राम ! मता किश देआं इसी,
गुरु नैन-सीस दा पानी ऐ ।

कवि गुरु दी म्हत्ता गी बखानदे होई गलांदा ऐ जे उस आस्तै सब बरोबर होंदे न । गुरु
गै मात्र इक ऐसा दीया ऐ जो न्हैरे गी बी चानन करी दिंदा ऐ :-

इस करी गुरु गी नमन करो,
चुप मन्नो उसदे आखै गी ।
न्हैरे गी चानन करदा ओह,
धन्न आखो ऐसे राखे गी ।

चौथे सर्ग च कवि जित्थें त्रौने भ्राएं दा शिक्षा ग्रहण करने परैत परती मैहलें औने दा वर्णन
प्रस्तुत करदा ऐ उत्थें गै धृत, पांडू ते विदुर दे व्याह च भारती-सभ्याता-संस्कृती दा
गुणगान करदे होई भारत च नारी दी म्हत्ता दा बखान बी करदा लभदा ऐ । कवि गलांदा
ऐ जे जित्थें नारी दा मान-सम्मान कीता जंदा ऐ उत्थै म्हेशा सुखमयी वातावरण रौहदा ऐ ।

फुल्ल वारे, भी तुआरी आरती,
केह प्यारी सभ्यता ऐ भारती ।
सुखी ओह घर जिस च नारी मान ऐ,
बिना नारी घिस्त नरक सम्मान ऐ ।

पजमें सर्ग च पांडू राजा दी मौत ते धृतराष्ट्र दे हस्तनापुर दा राजा बनने दा वर्णन ऐ
। ते इससै सर्ग च कवि, प्रभु-भक्ति दे कन्नै-कन्नै देवकी दा अपने पति विदुर दे प्रति
सेवा-भाव बी दृशांदा ऐ :-

मनै च सेवाभाव दीप हा लट लट बलदा रौहदा ।
करम तिलें दा तेल उदमैं बत्ती उप्पर पौंदा ॥
बड्डै पैहर पति दै कन्नै उद्वना, न्हौंना, धोना ।
परमेसर दा नां जपने गी आसन उप्पर बौहना ॥

छेमैं सर्ग च कवि ने विदुर ते देवकी दे वार्तालाप दा वर्णन कीता दा ऐ । देवकी दे पुच्छने
पर विदुर उसगी भगवान कृष्ण दे जन्म ते उंदी अद्धभुत्त लीलाएं बारै सनांदे न । इस सर्ग
च गै पगोच होरें राधा-कृष्ण दे पवित्र प्रेम दे संयोग ते वियोग दौनी पक्खें दा बड़ा मार्मक
वर्णन बी प्रस्तुत कीते दा ऐ । जि'यां -

जदूं तुस मेरे भाग ! एह जिंद छूहन्ने !
मेरे हिरखी अथरूं न होंदे चरुने !!
हे कान्ह मेरे ! मी मुरली सुनाओ !
घुली जां ! मिटी जां ! नेहा गीत लाओ !! (संयोग)

x x x x x x

बड़ा नर्थ ! हे राम ! कैसा बछोड़ा ?
जिअं बक्ख होआ हे हैंसैं दा जोड़ा !!
बिनां पानी मच्छी, कड़ी धुप्प-धारी !
किअं जीन जीना वयोगै दी मारी !!

सतमें सर्ग च कौरव-पांडवें गी मारने आस्तै नमीं चाल चलदे न पर विदुर दी कुशल पुद्धी उं'दी इस चाल गी समझी जंदी ऐ । ते ओह कौरवें दी सारी योजना पैहलें गै युधिष्ठिर गी सनाई दिंदे न ।

तूं भरी बैठा हां, तूसैं जानै गै पौना ।
तुगी एह मेरी सिक्ख, तूं चतरे बनियै रौहना ॥
लक्कड़, लाख ते तेल, सनूं दा मैहल बनाया ।
बिंद छुहाई अग्ग, तां तड़-तड़ होग सफाया ॥

अट्टमें सर्ग च पांडु द्रुपद दी धीऽ कृष्णा गी व्याइयै हस्तनापुर परतोंदे न । ते उ'नेंगी इन्द्रप्रस्थ दा राज-पाठ सौपेआ जंदा ऐ । विदुर युधिष्ठिर गी उपदेश दिंदे होई गलांदे न जे चंगा राजा उ'ऐ जेहड़ा प्रजा दी दुख-तकलीफें गी समझै ।

सदा सच्च साथें चलै देस-गद्दी
ज्ञानी ते विद्वान दा मान करना ।
गुणियें पुरस्कार दा हक्क बनदा,
दुखियें-गरीबें तली दान धरना ।

नौमें सर्ग च कौरवें दे खातमें बाद हस्तनापुर च चौने पाससै प्रेम दी लहर बगदी ऐ ते उत्थें परतियै राम राज स्थापित होंदा । प्रजा दे सुखद जीवन दा वर्णन कवि अपने शब्दें च इ'यां करदा ।

धन्न धरती भारत मां,
जित धर्मराज जेह राजा ।
परती आया राम-राज,
लोकें बिच मेल-मलाहजा ।

खीर च एह गलाया जाई सकदा ऐ जे भाव-पक्ख ते विशे दी द्रिष्टी कन्नै इस महाकाव्य च नेकां कथ-घटना न, जेहड़ियां जन-मानस कन्नै समाजी ते मानसिक धरातल पर जुड़ी दियां न । एह मानव गी प्रेरणा देने दे कन्नै-कन्नै गूढ तरीकै नै सोचने पर बी मजबूर

करदियां न । अपने कला-कौशल कन्नै पगोच होरें समूलचे महाकाव्य च 'विदुर' दे चरित्रिक गुणें गी पाठकें सामने रक्खियै, उसी म्हातमा दी पदवी दुआने च पूरी सफलता हासल कीती दी ऐ ।

5.4 सारांश

इस पाठ गी पढ़ियै विद्यार्थियें गी डोगरी दे प्रसिद्ध महाकाव्य 'महात्मा विदुर' दे मुख पात्र 'विदुर' बारे सरोखड़ जानकारी हासल होई सकग। इस महाकाव्य गी महाभारत दा आधार बनाइयै रचेआ गेदा ऐ। इसदा पूरा कयानक महात्मा विदुर दे जीवन-चरित्र उप्पर आधारत ऐ। 'ज्ञान सिंह पगोच' होरें इस महाकाव्य गी नौं सर्गे च बंडियै इसगी सफल बनाए दा ऐ। पगोच हुंदा एह महाकाव्य डोगरी दे सभनें महाकाव्य च अपना चेचा थाहर रखदा ऐ।

5.5 कठिन शब्द :

- | | | |
|---------------|-----------------|---------------|
| 1) गोहाड़ने | 2) सोहगे-स्याने | 3) गुरु-बंदना |
| 4) डरी-त्राही | 5) वरदान | 6) पलने-मठोन |
| 7) मानसिक | 8) कला-कौशल | |

5.6 अभ्यास आस्तै सोआल

- 1) 'विदुर' दा चरित्र-चित्रण करो।

.....

.....

.....

.....

.....

- 2) भाव-पक्ख द्रिरशी कन्नै महाकाव्य 'महात्मा विदुर' दा मुल्यांकन करो।

.....

.....
.....
.....
.....
3) भारती काव्य शस्त्र : डॉ. अर्चना केसर
.....
.....
.....
.....
.....

5.7 सहायक पुस्तकां

- 1) 'महात्मा विदुर' ज्ञान सिंह पगोच
- 2) डोगरी साहित्य दा इतिहास : डॉ. जितेन्द्र उधमपुरी

.....0.....

M.A. DOGRI

Course No. 102

Unit - II

Semester - I

Lesson : 6

'महात्मा विदुर' महाकाव्य दा कला-पक्ख दी द्रिश्टी कन्नै मूल्यांकन

6.0 रुपरेखा

6.1 उद्देश्य

6.2 पाठ-परिचे

6.3 पाठ- प्रक्रिया

6.3.1 'महात्मा विदुर' महाकाव्य च अलंकार-योजना

6.3.2 'महात्मा विदुर' महाकाव्य च रस-योजना

6.4 सारांश

6.5 कठिन शब्द

6.6 अभ्यास आस्तै सोआल

6.7 सहायक पुस्तकां

6.1 उद्देश्य

इस पाठ गी पढ़ियै विद्यार्थी समूलचे महाकाव्य दे कला-पक्ख कन्ने रू-ब-रू होडन ते महाकाव्य च कवि नै बक्ख-बक्ख रसें ते अलंकारें दे प्रयोग करियै अपनी रचना च किस

चाल्ली गुआड़ पैदा कीते दा ऐ तफसील कन्नै जानकारी हासल करडन । ते इस महाकाव्य बारे कला दी द्रिष्टी कन्नै सरबंधत कुसै बी चाल्ली दे प्रशनें दे उत्तर च समर्थ होडन ।

6.2 पाठ-परिचे

इस पाठ च 'महात्मा विदुर' महाकाव्य दी रस ते अलंकार योजना बारे सरोखड़ जानकारी मसालां दिती गेदी ऐ ।

6.3 पाठ-प्रक्रिया

1. 'महात्मा विदुर' महाकाव्य च प्रयुक्त अलंकार योजना –

- (क) अनुप्रास अलंकार दा प्रयोग
- (ख) यमक अलंकार दा प्रयोग
- (ग) उपमा अलंकार दा प्रयोग
- (घ) रूपक अलंकार दा प्रयोग
- (ङ) उत्प्रेक्षा अलंकार दा प्रयोग
- (च) मुहाबरें दा प्रयोग

2. 'महात्मा विदुर' महाकाव्य च रस योजना –

- (क) करुण रस
- (ख) श्रंगार रस
- (ग) वीर रस
- (घ) रौद्र रस

6.3.1 'महात्मा विदुर' महाकाव्य च अलंकार-योजना

काव्य गी आकर्शक, सुंदर ते प्रभावपूर्ण बनाने च अलंकारें दा सारे शा मता योगदान होंदा ऐ । अलंकार प्रभाव ते सुंदरता दे इलावा कथन गी संक्षिप्त बी बनांदे न अर्थात गागर च सागर भरने दा कम्म करदे न । जित्थूं तक महाकाव्य 'महात्मा विदुर' च प्रयुक्त अलंकारें दी गल्ल ऐ तां एह गलाया जाई सकदा ऐ जे इस च ऐसा कोई बी वर्णन नेई जिस च

शब्दालंकारें ते अर्थालंकारें दे कन्नै-कन्नै मुहावरें दा गुहाड़ नेईं होऐ । समूलचे महाकाव्य च अलंकारें राहें पैदा होने आहली सुंदरता कवि दी बेजोड़ शैली दा गै प्रमाण दिंदी ऐ ।

(क) अनुप्रास अलंकार दा प्रयोग

गुरुकुल च शिक्षा ग्रैहण करन गेदे अपने चेलें गी गुरु जिसलै अपने उपदेश दिंदे न तां अनुप्रास अलंकार दा इक चित्त छुहना उदाहरण इस चाल्ली मिलदा ऐ :-

हुन पल भर प्रभु ध्यान करो,
अकख, नक्क, कन्न सब भुल्लियै ।
तन रोम-रोम रस राम रचौ,
चलै प्रेम-पुरा ब्हा झुल्लियै ॥

इ'यां गै गुरु दे प्रवचने दी म्हत्ता गी बसानने आस्तै कवि नै रूपक ते अनुप्रास अलंकार दा प्रयोग बखूबी कीते दा ऐ :-

गुर गल्लां मनै-बरेती पर,
गूढा रंगें दा ठप्पा ऐ ।
सिख-सोच-सभाऽ-सुआत्म कन्नै
बड़ा मेल, ना टोला ठप्पा ऐ ।

इ'यां गै अनुप्रास अलंकार दे किश होर उदाहरण इस चाल्ली न जि'यां :-

सिर-सिर सुच्ची सोच समाया ।
झटपट भीषम कोल सदाया ।
x x x x x x
चूहे-चिड़े-चफेरै चक्कर ।
भौड़ा पर भौड़ा दी टक्कर

(ख) यमक अलंकार दा प्रयोग

यमक अलंकार दे बी किश इक खूबसूरत उदाहरण इस महाकाव्य च मिलदे न –

आई रथ कश हे रुके, झुके पांडुऐं सीस

सीस देई गुरु आखदे, जग तुंदी केह रीस ।

शब्दालंकारें साहीं समूलचे महाकाव्य च अर्थालंकारें अर्थात् उपमा, उत्प्रेक्षा, रूपकें आदि बी खासी बरतून नजरी औंदी ऐ । कवि शब्दें दे अर्थें राहें कथन च जिस चाल्ली चमत्कार उत्पन्न करदा ऐ ओह इसदे अनूठे कला-कौशल दा गै प्रभाव ऐ ।

(ग) उपमा अलंकार दा प्रयोग

मां सत्यवती दी चिंता सुनियै रिशी वेद व्यास भीषम दे साथें कियां तौलेतौले गैई पुटदे हस्तनापुर औंदे न । कवि इ'नें दोऐ ब्रह्मचारी महापुरशें दी सफुर्ती दा बखान सुंदर उपमा राहें इ'यां करदा ऐ ।

पैंडा पल-पल संभदा इज्जां ।

लपटोंदी जा फूहड़ी जिज्जां ॥

इ'यां गै किश इक होर उपमाएं दे उदाहरण दिक्खो –

हस्तनापुर चानन इ'यां ।

सुरग-शैहर अमरावती जि'यां ॥

x x x x x x

मिह्ठी वाणी पक्खरु बोलन ।

कन्नै बिच जि'यां मिसरी घोलन ॥

(घ) उत्प्रेक्षा अलंकार दा प्रयोग

मदर-देश-नरेश दी मादरी ते देवकी दी सुंदरता गी कवि उत्प्रेक्षा अलंकारें राहें किश इस चाल्ली बांदै करदा ऐ :-

खुम्ब चिट्ठी, दाग नेहां चादरी

डलक चम्बे दी कली, नां मादरी

x x x x x x

इक डाहली फुल्ल चिट्ठा डलकदा,

दूर तार गास झिलमिल झलकदा ।

देवकी हा नां देवक पुत्तरी,

परी अखचै सुरग भुञ्जां उत्तरी ॥

किश उदाहरण होर दिक्खो -

जिया - जैत सैहमी दी छप्पी दी इञ्जां ।

खरगोश दिक्खियै शेरे गी जिञ्जां ॥

x x x x x x

पानी पर इञ्जां ब्हा बिलदी ।

जिञ्जां धी बजोगन मां मिलदी ॥

(ड) रूपक अलंकार दा प्रयोग

सुंदर-सुंदर उपमाएं ते उत्प्रेक्षा साहीं चित्त छूहने रूपक भी इस महाकाव्य च न'ग जन जड़े दे लगदे न । जि'यां :-

हुन सोचें दी खूहिया डुब्बी ।

कदें निं उड्डी गासा गुड्डी ॥

x x x x x x

आस पखेरू फंघ निं खो'ल्लै ।

x x x x x x

सोच सागर डुबदा-तरदा भीषम हा कश आया

(च) मुहाबरें दा प्रयोग

अलंकारें आह्ला लेखा समूलचे महाकाव्य च मुहाबरें दे बी खासे प्रयोग द्रिष्टीगोचर होंदे न । जिस करी काव्य-भाशा दा गुहाड़ होर मता बधी जंदा ऐ । जि'यां :-

मौती दे मूंह बी जाई लगदा

नित्त इय्यै ठेलन ठेहलै दा ।

x x x x x x

सुखै सत्तीं मन ऐ बाग-बाग

सुख ऐसी सुमन-सगन्धी ऐ ।

x x x x x x

मूंह बोल घट्ट, भले कम्म मते

शरमा बिच पानी-पानी ऐ ।

x x x x x x

भै आया दिक्खी ते आन्ने टडों ऐ ।

सुनेआं सिञ्जां सप्प सींघी गेआ हा ।

6.3.2 'महात्मा विदुर' महाकाव्य च रस-योजना

काव्य दी आत्मा 'रस' गी मन्नेआ जंदा ऐ । इस करी काव्य च रस दा इक म्हत्तवपूर्ण थाहर होंदा ऐ । रस दशा च सहृदय पाठक स्पर्श शून्य होई जंदा ऐ । महाकाव्य च कोई इक रस प्रधान होंदा ऐ ते बाकी गौण रूप च होंदे न । अर्थात् इक रस अंगीरस दे रूपै च होंदा ऐ ते बाकी अंगभूत रूप च । इसकरी महाकाव्य च लगभग सभनें रसें दी बरतून जरूरी मन्नी जंदी ऐ । जित्थू तक 'महात्मा विदुर' महाकाव्य च रस योजना दा सवाल ऐ तां एह गलाया जाई सकदा ऐ जे इसदा अंगीरस 'करुण' ऐ पर कुतै-कुतै वीर, रौद्र, भ्यानक, आदि रसें दी योजना बी द्रिष्टीगोचर होंदी ऐ ।

(क) करुण रस

जिसलै कंस गी पता चलदा ऐ जे उसी मारने आह्ला गोकुल च पला करदा ऐ तां ओह अपने सपाहियें गी गोकुल दे सभने सोह्ल ज्ञानें गी मारने दा हुकम दिंदा । इस करुणा दे भाव गी कवि इस चाल्ली प्रस्तुत करदा ऐ :-

गोदें चा ज्ञाने पखोड़ी-पखोड़ी !

मारे, कोई गैहल-गुच्चल निं छोड़ी !!

सौहरे घर जंदे होई कृष्णा दी बरधाई दे मौकै पर उसदे मनै च उदुने आह्ले भावें गी कवि ने बड़े मार्मक ढंगै कन्नै इस चाल्ली व्यक्त कीते दा ऐ -

भी नजर मुड़ियै, दुड़ाई ही कृष्णा,

दिक्खी मैह्ल अपना बड़ी सूंक सुट्टी ।

परबस पेई कूज पिंजरे च सोचै,

परदेस बासा हिक्का हूक उट्टी

भिरी हेरदी, बाग बूहटे खड़ोते,

दुआसी भरे, जि'यां रोंदे हे फुट्टी ।

(ख) श्रंगार रस

श्रंगार रस दे दो पक्ख होंदे न 'संयोग' ते 'वियोग' इस महाकाव्य च बी श्रंगार रस दे इ'नें दोने पक्खें दी योजना नजरी औंदी ऐ

राधा-कृष्ण दे प्रेम प्रसंग दे संयोग पक्ख गी खूबसूरती इ'यां चित्रत कीते दा ऐ :-

चरणें च बैठी, कृष्ण बांह बधांदे !

दुआली ही हिरखें गलै ने हे लांदे !!

राधा गलैं फुल्ल-माला ही पाई !

इक फुल्ल जूड़े च दित्ता सजाई !!

जदूं तुस मेरे भाग ! एह जिंद छूहन्ने !

मेरे हिरख अत्थरुं न होंदे चरुने !!

हे कान्ह मेरे ! मी मुरली सुनाओ !

घुली जां ! मिटी जां ! नेहा गीत लाओ !!

ते जिसलै कृष्ण कैस दा संहार करने आस्तै मथुरा चली जंदे न तां उं'दे वियोग च
राधा दी दशा दा वर्णन कवि बड़े मारमक ढंगे कन्नै इ'यां करदा ऐ :-

रथ रस्तै जंदा, राधा दूरें-दूरें !

चुप-चुप, मन हा वजोग बशूरें !!

रथ किश पलें बिच हा जमनां दै पारें !

राधा खड़ोती दी, दिखदी रूआरें !!

बड़ा नर्थ ! हे राम ! कैसा बछोड़ा ?

जिअं बक्ख होआ हैंसें दा जोड़ा !!

बिनां पानी मच्छी, कड़ी धुप्प-धारी !

किअं जीन जीना वयोगे दी मारी !!

(ग) वीर रस

महाकाव्य च वीर रस दा इक बड़ा चित्त छूहना उदाहरण उसलै मिलदा ऐ जिसलै कृष्ण
ते बलराम कंस दे सादै पर निडर होइयै दंगल च भाग लैने आस्तै मथुरा जाने लेई तयार
होई जंदे न ।

असें गी ऐ सादा, असें दौन्ने जाना !

असें गै एह कहानी, एह किस्सा मुकाना !!

x x x x x x

मुकाये मैं राकस, इत्थें जो मुकाने !

बलगै दे मां बब्ब बी जाइयै छुड़ाने !!

(ख) रौद्र रस

मांड्य मुनि गी राजे दे सपाही चोर समझियै राज दरबार च लेई जंदे न ते राजा उ'नेंगी फांसी दी सजा सुनांदा ऐ । मुनि इस बे-न्याई थमां क्रोधित होइयै राजे गी शराप देई दिंदे न । इस प्रसंग च रौद्र रस गी मसूसेआ जाई सकदा ऐ :-

क्रोधै दे अक्खीं बिच डारे ।

खड़काए धर्मे दे दुआरे ॥

x x x x x x

अज्ज सराप तुगी अ'ऊं दिन्नां

चुक्क टोकरी, लै कर बिन्नां ॥

x x x x x x

जा सुलझाऽ धर्मे दियां गंढां ।

न्यां ते बे न्याई दियां बंडां ॥

चुप्पी नेई ! दे उत्तर तूं ।

नितां बनी जा दासी पुत्तर तूं ॥

इस्सै चाल्ली भ्यानक, वात्सल्य, अद्भुत, शांत आदि रसें दी योजना बी इस महाकाव्य च थाहरै-थाहरै सिर त्रिष्टीगोचर होंदी ऐ । खीर च मुखसर तौरा पर एह गलाया जाई सकदा ऐ जे इस महाकाव्य दा भाव-पक्ख जिन्ना सशक्त ऐ उन्ना गै इसदा कला-पक्ख बी सशक्त ऐ ।

6.4 सारांश

इस पाठ गी पढ़ियै विद्यार्थिचयें गी डोगरी दे प्रसिद्ध महाकाव्य 'महात्मा विदुर' च कला पक्ख बारै जानकारी हासल होई सकग । इस पाठ च विद्यार्थिचयें गी रस-अंलकार दी बरतून कन्नै किस चाल्ली इस महाकाव्य गी लेखक ने खूबसूरत बनाए दा ऐ । इसदी बारै जानकारी हासल होई सकग । अंलकारे दी खूबसूरती कन्नै इस काव्य गी खूबसूरत बनाइयै जेहड़ा इस महाकाव्य च गुहाड़ पैदा कीते दा ऐ । उस बारै विद्यार्थिचयें गी सरोखड़ जानकारी हासल होई सकग ।

6.5 कठिन शब्द

- | | | |
|-----------------|-----------|------------|
| 1) काव्य | 2) आकाशक | 3) गुरुकुल |
| 4) स्भा-सुआत्म | 5) चफैरे | 6) गैई |
| 7) द्विश्टीगोचर | 8) मार्मक | 9) वीर |
| 10) करुणा | | |

6.6 अभ्यास आस्तै सौआल

खल्ल दित्ते दे सुआलें दे जबाव देओ :-

1. 'महात्मा विदुर' महाकाव्य दी कला-पक्ख दे अधार पर समीक्षा करो ?

.....

.....

.....

.....

.....

2. 'महात्मा विदुर' महाकाव्य दी रस योजन पर लेख लिखो ?

.....

.....

.....

.....

.....

3. अलंकार काव्य दी सुंदरता बधांदे न, 'महात्मा विदुर' महाकाव्य दे हवाले कन्नै इस कथन दी पुश्टी करो ?

.....

.....

.....

.....

.....

6.7 सहायक पुस्तकां

- (क) डोगरी सोध (अंक - 8) - पोस्ट ग्रेजुएट डोगरी डिपार्टमेंट, जम्मू यूनिवर्सिटी, जम्मू
- (ख) भारती काव्य-शास्त्र - डा. अर्चना केसर

.....0.....

M.A. DOGRI

Course No. 102

Unit - II

Semester - I

Lesson : 7

दीनू भाई पंत दा जीवन परिचे ते डोगरी साहित्य गी उंदा जोगदान

7.0 रुपरेखा

7.1 उद्देश्य

7.2 पाठ-परिचे

7.3 पाठ-प्रक्रिया

7.3.1 दीनू भाई पंत दा जीवन-परिचे ते डोगरी साहित्य गी उंदा जोगदान

7.3.2 कवि दीनू भाई पंत ते डोगरी साहित्य गी उंदा जोगदान

7.3.3 दीनू भाई पन्त हुन्दे डोगरी साहित्य दा मूल्यांकन

7.1 उद्देश्य

इस यूनिट दे पाठें गी पढ़ने परैन्त विद्यार्थियें गी अपने पाठ्य-क्रम (सेलेबस) च लग्गे दे डोगरी कवि दीनू भाई पंत दे जीवन परिचे ते डोगरी साहित्य गी उं'दे योगदान दे बारे च सरोखड़ जानकारी होई सकग। इसदे इलावा विद्यार्थियें गी पाठ्य-क्रम च लग्गे दे 'बीर-गुलाब' खण्ड -काव्य बारै विस्तृत जानकारी थोई सकग। विद्यार्थी जित्थें इक बक्खी दीनू भाई पन्त हुदें जीवन ते उं'दी साहित्य सिरजना सरबन्धी सुआलें दे उतर देने च योग्यता हासल करी सकडन उत्थै गै दुई बक्खी उं'दे च 'वीर-गुलाब' काव्य दा मूल्यांकन करने दी बी समर्था पैदा होग।

7.2 पाठ परिचे

इस यूनिट च त्रै पाठ न । पैहले पाठ च दीनू भाई पंत हुदे व्यक्तित्व ते कृतित्व सरबंधी लोडचदी जानकारी दिती गेदी ऐ। दुए पाठ च दीनू भाई पंत हुंदा कविता साहित्य गी योगदान बारै विस्तृत जानकारी ऐ ते त्रिये पाठ च 'बीर गुलाब' काव्य दा मूल्यांकन कीता गेदा ऐ।

7.3 पाठ प्रक्रिया

इस यूनिट दे सभनें त्र'ऊं पाठें च:-

- i) दीनू भाई पंत दा जीवन परिचे ते रचना -प्रक्रिया।
- ii) दीनू भाई पंत दे कविता -साहित्य दा मूल्यांकन
- iii) 'वीर गुलाब' काव्य दा मूल्यांकन

Life and works of Dinu Bhai Pant Paper (Khand- Kavya)

7.3.1 दीनू भाई पंत दा जीवन-परिचे ते डोगरी साहित्य गी उं'दा जोगदान

उद्देश्य

इस पाठ गी पढियै विद्यार्थियें गी डोगरी दे सिरमौर कवि श्री दीनू भाई पंत हुन्दे जीवन-परिचे ते डोगरी साहित्य गी उं'दे नमुल्ले योगदान बारै विस्तृत जानकारी हासल होग ते उं'दे व्यक्तित्व ते कृतित्व दे बारे च विद्यार्थी कुसै बी किस्मा दे सुआलें दे उत्तर देने च समर्थ होडन।

पाठ-परिचे

इस पाठ च श्री दीनू भाई पंत हुंदे व्यक्तित्व ते कृतित्व सरबंधी कम्मा च उं'दे कविता साहित्य गी छोडियै उं'दे नाटक ते होरनें कम्में बारै जानकारी दिती गेदी ऐ कविता साहित्य च उं'दे योगदान दी जानकारी अगले पाठ च विसतार पूर्वक दिती गेदी ऐ।

पाठ-प्रक्रिया

श्री दीनू भाई पंत ते डोगरी साहित्य गी उं'दा जोगदान।

- (i) श्री दीनू भाई पंत दा जीवन-परिचें ।
- (ii) श्री दीनूभाई पंत दियां रचना।
- (iii) श्री दीनू भाई पंत दे डोगरी साहित्य दा मूल्यांकन।

7.3.2 कवि दीनू भाई पंत ते डोगरी साहित्य गी उं'दा जोगदान

1. जीवन-परिचे

आधुनिक डोगरी कविता गी नमां, प्रगतिवादी मोड़ देने आहले कवि दीनू भाई पंत डुगगर दे लोकप्रिय कवि मनै जंदे न। इं'दा जन्म 11 मेई 1917 ई0 गी उधमपुर जिले दे पैथल ग्रां च होआ। अपने जीवन दे मुंढले ब'रे इ'नें तंगी-तुर्शा ते कौड़े कसैले अनुभवं दी छतरछाया च कटे तीसरी जमाता तगर दी पढाई अपने ग्रां च गै कीती फही अगली पढाई आस्तै रियासी भैनू कश उठी गे। इं'दी चौहदें ब'रें दी बरेसू च इं'दी माता जी दा काल होई गेआ ते रियासी दा पढाई छोड़ियै घर वापस औना पेआ ते घरेलू जिम्मेदारियें गी सांभना पेआ । फही खासै चिरै बाद इ'नें संस्कृत च प्राज्ञ दी परीक्षा पास कीती ते 1939 च हिन्दी भूषण ते 1941 च प्रभाकर दियां परीक्षा बी पास करी लेइयां।

एह साम्यवादी विचारधारा दे व्यक्ति हे इसकरी इं'दे अन्दर हक-हकूक ते अजादी गी हासल करने दी विचारधारा बड़ी मुखरत रेही। 1942-43 च हिन्दी साहित्य मंडल दी स्थापना ते 1944 च डोगरी संस्था दी स्थापना सरबधी गतिविधियें च इ'नें बधी चढियै हिस्सा लैता ते राष्ट्री भाशा दे कन्नै-कन्नै मातृभाशा दे गौरव गी बी पन्छानेआ। शुरु-शुरु च हिन्दी कविता गी बी बड़ा योगदान दिता । 'युग चला' 'कौन तुम' 'शहीद की अर्थो' बगैरा इ'दियां प्रसिद्ध हिन्दी कविता न।

इ'नें जिस बैल्लै डोगरी च कविता लिखना शुरु कीती उस बैल्लै रियासत दे सियासी हल्कें च बड़ी तनो-तनी ते खौदधल दा वातावरण हा। भलोकी जनता सामन्ती शासन दियें मुजरमाना लापरवाहियें दा शकार होने कारण अपने बुनियादी हकूकें दा तसव्वुर करने च बी कासर ही। ढिड़डै पर भुक्खै दी पट्टी ब'न्नियै, तनै पर गरीबी दी चादर पलेटिये, बेखबरी ते अंधविश्वासें दे कोदू च सिर छपैलियै साहें दी तन्दै कन्नै लटकी दी ही जे दीनू भाई पन्त ने मौके दी नजाकत समझदे होई अपने सरल अंदाज च अवाम गी चुप्पी ते बेखबरी दी नींदर त्यागनें लेई चौकस गै नेई कीता बल्के इ'नें बे-न्याइयें , बेपरवाहियें दे खलाफ बगवती सुर बझालने लेई प्रेरत कीता, उकसाया। इं'दे जीवन दा रोजगारी पक्ख बड़ा संघर्षपूर्ण रेहा। शुरु -शुरु च टेवे -टीपां बनाने, ट्यूशनां पढाने, प्राइवेट स्कूलें च नौकरी, सम्पादन दे लौहके -मुटटे कम्म, रेडियो स्टेशन जम्मू च सक्रिप्टराइटर बगैरा दी नौकरी करनी पेई ते फही पक्के तौरा पर 'परतियै बसाओ' मैहकमें च मुलाजमत मिली। अपनी दयानतदारी ते कर्मठता दे गै फलसरूप एह डिप्टी प्राविशियल ऑफिसर बने पर इत्थूं दा सेवा निवृत्त होने परैन्त इं'दा स्वास्थ ढिल्ला जन रौहन लगा। इक-दौ बारी दिलै दा दौरा बी पेआ। ब, 23 मार्च 1992 ई0 गी पौने आहला दिलै दा दौरा इ'नेंगी म्हेशां लेई साढ़े शा खंडाई गेआ।

रचनां :- जित्थूं तगर पन्त हुंदे कृतित्व दा सरबंध ऐ । इं'दा व्यक्तित्व ते इं'दा कृतित्व दोए इक-दूए दे पूरक लभदे न। जि'नेंगी इक-दूए कशा बक्ख करियै कोई बी तस्वीर पूरी नेई उब्बरी सकदी । जे किश सोचेआ -धोरआ तेरे अमल च आंहदा उससै गी कलम राहें व्यक्त कीता ते वाणी राहें वुहास्सरोआ डोगरी च दीनू भाई पन्त होरें कविता नाटक ते अनुवाद दे खेतारा च अपना नुमायां योगदान दिते दा ऐ। 'गुत्तलू

‘मंगू दी छवील ‘वीर गुलाब’ ते ‘दादी ते मां’ एह चार काव्य रचनां न। संस्कृत दे प्रसिद्ध नाटककार भास दे प्रतिमा नाटक दा डोगरी अनुवाद बी दीनू भाई पन्त होरें कीते दा ऐ। इसदे इलाबा ‘मधुकण’ नांऽ दी काव्य-पोथी दा सम्पादन ते किश -इक एकांकी नाटकें दी रचना दा श्रेय बी पन्त होरें गी जंदा ऐ।

7.3.3 दीनू भाई पन्त हुन्दे डोगरी साहित्य दा मूल्यांकन

दीनू भाई पन्त डुग्गर दे सच्चे जन कवि हे जिंनें जनसाधारण दी गल्ल उं दी गै भाशा च आखिये डोगरी कविता गी जन-जन तगर पजाने दी सराहने जोग भूमिका नभाई। उत्थे गै नाटककार दे रुपा च बी उं दा चेचा थाहर ऐ। डोगरी दा पैहला नाटक जेहड़ा छपिये सामने आया ते जेहदे करी डोगरी रंगमंच दी लीह पेई ओह ‘नमां ग्रां’ जिसगी सर्वश्री रामनाथ शास्त्री, दीनू भाई पन्त ते राम कुमार अबरोल होरें सांझे तौरा पर लिखेआ। एह नाटक 1957 बरे च छपेआ ते केई बारी जम्मू शहर ते इसदे आले-दुआले दे ग्राएं च खेदेआ गेआ ते सराहेआ गेआ। ‘नमां ग्रा’ इक प्रतीकात्मक नांऽ ऐ उस नरोए समाज दा, जेहड़ा ऊच-नीच, छूहत छत, समाजी नाबरोबरी, शोशन, भ्रष्टाचार ते अज्ञानता दिये जंजीरें थमां मुक्त होऐ ते जेहड़ा अपने बसनीकें गी सुखा दा साह लैन देऐ ते होने जीने ते अगड़े बधने दी बता पर टुरने लेई उं दे च नमां उद्दम ते हौसला भरै। दरअसल अजादी परैन्त समूलचें भारत च नमी चेतना ते जन जागरण दी लैहर चला करदी ही ते उससे नरोए जज्बे दा जोश इनें नाटककारें दे अन्दर बी छुआले लै करदा हा। इस नाटक दी रचना पिच्छें बी इं दा इयै उदेश्य हा जे डुग्गर दे ग्राई समाज च फैली दिये कबैहतें बारै अवाम गी जागरुक कीता जा ते उं दा बरोध करिये इक साफ शफाफ समाज दी स्थापना बारै चेतना जगाई जा। पज्जे अंके पर अधारत इस नाटक दा कथानक शुरु, मझौटै ते खीर त्रौनें अवस्थाएं च पूरी चाल्ली विकास ते गठोए दा ऐ की जे शुरु थमां खीरा तगर नाटक च गति बनी रौहदी ऐ। जिस कारण उत्सुकता बी बरोबर बनी दी रौहदी ऐ।

1966 च प्रकाशत नाटक ‘सरपंच’ नांऽ सिर्फ दीनू भाई पन्त हुन्दी बेहतरीन नाटकी रचना ऐ बल्के समूलचे डोगरी नाटक साहित्य दी इक उत्कृष्ट ते अमर रचना ऐ। इस नाटक दा कथानक डुग्गर दे प्रसिद्ध लोकनायक ‘दाता रणपत’ दी कारक उप्पर अधारत ऐ।

इस नाटक दी रचना पिच्छें पंचायती राज दी स्थापना ते उसगी बल देने दी भावना प्रधान सेही होंदी ऐ। पर नाटककार दी सूसबूझ ते उसदी कलाकारी दा कमाल ऐ जे उनें नाटक दा अधार उस घटना गी बनाया जिसदी छाप डुग्गर दे जन जन दे अन्तस उप्पर अपना अनमित असर छोड़ी गई दी ही ते उप्परा नेही किरदार -नगारी जिसदा हर रूप ते हर अदा दर्शकें गी बन्नी गै नेई रखदी सगुआं मनोरजन दे कन्ने कन्ने उत्सुकता दी भुक्ख जगांदी जंदी ऐ।

पन्त हुंदा इक होर सपूरा नाटक ‘अयोध्या’ रामायण दी कथावस्तु पर अधारत होंदे होई बी आधुनिक जीवन दिये कदरें दा इक सशक्त प्रमाण ऐ। एह नाटक 1984 बरे च छपेआ ते 1985 बरे च इसगी साहित्य अकादमी पुरस्कार कन्ने समानेआ गेआ। 95 सफें दा एह नाटक पज्जे दक्खें च बडोए दा ऐ ते इक सैट पर खेदेआ जाई सकदा ऐ। समूलचें नाटक दा घटना स्थल राजा राम दी जन्म-भूमि अयोध्या

कन्नै सरबंघत ऐ इस करी इसदा नां 'अयोध्या' रक्खेआ गेआ ऐ। कथानक दी सीर बशक्क भामें पौरणिक काव्य रामायण दे कथासूत्र थमां बगाई गेदी ऐ पर इस च इक बक्खरापन ते नमां द्रिष्टीकोण ऐ। पन्त होरें आधुनिक सोच ते विज्ञानी परिवेश दी सार समसदे होई रामायणी काल दी परानी ते बोसीदा समाजी कदरें दी लीक कशा हटियै अपनी कुशल सिरजना- शक्ति कन्नै मौलिकता दा रंग भरने दा प्रयास कीते दा ऐ।

ककेई दे संदर्भ च परम्परा कशा बक्खरी धारणा गी कायम करने आह्ला एह इक सरोखड़ नाटक ऐ जिसदा साहित्यक द्रिष्टी कन्नै महत्वपूर्ण थाहर ऐ जेहड़ा पाठकें गी केई परानियें लीकें दे तार्किक जवाज दसदा ऐ ते अगाड़ी सोच दे दरवाजे खोहलदा ऐ।

'संस्कृत नाटककार भास हुंदे आसेआ रचे गेदे 'प्रतिमा' नाटक दा डोगरी अनुवाद बी पन्त होरें डोगरी भाशा दे सैहज प्रवाह च कीते दा ऐ ते उस च बी ककेई दा किरदार बेगुनाह साबत कीता गेदा ऐ। खबरै अयोध्या दी रचना च पन्त होरें गी उससै भावना दी प्रेरणा रेही होऐ।

'मलाटी' नांS दा एकांकी जेहड़ा अकैडमी पासेआ प्रकाशत 'डोगरी एकांकी' नां दी पोथी च छपें दा ऐ, ऐतिहासिक एकोकियें दी जमाता च रक्खेआ जाई सकदा ऐ। इस च मियां डीडो दी ब्हादरी दे किस्से दा वर्णन ऐ। एकांकी दी भाशा वजनदार ऐ ते इस च वीर रस दी गुहड़ी छाप ऐ। दीनू भाई पन्त होरें जित्थै डोगरी कविता गी जन-जन दे हिरदे च बसादे होई आधुनिक कविता दी धारा गी मुसलसल रवान्नी दिती उत्थें सरल-सभाऊ जनता आस्तै चित्त छूहने नाटक सिरजियै रंगमंच दी परम्परा गी बी ठोस धरातल प्रदान कीता।

7.4 सारांश

इस पाठ गी पढ़ियै विद्यार्थियें गी डोगरी दे मन्ने-परमन्ने दे साहित्यकार कवि-लेखक दीनूभाई पंत हुंदे साहित्यक जोगदान बारै जानकारी हासल होई सकग। दीनूभाइ पंत हुंदा डोगरी साहित्य च चेचा थाहर ऐ ते उंदा साहित्य डोगरी भाषा दी गैह गी अगड़ें बधांदा रेहा ऐ। अपने जीवन च केई चाल्ली दियें कठिनायिई ते मुश्कलातें कन्नै निभड़दे होई उंदा जीवन वशवक अस्त-व्यस्त रेहा पर वही बी उंनें डोगरी भाषा ते साहित्य आस्तै अपना अनमुल्ला जोगदान दिता। दीनू भाई पंत हुंदिया सारियां रचना डोगरी साहित्य दियां सरोखड़ रचना न।

7.5 कठिन शब्द

- | | | |
|------------|--------------------------|---------------|
| 1) नमुल्ले | 2) व्यक्तित्व ते कृतित्व | 3) प्रगतिवादी |
| 4) मुढंले | 5) घरेलू | 6) तनो-तनी |
| 7) खौहल | 8) सक्रिप्टराईटर | 9) बुहास्सरेआ |

- 10) जागरूक 11) नरोए 12) अनमिट
13) ऐतिहासिक

7.6 अभ्यास आस्तै सोआल

1) दीनूभाई पंत हुंदा जीवन परिचे लिखां।

.....
.....
.....
.....
.....

2) दीनू भाई पंत हुंदियां रचना बारै जानकारी देओ।

.....
.....
.....
.....
.....

3) दीनू भाई पंत हुंदे डोगरी साहित्य दा मूल्यांकन करो।

.....
.....
.....
.....

4) दीनू भाई पंत हुंदी रचना सटपंच दा सार अपनै शब्दें च लिखो

7.7 सहायक पुस्तका

डोगरी साहित्य दा इतिहास : डॉ. जितेन्द्र उधमपुरी

डोगरी साहित्य दा इतिहास : शिवनाथ

साढ़े साहित्यकार भाग-1 : वीणा गुप्ता

.....0.....

M.A. DOGRI

Course No. 102

Unit - II

Semester - I

Lesson : 8

डोगरी कविता साहित्य गी दीनू भाई पंत दा जोगदान

8.0 रूपरेखा

8.1 उद्देश्य

8.2 पाठ-परि

8.3 पाठ-प्रक्रिया

8.3.1 डोगरी कविता साहित्य गी दीनू भाई पंत दा योगदान

8.4 सारांश

8.5 कठिन शब्द

8.6 अभ्यास आस्तै सोआल

8.7 सहायक पुस्तकां

8.1 उद्देश्य

इस पाठ गी पढिये विद्यार्थिये गी डोगरी दे सिरमौर कवि श्री दीनू भाई पंत हुंदे डोगरी कविता-साहित्य गी उंदे नमुल्ले योगदान बारै विस्तृत जानकारी हासल होग ते इंदे कविता साहित्य बारै च विद्यार्थी कुसै बी किस्मा दे सुआले दे उत्तर देने च समर्थ होउन।

8.2 पाठ-परिचे

इस पाठ च श्री दीनू भाई पंत हुंदे कविता-साहित्य गी योगदान सरबन्धी लोडचदी जानकारी दित्ती गेदी ऐ। उं'दे खंड काव्य बीर गुलाब दी जानकारी अगले पाठ च दित्ती गेदी ऐ

8.3 पाठ-प्रक्रिया

8.3.1 डोगरी कविता साहित्य गी दीनू भाई पंत दा योगदान

(i) गुत्तलू

इस गल्ला च दो राऽ नेई जे दीनू भाई पन्त होरें पंड हरदत शास्त्री हुंदे कशा प्रभावत होइयै लिखना शुरु कीता पर पही बी इ'दी कविता आधुनिक डोगरी कविता गी प्रगतिशील मोड़ देने च नींह -पत्थर दी भूमिका नभांदी ऐ। दीनू भाई पन्त हुंदी कविता उं'दी सूझबूझ समझों जां उं'दा सुआतम समें दी दुखलदी रग थ'मदे होई जन जन दे हिरदे च जाई बस्सी, छूहत-छात ते ऊच-नीच दी भावना, बरादरीवाद, सरकारी बगरां, शाहें-बजियें दियां मनमानियां ते रावणी कारस्तानियां धर्म दे नांऽ उप्पर फ़ैले दे झूठे आडम्बर ते बेसीदा खोखलें रस्मो-रवाज जनेहियें सियासी ते समाजी बुराइयें अम्बर सिरा पर चुक्के दा हा। समें दा तकाजा हा जे इ'नें बुराइयें दे खलाफ बगावती मुहिम चलाने आस्तै लोकें गी सोहगा कीता जा ते उं'दे अंदर अपने हक्के-हकूकें दी तलब जगाई जा। पन्त हुन्दी उस बेल्ले दी कविता च क्रान्तिकारी सुर बड़ा मुखरत हा।

सत्तें कविताएं दा संग्रैह 'गुत्तलू' जेहड़ा 1948 ब'रे च प्रकाशित होआ उस च प्रकाशत, 'मरने कोला बी मन्दा लोको जीना इस गुलामी दा' कविता लोकें गी गुलामी, बे -खबरी, शोशन ते अत्याचारें दी इस जुल्मी कैद दियां सौंगलां त्रोटिये अजाद वातावरण च साह लैने आस्तै प्रेरत गै नेई उत्तेजत बी करदी ऐ।

“जिसने कदें बुआल निं खाद्धा,
ध्रिग-ध्रिग उस जवानी दा
चौरै-पैहर सिरै पर खड़कै
कुंड़ा साहब सलामी दा
मरने कोला बी मन्दा लोको
जीना इस गुलामी दा”

इस चाल्ली 'उटठ मजुरा जाग करसाना तेरा बेला आया ओ' कविता राहें बी कम्म करने आहले मेहनतकश कसानें ते मजूरें गी अपने हक-ल्हाल दा फल हासल करने आस्तै संघर्ष करने दा

साददा गै नेई दित्ता, बल्के परमेसर, अल्ला मियां ते सुर्ग-नर्क दा फढ़ बनाइयै टंग्गी दा जाल बछाने आहले पन्तें ते मुल्लें कशा बी चौकस कीता।

“तेरे खून पसीने कन्ने र्हामी ऐश मनांदे ओ
अल्ला मियां भला करेगा तैकी भुट्ट बनांदे ओ
सुरग नरक दे सुखाने दस्सी तेरा मन परचाया ओ
उट्ट मजूरा जाग करसाना तेरा बेला आया ओ”

“गुत्तलू” पोथी दा देवनागरी ते फारसी दौनें लिपियें च ज्हारें दी तदाद च प्रकाशन होआ इत्थूं तगर जे पंजाबी भाशा च बी इसदा तर्जमा कीता गेआ। इस च प्रकाशित “शैहर पैहलो पैहल गे ” नांऽ दी लम्मी कविता ग्राई ते शैहरी जीवन दी नशानदेही करने आहली कविता ऐ। कवि दी मुखर ते त्रिकखी अभिव्यक्ति दिक्खियै लगदा ऐ जे अश्कें ‘तेजां’ दी अनुभूति दा भागीदार ओह् आपूं ऐ। कविता दे मुंढले बोल गै इन्ने सादें ते निग्गर पकड़ आहले न, जे पौनपट्ट पाठक दा ध्यान अपनी बक्खी खिच्ची लैंदे न

“तुकी गल्ल केह् सनानी
अरुं किश मुंढा दा गै र्हामी
घर कम्म हा बत्हेरा
सारे सिर खान मेरा
कुदै गोडी कुदै घाऽ
कुदै कनक मक्कां राह्
कुदै बाह् कुदै डाह्
जिंद फसी गई फाह्”

एह कवता लखोने दे किछ समें च गै डुग्गर दी हर नुक्करा जाई पुज्जी , जिसनै लोकें दी जीभें ते मनें पर कब्जा करी लेआ ते लोकें गी अपने अन्दर झांकी मारने लेई मजबूर कीता। अपने पर आपूं हस्सने दी प्रवृति गै कुसै स्वस्थ समाज दी अलामत हुदी ऐ। “शैहरे पैहलो-पैहल गे, नै एह कम्म कीता हा। एह कविता पढ़े-लिखे ते अनपढ़ सभनें दी जीहबा चढ़ी दी ही। इस कविता दी सादगी गै इसदा सारें शा बड़डा गुण ऐ। इक ग्राई दे शैहरी चकाचौंध च भरमोई जानें दा वर्णन सरल-सादी, मुहावरें -खुआनें आहली भाशा च ते उप्परा पुल्ले मुहां गल्ल आखने दे हासैं -व्यंग पूर्ण अन्दाज च होए दा ऐ:-

“तेजां चट्टै पुट्टी त्रट्टी बड़ेआ कपड़े दी हट्टी
जित्थै अन्दर बाहर नेह् मीम मिट्टिया दी रक्खी
भलेआं सच्चे मुच्चे लब्भन नुहाड़े नक्क-मुंह् अक्खी

बिट-बिट डेहले ओह मलकाऽ कन्नै सारतां कराऽ
तेजां कोल जाई खड़ोता पुच्छै कपड़े दा भाऽ
अन्दरा आया इक मनीम, आखै मितिया दी मीम
ओह किश हसदी-हसदी लभै, मिकी होऐ निं जकीन
तेजां हत्थें छूहती आपूं अहें सच्च गलांदा एह
शैहर पैहलो -पैहल गे।

‘चाचे दूनी चन्दै दा ब्याह’ बे-मेल ब्याह दी समाजी कुरीत दा बरोध करने आहली कविता
ऐ ते नेह बुढखरें पर व्यंग ऐ जि’दे मुंह च दन्द नेई सिरै पर बाल नेई अक्खी लभदा नेई, शरीर
तुल्ले दा हड्डियें दा पिंजर ते ब्याह दा चाऽ।

“कुड़ियें दिक्खेआ लौहड़ा दूनी चंद
दिक्खियै सब्भनीं गी पेई गई ठण्ड
आपूं बिच्चें गल्लां करदियां सब्ब
लौहड़ा कुत्थें एह तां लौहड़े दा बब्ब
रूपां ने राजां गी दित्ती ऐ ठेह
धी ब्याहने गी आया ई एह
फिटटे मूह इस मोए बुढखरे चौहरे दा
मूह दिक्खो जि’यां बटुआ दरहोड़े दा”

दीनू भाई पंत दी कविता ने नौतोड़ मैहनत करने आहले जुआनें ते करसानें गी रजबाड़ा शाही
दे अत्याचारें, खलाफ जाग्रत गै नेई कीता बल्के अपना हक खूसने आस्तै हल्ला बोलन दी हद्दा तगर
प्रेरत कीता। दोहरी-त्रेहरी गुलामी कशा छुटकारा कराने गित्तै चनेहनी दे राजे दे खलाफ “हिजरती जत्थे”
दी नुमांयदगी छड़ी शमूलियत कन्नै गै नेई कीती संगुआं उस दर्दनाक स्थिति गी अपने गीतें राहें ऐसी
वाणी दित्ती जे सारा वातावरण बी रोई उट्टेआ :-

तूएं जी जालमा अस दूर चले
सोहना देस तज्जी घर-बाहर तज्जी
पिच्छें निक्का -निक्का परिवार तज्जी
तुद जुलम कीते मजबूर चले
तूएं जी जालमा अस दूर चले

इस्सै चाल्ली “लोके मीहनै मारदे डोगरें दा राज ऐ, डोगरें दा हाल मंदा जुड़दा नि साग ऐ,
गीत बी जनता-जनार्दन गी अपनी बदहाली दा ते हाकमें सरपरस्ते गी अपने अत्याचारें दा अहसास दुआने
आहली सिदी बगाबत ही।

(ii) "मंगू दी छबील" नां दी 124 एं बंदें दी लम्मी कवता 1945 च छपी। एह कविता बी पन्त हुंदे इन्कलाबी बचारें दा गै बुआल ही, जिस च शाहें ते सामियें दे रुपा च सरमायादारें ते दलित गरीबें बश्कार जीवन –मुल्लें दी झूंङगी खाई गी गुहाड़ेआ गेदा ऐ।

कवि दे उतेजना भरोचे भावें दी शिददत इ'नें बंदें च किन्नी मुखरत ऐ:-

धार्मियों पंडतो मुल्लेओ आओ।
 पोथियां खोहलो ते धर्म सनाओ॥
 इ'यै नेह जुल्म सै'हदे करुर।
 दस्सो गरीबें दा कोई कसूर॥
 इक नेई इ'यै नेह लक्खां अनजान।
 भुक्खे मरदे दर-दर टोकरां खान॥
 गुंडे लुच्चे चक्के चौधरां पान।
 दुखियें दा मरी गेआ भगवान॥

इस कविता च सोहनू सरदालिये (शाह) ते नत्थू मनकोटियें (सामी) दी पीढी कशा लेइयै उ'दे दौनें दे पोतरें दी पीढी तगर गरीबी ते मीरी दा टाकरा चलदा रौहदा ऐ। मंगू दे दादे आसेआ लैते दा सौ रपेऽ दा दुहार नेई मुकदा तां मंगू दे बापू गी बगारां कारनियां ते मारां द्रंङा खानियां पौंदियां न इत्थूं तगर जे आपूं जेहला च प्राण त्यागने पौंदे न ते अपने कालजे दे टुकड़े मंगू गी हत्था दा मुहाना पौदा ऐ। मंगू दे अन्दर दादे दे जमाने कशा अपने बेल्ले तगर होए दे जुल्में –अत्याचारें दे बिद्रोह दा भांबड़ मची पौंदा ऐ ते ओह शहुकारें दे घरै गी अगग लाइयै आपू छपन होई जंदा ऐ। एह कविता बड़ी उतेजत भावना आहली ऐ। विद्रोही सुआतम, बदले दा लावा बल्लें-बल्लें अंदर पालदा रौहदा ऐ, जिसदा पता यकदम इन्तहाऽ पर पुज्जनं पर गै लगदा ऐ। दरअसल दीनू भाई पंत होरें अपने जीवन च इ'यै जनेह रावणी शहुकारें दे हत्थें केई भलोके गरीबें दी रत्त नचोड़दी दिक्खी दी ही जिसगी उसदा कवि हिरदे बरदाशत नेई करी सकेआ ते इकदम अगग-बबूले होइयै विद्रोही अमल गी उस हद्दें तगर पजाया, जिसदा आम पाठक लाना बी नेई लाई सकदा। कविता दी भाशा बड़ी रोचक, प्रवाहपूर्ण ते सादा उपमाएं कन्नै कथा –सूतर गी गति प्रदान करने आहली ऐ:-

दुखें भरी सूंक निकली ओहदी।
 शाहें ते सामियां भित्तरी कोहदी॥
 बिल्ली जद चूहें गी साथी बनाऽ॥
 समझना हुन नेई ओहदा बचाऽ॥

(iii) वीर गुलाब

इस खंड काव्य दा जिकर विस्तारपूर्वक अगले पाठ च कीता जाग।

(iv) दादी तें मां

पन्त हुंदी चौथी रचना 'दादी ते मां' नांS दा कविता संग्रह 1956 च छपेआ। इस संग्रह च प्रकाशत कविताएं च पन्त होरें जन-सधारण दिरें समस्याएं गी जन-साधारण दी भाशा च चित्रत करियें समाज च प्रगतिवादी परिवर्तन आहने दी जरुरत बुज्जी दी ऐ। 'इधर हो' जां उद्धर हो, कविता च उ'नें उप्परा सफेदपोश पर अन्दरा फिकरें दे मारे दे खस्तहाल लोकें दी दशा पर बड़े मार्मक ढंगा ने व्यंग कीते दा ऐ। समाज दा दरम्माना तबका म्हेशां गै लोक लाज ते लोकाचार रुपी चक्की दे पुडें मझाटै दलोंदा -प्लोंदा मन्दे हालें दिन काटी करदा ऐ, पर उप्परा रोंदा -बुहासरदा नेई । समाज दे इस तबके च दफतरें दे बाबू, बपारियें दे नौकर, कचैरियें दे मुनशी लौहके दुकानदार, मास्टर, मनीम, क्हीम, कर्लक आदि सभनें गी कवि अपील करदा ऐ जे ओह इस बेहल्लड़खोर नजामै गी बदली देन की जे इस चाल्ली मेहनतकश लोक म्हेशां दुक्खें दे रेजे गै बुनदे रौहडग ते सुख उ'दें भागें शा डरदा-नसदा रौहग। " कम्म कराS ते रूट्दी दे", कविता बी मेहनतकशें ते मजूरें आसेआ हुकमरान तबके अगगें कीती गेदी मंग ऐ। कवि दे आखने दा ढंग बड़ा तर्क पूर्ण ते मनासब ऐ ते लैहजा बी बड़ा सभावक :

"छड़ा जीने दा हक मंगने आं झगड़ा नेई बाफर खु'ल्ली दा सम्यान करी दे बिन्द सारा, कुल्ली, जुल्ली ते चु'ल्ली दा लेखा टब्बरै दा लाई लै तूं भाएं रुक्खी सुक्कम सुक्की दे तूं कम्म कराS ते रूट्दी दे"

"कैहदी बसन्त ते कोहदी बसन्त " कविता च बी कवि ने बिन्द सारी उपलब्धि पर सन्तुष्ट होइयै बेही रौहने आहलें गी सोहगा कीता ऐ:-

"कैहदी बसन्त ते कोहदी बसन्त
दुक्खें दा अन्त नां भुक्खें दा अन्त
होग सरमायादारें दी होग
जां इ'नें हटिया बालें दी होग
साहबें दी होग जां मीमें दी होग
उन्दियें शैल स्कीमें दी होग
अजें निं आई दी साढी बसन्त
कैहदी बसन्त ते कोहदी बसन्त"

‘अड़ब बेहड़ा’ कविता च कवि इस्सै नतीजे पर पुजदा ऐ जे जनता दी बदहली दा मूल कारण समाज दी पूंजीवादी आर्थिक व्यवस्था ऐ, जिस च पूंजीवादी लोक मैहनती गरीबें दे लहु—परसे पर ऐश करा करदे न। इस व्यवस्था गी बदलने दा सादा देना गै कवि दा मुख उद्देश ऐ, पर इस अड़ब बेहड़े गी काबू करने आस्तै लोकें च आपसी एके दी सख्त जरूरत ऐ, कीजे एह बेहड़ा बड़ा अड़ब ऐ, कुसै इक्कले शा काबू औने आहला नेई।

‘बड़ी जिन्द कडढनी ते बड़्हा मुंह मारना
इन्नै सुखें नेइयों रस्सा जुगड़े दा स्हारना
इक्कला निं हत्थ पायां साथियें गी सद्दी लै
मिली—जुली घेरा पाना डंडे सोटे कडढी लै

इस संग्रैह दियां कम्म करना ‘सिक्ख देसा’, ‘उट्ट ओ’ ते ‘मंजलै गी पुज्जना तां बिना रुके चली चल’ कवितां डोगरी कविता च प्रगतिवाद दी धारा दी नुमायंदगी करने आहलियां न। ‘दादी ते मां’ कविता मातृभाशा ते राष्ट्रभाशा गी अपो—अपना थाहर ते सम्मान प्रदान करने आहली कविता ऐ, जिस च हिन्दी गी दादी ते डोगरी गी माऊं दा दर्जा देइयै आपसी सरबधें दी डोरी च परोए दा ऐ:—

“हिन्दी ते डोगरी दा झगड़ा गै कैहदा
दादी ते माऊं दा मकाबला गै केहदा
हिन्दी साढ़ी दादी ऐ ते डोगरी सै मां
दादी थाहर दादी ऐ ते माऊ थाहर मां

‘गुजरी’ ते ‘खोहल मनै दी घुंडी नाजो’ एह दो कविता क्रान्तिकारी राँ कशा बिन्द बक्खरियां ते रोमांटिक कविता लभदियां न, ब ‘गुजरी’ इक दुद्ध बेचने आहली भोली —भाली ते बे—जोड़ शलैपे मूरत होइयै सिर्फ घरै दी गै सजावट नेई ते नां सुन्नै चादी दी मुहताज ऐ। बल्के जिन्द मारियै कम्म करने आहली रामायाणी काहरें गी लुआंधियै रावणें दी छाती पर गज्जने आहली आत्म— निर्भरता ते निडरता दी प्रतीक ऐ। दीनू भाई पन्त दी प्रगतिवादी सोच दा इस शा बधीक होर केह प्रमाण होई सकदा ऐ, ओह समाज जित्थै औरतें गी धरै दी गुलामी ते चार दवारी दे बाहर गै धरने दी जुर्त नेई ही पौंदी उत्थें कवि ने उसगी :-

“करी कमाइयां खदी लांदी
एह नेइयों सुन्ने दी बांदी
एह सीता नेइयें काहरें बझदी
रावण दी छाती पर गजदी”

आखियै उसदे ऐसे रुतबे दा तसव्वुर कीते दा ऐ, जेहड़ा अज्जै दे समाज गी बी पूरी चाल्ली गवारा नेई।

इस चाल्ली 'दादी ते मां' संग्रैह दिये कविताएं तगर दीनू भाई पन्त दी कविता च जित्थे पूंजीवादी समाज दे खलाफ विद्रोह जीवन दे दमाजडपने उप्पर ललकार, समाजी ते आर्थक फर्को-फर्की बरुद्ध बगावती सुर प्रधान हां उत्थे समे दी मुहार बदलोने पर बाद दी कविता च उं'दी सोच ते भावें च नुमाया तब्दीली आई । उ'ने कवि कलाकारें ते समूलची मनुक्ख जाति दे हत्थे दे करतब दा असर दिक्खेआ जिसदा बखान उ'ने अपनिये कविताएं च बखूबी कीता जीवन ते संसार बारै जो तत्थ तजरबा हासल कीता उसदा वर्णन बी उं'दी कविता च मुखरत होए बिना नेई रेहा।इसलेई दीनू भाई पन्त बारै एह आखना अतिशयोक्ति नेई होग जे दीनू भाई पन्त डुगगर दे सच्चे जन-कवि हे जि'ने जनसाधारण दी गल्ल उं'दी गै भाशा च आखियै डोगरी कविता गी जन-जन तगर पजाने दी सराहने जोग भूमिका नभाई।

8.4 सारांश

इस पाठ गी पढ़िये विद्यार्थिये गी दीनू भाई पंत हुंदा कविता साहित्य गी जोगदान बारै जानकारी हासल होई सकग। इस पाठ च विद्यार्थिये गी दीनूभाई पंत हुंदा डोगरी कविता गी जोगदान बारै तफसीली जानकारी हासल होई सकग। इस पाठ च पंत हुदिये कविता पोथिये गुतलूं ते चाचे दंनी चदै दा व्याह मंगू दी छबील वगैरा-बगैरा कविताएं बारै जानकारी हासल होई सकग। इसदे लावा वीर गुलाब खंड काव्य ते दादी तेमां कविता संग्रैह बारै सरोखड जानकारी हासल होई सकग। दीनूभाई पंत होरे डोगरी कविता गी नंमा मोड़ दित्ता। उने डोगरी दी हास्य-व्यंग कविता लिखिये डोगरी च जेहड़ा रंग बन्नेआ। ओह शायद गै कुर्से ने बन्नेआ होऐ।

8.5 कठिन शब्द

- | | | |
|--------------|-------------|-------------|
| 1) बरादरीवाद | 2) अम्बर | 3) तलब |
| 4) सोहगा | 5) सौंगला | 6) नशानदेही |
| 7) चकाचौंध | 8) पौनपट्टर | 9) भरमोई |
| 10) द्रंडां | 12) लैहजा | 13) जन-जन |

8.6 अभ्यास आस्तै सोआल

नोट:- हेठ दित्ते गेदे सुआले दे उत्तर लिखो

1. दीनू भाई पन्त होर इक प्रगतिवादी विचारधारा दे कवि हे। इस कथन दी पुष्टि उंदियै कविताएं दे हबाले कन्नै करो।

.....

.....

.....

.....

.....

2. डोगरी कविता साहित्य गी दीनू भाई पंत हुदे योगदान बारै खुल्लियै चर्चा करो।

.....

.....

.....

.....

.....

3. दीनू भाई पन्त होर डुग्गर से सच्चे जन –कवि हे, तुस इस गल्ला कन्नै कुत्थूं तगर सैहमत ओ। कविताएं दे हबाले कन्नै परता देओ।

.....

.....

.....

.....

.....

8.7 सहायक पुस्तकां

1. डोगरी साहित्य दा इतिहास लैखक जितेन्द्र उधमपुरी
2. डोगरी साहित्य दा इतिहास : शिवनाथ
3. साढे साहित्यकार भाग-1: वीणा गुप्ता

.....0.....

M.A. DOGRI

Course No. 102

Unit - II

Semester - I

Lesson : 9

'वीर गुलाब' खण्ड काव्य दा मूल्यांकन

9.0 रूपरेखा

9.1 उद्देश्य

9.2 पाठ परिचे

9.3 पाठ-प्रक्रिया

9.3.1 वीर-गुलाब खण्ड काव्य दा मूल्यांकन

9.3.2 गुलाब सिंह दा चरित्र वीर-गुलाब दे संदर्भ च।

9.3.3 हेठ दिते दे सुआलें दा परता देओ

9.1 उद्देश्य

इस पाठ (लैसन) च कोर्स च लग्गी दी कताब 'वीर-गुलाब' खण्ड काव्य बारै विस्तार पूर्वक चर्चा कीती जाह्ग। वीर-गुलाब दे इतिहासिक महत्त्व उप्पर लोऽ पादे होई इस काव्य दियें खुबियें ते म्हाराज गुलाब सिंह हुंदी बहादरी दे कारनामें बारै लोड़चादी जानकारी दिती जाह्ग। तां जे विद्यार्थी इस खण्ड -काव्य सरबन्धे गी कुसै बी चाल्ली दे सुआलें दा परता देने च समर्थ होन।

9.2 पाठ परिचे

इस पाठ च 'वीर गुलाब खण्ड' काव्य दा हर द्रिश्टी कन्ने मूल्यांकन कीता जाह्ग।

9.3 पाठ -प्रक्रिया

1. 'वीर-गुलाब' काव्य दा मूल्यांकन

- 2 'वीर-गुलाब' काव्य दा भाव ते कला दी द्रिष्टी कन्नै मूल्यांकन
3. गुलाब सिंह दे कारनामैं वीर गुलाब दे संदर्भ च

9.3.1 'वीर-गुलाब' खण्ड काव्य दा मूल्यांकन

i) वीर-गुलाब

दीनू भाई पन्त हुन्दा एह वीर रस प्रधान काव्य सन 1946 च छपेआ। डोगरें दी ईन, आन व्हादरी पर आधारत 44 सफें दा एह डोगरी दा पैहला खण्ड-काव्य ऐ। एहदे च जम्मू शैहरा दे गुमट दरवाजे ख'ल्लें सिक्खें ते डोगरें मझाटै होई दी इक दिनै दी लड़ाई , युद्ध कौशल ते जित्तै दा शैल वर्णन ऐ। एह घटनां सन् 1809 दी ऐ ते उस बेल्लै गुलाब सिंह दी उमर 15 बरें ही। काव्य दे पैहले हिस्से च सिक्खें दे हमले दा अलान ते न्हेरी तुफानी रात च मियां मोटा हुन्दे हुकम दा वर्णन ऐ। न्हेरी राती दे अंधी-झक्कड़ च बैरियें दा हमला सरकारी डाँडी फिरने ते लोकें गी हाँसला रक्खने ते देसा ताई भरी मिटने दी गल्ल होई दी ऐ।

“रात ही न्हेरी, ते बदल हे छाए,
जम्मूआ पर ज्हरां बैरी चढ़ी आए।
नेहियां डरौनियां रातीं पुकारी,
सुनो भई लोको एह डाँडी सरकारी।
जोरें –जोरें इक माहनू करलाया,
मियां मोटा जी दा हुकम सुनाया।
जम्मूआ दे सारे नगर नवासियें,
देश भक्तों दुखे-सुखे दे साथियो।
शेरें दे पुत्तरों हिम्मत नेई हारेओ,
सब कोई अपना आप सम्हालेओ।
मरदें देओ बच्चेओ, मत धबरायो,
अपने देसे दी लाज बचायो।”

दूए हिस्से च डोगरी जुआनें दा देसा दी रख्या ताई बाहर निकलना ते गुलाब सिंह दा घोड़े पर चढ़ी औने दा दृश्य ऐ अपने प्रदेश पर बनी आई दी मसीबत दा पता चलदे गै क्या बुद्धे क्या जवान सारे रलियै देसा दी इज्जत मान दी खातर लड़ने लेई तेआर होई जाने दा वर्णन सराहनेजोग ऐ।

“लाड़ियां खसमें गी पांदियां हार,
भैनां भराएं गी करन त्यार।

अपनी –अपनी ढाल–तलवार,
 फड़कदे मूँढे ते निकलदे बाहर।
 नमें –नमें गभरु ते बोके जवान,
 दौड़दे जंदे न बिच्च चगान।
 उमर दिक्खो कुल पंदरां साल,
 चेहरे उप्पर राजपूती जलाल।
 लाड़ें–लाड़ें सब्भे आखदे साहब,
 बनी आया अज्ज 'सिंह गुलाब'।
 होनहारें नेइयों सिक्खना पौंदा,
 कड़े दा मूंह त्रिक्खना होंदा।"

त्रिये भाग च गुमटा दे खल्ले तविया पार जंगलै च सिक्ख फौजें दे कैम्पा दा चित्रण ऐ ते उं'दे
 भैड़े कम्मं दे कन्नै–कन्नै उं'दा व्यक्तित्व बी उं'दं भैड़े कम्मं आंगर काला ऐ दा वर्णन मिलदा ऐ।

"डेरा लुआए दा त'बी दे पारें,
 धाडुएं जाल्लें बैरी सरदारें।
 कालियां दाढ़ियां चम्म बी काले,
 कालियां बरदियां कम्म बी काले।
 कालियां घोड़ियां काले सुआर,
 कालियें फौजे दे काले सरदार।"

चौथे हिस्से च मियां मोटे दे स्नेह डोगरा जुआनें दा 'जय दुर्गा' दे नारे लाई बाहर निकलने ते गुलाब
 सिंह दे दूई बारी सामनैऔने दा जिकर ऐ। पुरखें दी अपनी धरती दी रक्षा आस्तै डोगरें दा पक्का इरादा ते
 ललकार ऐ जिस च डुग्गर दे नां पर कलंक लोआने आहले डरपोके गी रणभूमि च नेई आने दा हुक्म ऐ।

"जिसी होऐ घरै –बाहरै दी कोह,
 जिसी होऐ संसारै दा मोह।
 जिन्दू दी तांहग प्राणे दी लोड़,
 मनै दी हबस मटाने दी थोड़।
 जिसी होऐ अजें जीने दा चाऽ,
 इस बेल्लै इत्थों दा मुड़ी जाऽ।
 डोगरे देसै गी लाज नेई ला,
 दब्बू डरौक कोई कन्नै नेई जाऽ।"

पजमें खण्डै, च गुप्प न्हरे च राती लै डोगरें पाससेआ सिक्खें पर घेरा पाने दा ते सिक्खें च इस अचानक हमले कारण अफरा-तफरी दा वर्णन ऐ।

“जम्मू बालें नाहरा जौरै दा लाया,
मारो-मारो सारा जाड़ करलाया।
पता नेइयों किन्नी फौज चढ़ी आई,
बैरी सैना सारी गई घबराई।
चौन्नें पासं पेआ मौती दा फंदा,
टक्करां मारदा बंदे गी बंदा।
कोई सनींदरा नरसा दा जंदा,
कच्छा छड़ा कोई द्रौड़ेआ नंगा।”

छमें च सिक्खें दी नाठ, उंदे कमाडर हुक्म सिंहै दे सिक्खें दै नां हुक्म देने ते बड़ड-कप्प ते चीकें-ललकारें च गुलाब सिंह दिएं धूडें ते मियां मोटा दी कमाना दा वर्णन ऐ गुलाब सिंह गी वीर अभिमन्यू दी संज्ञा देइयै उंदी युद्ध कौशलता दा बड़ा सजीव वर्णन ऐ ते कन्नै डोगरें दी हिम्मत ते दलेरी दा बी खूबसूरत वर्णन ऐ।

“डोगरे शेर मदानै दे चाढू,
सवै-सवै पर इक्कला भारु।
हुकमसिंह सरदार करलाया,
नसदे बैरी दा धीर बंधाया।
डोगरे देसै दा वीर अभिमन्यू,
दुश्मनें दे सीस खेढदा खिन्नु।
डोगरे देसा दी रीत पुरानी,
सिर देई जाना, पर हार नेई खानी।”

सत्तमें च गुलाबसिंह दी कमाल चतराई करी सिक्खें च नाठ पौने ते उंदे तोपखाने दी गोलाबारी दा, ते गुलाबसिंह द्वारा इस अवस्था च कमान सम्भालने दा जिकर ऐ मियां मोटा दा धबराई जाना ते गुलाब सिंह दा चतराई कन्नै कमान संभालना ते डीडो दी मदद कन्नै सपाइयें च परतियै जान फूकने दा वर्णन होए दा ऐ।

“छाई गोआ भौऽ ते उक्खड़े पैर।
नस्सी पेआ बैरी , आई गोआ कैहर।

उड़डी गई होश ओह गड़बड़ पेआ।
बैरी दियें छोनियां भगदड़ पेआ।”

“मियां मोटा आपू गे धबराई।
चुप्प भौचक्क होई गे सपाही।
कड़कदा बोल्लेआ डोगर ओह शेर।
त्रुट्टी पवो योद्धेओ! लाओं मत देर।
मरी जागे लाज देसा दी रक्खी।
जुल्म निं दिक्खगे अपनी अक्खीं।
आपू गुलाब ने थ'म्मी कमान।
वीरें बिच्च पेई गई बक्खरी जान।
डोगरी फौजा दा त्रुंढ कप्तान।
अगें-अगें दौड़ेआ डीडो जवान।”

ते अठमें खण्ड इच, दौं सौएं डोगरें दी मौती दा ते उं'दे सज्जी-खब्बी बक्खी खिंडने दे जिकर दे कन्नै-कन्नै इस अवस्था च गुलाब सिंह दा धीरज ते चतुराई कन्नै पेश औना ते फही अपनी कुटीनती कन्नै दुश्मन पर हमले दी तरकीब बनानी ते डीडो दी मददा कन्नै उं'दा सामना करना लभदा ऐ।

“सिद्धियें छात्तियें थमदे वार।
बोलदे देसा दी जै-जै कार।
ऐसी कोई मौती दी पेई पलट्ट।
दरुं सौ डोगरा मरी गेआ झट्ट।
दैसे दा कम्म ते कीमती जान।
इ'यां कैहसी कढचै मुखत पराण।
मरना लिखेआ साढ़े नसीब।
सोची असें लैती ऐ, इक्क तरकीब।
दस-बीह आदमी खब्बे बक्खी जाओ।
ढोल बजाओ ते दब्बी करलाओ।
डीडो जी सद्धी लैओ अपना दल।
अज्ज असें दस्सना अपना बल।
सुनेआ हुक्म ते उठी गे सारे।
अपने कम्मं ओह जुटी पे सारे।”

नौमें खण्ड इच उंदा तवी गी डक्किऐ, दुश्मन दी तोफें गी बेकार करने ते फी, सिक्खें पर हमला करिऐ उनेंगी बड़्डी टकाने ते हराने, कन्नै बचे-खुचें गी कैदी बनाने दा बखान ऐ। तवी नदी दा कालका रूप धारिऐ दुश्मनं गी पस्त करने च योगदान देना बड़ा प्रभावशाली ऐ।

“पलै बिच्च मुक्की गेआ बन्न ओ पक्का।
तवी बिच्च लग्गी गेआ बक्खरा डक्का।
फट्टेआ बदल ते त्रुट्टेआ बन्न।
हस्सेआ डोगरे देसा दा चन्न।
डोगरे देसा दी रक्ख परतक्ख।
कालका कूकदी दौड़ी ऐ पक्क।
रुद्धियां कुप्पियां डुब्बियां तोफां।
रुद्धियां जंदियां जींदियां लोथां।
निकले जो कोई बचे बचाए।
अट्ठ सौ सुरमें कैदी बनाए।
मुक्की गेआ जंग ते फटी गई पोह।
चढी गेआ दिन ते घटी गई तौह।
जन जन खुश दिन, विजय दा चंगा।
फर-फर झुल्लेआ केसरी झंडा।”

डोगरें दे इतिहास इच केई मसाला न जे अपनी ईन अनख रक्खने ते अजादी लेई प्राण देई ओड़ने, उंदा पुरानी रीत ऐ। डोगरे दी इस्सै बीरता दा वखान ते डोगरें दे युद्ध-कौशल दा जेहड़ा खुबसूरत वर्णन पंत होरें ‘बीर –गुलाब’ च कीते दा ऐ ओह सराहनेजोग ऐ ते काव्य कला दा इक उतकृष्ट नमूना ऐ।

ii) भाव ते कला दी द्रिष्टी कन्नै बीर-गुलाब काव्य दा मुल्यांकन

‘बीर-गुलाब’ खंड काव्य दे रूपा च इक उतकृष्ट काव्य-रचना ऐ जिसगी लोकें च एकता अजादी दी तांहग ते ब्हादरी दियां त्रुट्टियां तन्दां जोड़ने दे उद्देश कन्नै लिखेआ गेआ। इस काव्य दी रचना दे बेल्लै पंत हुदे अन्दर संघर्षा भाव इन्नै सैहज होई चुके दे हे जे रस्ते चलदे जां सधारण कम्म करदे बी हत्थ-पैर तलवारी लड़ाई आह्ला लेखा आप मुहारे चलदे रौहदे ।

खंड-काव्य दे नियमें मताबक ‘बीर गुलाब’ इक उत्कृष्ट रचना ऐ, जिस च सिक्खें ते डोगरें मझाटै लड़ाई दी इक घटना दा विशद वर्णन होऐ दा ऐ। एह 1809 ई0 दी घटना ऐ जिसलै गुलाब सिंह दी बरेस 15 बरे ही। लाहौर दे महाराजा रणजीत सिंह ने डोगरा राज दी कमजोर सरपरस्ती दा मौका ताड़ियै

सरदार हुकम सिंह दी कमान हेठ फौजां भेजियै त'वी दे पारा जम्मू पर हमला करी दित्ता । उस औखी घड़ी च देसा दी आन बचाने खातर गुलाब सिंह वीर अभिमन्यु दा रूप धारियें मदाने जंग च उतरी आया ते अपनी बहादरी, दलेरी ते जाहो-जलाल कन्नै बैरियें गी मूंह तोड़ जबाव दिता कवि ने इस रचना राहें डोगरे दी सुलझी दी युद्ध नीति ते युद्धकला कौशल सरबन्धी गौरव-गाथा गी भावें दे तीव्र-प्रवाह ते भावें मताबक भाशा दे प्रयोग ते प्रवाह च गुहाड़े दा ऐः-

“डोगरें दे घोड़े दौड़दे जंदे ।
 बैरियें दे ठठ त्रोड़दे जंदे ।
 धन्न उस मारु दी कोख सुहाई ।
 जिस ए जम्मी ऐ जोत सुहाई ।
 डोगरे देसै दा बीर अभिमन्यु,
 दुश्मनें दे सीस खेढदा खि'न्नु
 जिस पासै धूड़ मारदा जंदा,
 बैरियें दे सूढ़ तुआरदा जंदा ।
 बीर-गुलाब दी बक्खरी टोली,
 प्रलय दे दूत खेढदे होली ।

इक्कै घटना पर आधारत होने दे कन्नै -कन्नै इस खंड -काव्य च इक्कै रस दी प्रधानता ऐ ते ओह ऐ वीर रस। घमासान लड़ाई दा सामधाम चित्तर खड़ेरने आहली गड़गज्जें ते टन्कारें आहली कठोर शब्दावली इस रचना दा मुख्ण गुण ऐ। छन्द ते अलंकार बी भाव-पक्ख दा साक्षातकार कराने च बड़े सैहयोगी नः-

“कड़केआ बदल ते त्रुटिट्या धारां,
 त्रुट्टी पेइयां पंज सौ तलवारां ।
 भल्लां ते वरछियां उठदियां लब्भन ।
 सैकड़े बिजलियां त्रुटदियां लब्भन ।
 खन्न-खन्न रवनकार सनोचै,
 मारो-मारो ललकार सनोचै ।
 गड़िंजा गड़ियां गड़ गजदा मारु,
 यद्धु दे वीर तुफानें दे तारु ।
 डोगरे शेर मदानें दे चाढू,
 सवै'सवै पर इ'कला भारु ।”

एह ते सभावक गल्ल ऐ जे मदाने जंग च जित्थै व्हादरी ते पराक्रम च वीर रस दी अनुभूति होंदी ऐ उत्थें बैरियें दी मारकाट ते तबाही दे रुपा च भयानक ते वीभत्स रसें दे द्रिश्श बी कन्नै गै लभदे न। इस खंड काव्य च इ'नें दौनें रसें दा प्रयोग बी बड़े जानकार न।

गिद्दड़ें दा कूकना, फ'वी दा फिंडना, प्रलय दी नागनी ते रण डाकिनी बनियै त'वी दा त्रुट्टी त्रुट्टी पौना, पूतना राक्षी दा उम्बलना, कालका ते चौंडा दा बाल खलारियै लस-लस करदी जीभ कड्डना, दन्द किटकना बगैरा वर्णन वातावरण गी खौफनाक रुप देने च चरमसीमा उप्पर पुजदे न। इ'यां गै वीभत्स रस दा इक नमूना इस चाल्ली ऐ।

हठ निं तजदे सूरमें मान्नी,
खूनो खून होआ त'वी दा पानी।
हत्थ, पैर ज'डा पट्ट ते पिट्ट,
मासै दे लोथड़े रुढ़दे बिच्च।
मुंड़ियां बी कटोन लगी पेइयां,
लाशें पर लाशा परतोन लगी पेइयां।
खौलदे खूनै दे हुट्टे फुहारे,
सजरी भाप ते उट्टे गफारे।

अंलकारें दी बरतून बी काव्य गी चार-चन्न नांदी ऐ जि'यां उत्प्रेक्षा अंलकारें दे उदाहरण इस चाल्ली न।

काले -काले बदल इ'यां बझोंदे न,
अम्बरै पर जि'यां फ्हाड़ परतोदे न।
ठंडा पानी, जि'यां चीरदी आरी।
बैरी सपाही नेई जानदे तारी।
मौती दा दूत हुंकारदा जि'यां।
बासुकी नाग फुंकारदा जि'यां।

अनुप्रास अंलकार

बौढ़ी ऐ चंडका म'ल्ल सुकराल।
छल-छल छुटेआ छल्ल बिकराल।
सन-सन सनकदे बरसदे तीर
पिछड़े पैर नेई परतदे वीर।
खन-खन खनकार सनोचै।

मारो मारो ललकार सनोचै।
गड़िजा –गड़िजा गड़ गजदा मारु,
युद्धे दे वीर तुफानें दे तारु

खुआन

होनहारें नेइयों सिक्खना पौंदा,
कंडें दा मूंह त्रिक्खना होंदा।

इस चाल्ली अस आक्खी सकनेआं जे दीनू भाई पंत होरें जित्थें भाव दी द्रिश्टी कन्नै खूवसूरत भाशा दा इस्तेमाल करियै ते केई चाल्ली दे उदाहरण देइयै वीर गुलाब दी उत्कृष्टा गी बधाया ऐ उत्थें गै खूवसूरत अलकारें रसे ते सुआनें दी बरतून करियै इसगी कला दी द्रिश्टी कन्नै बी सगोसार कीता ऐ ते खण्ड काव्य दे रुपा च इक उत्कृष्ट काव्य-कला दा नमूना पेश कीते दा ऐ जिसगी पढ़ियै हर कोई उंदी कान्नी दी सकत गी मन्नने ताई मजबूर होई जंदा ऐ।

9.3.2 गुलाब सिंह दा चरित्र-चित्रण वीर-गुलाब दे संदर्भ च।

1809 ई0 च सिक्खें डोगरें मझाटै लड़ाई दी जिस धटना दा वर्णन इस काव्य च होए दा ऐ उसलै गुलाब सिंह दी बरेस 15 बरे ही। लाहौर दे महाराजा रणजीत सिंह ने डोगरा राज दी कमजोर सरपरस्ती दा मौका ताड़ियै सरदार हुक्म सिंह दी कमान हेठ फौजां भेजियै त'वी दे पारा जम्मू पर हमला करी दिता। उस ओखी घड़ी च देसा दी आन बचाने खातर गुलाब सिंह वीर अभिमन्यु दा रुप धारियै मदाने जंग च उतरी आया ते अपनी बहादरी, दलेरी ते जाहो-जलाल कन्नै बैरियें गी मूंह तोड़ जवाब दिता। पंत होरें इस काव्य च गुलाब सिंह हुंदी सुलझी दी युद्ध नीति ते युद्धकला कौशल सरबन्धी गौरव गाथा गी बड़े सफल ढंगा कन्नै चित्रें दा ऐ। पंत होरें गुलाब सिंह गी बड़ी नाटकीयता कन्नै प्रस्तुत कीते दा ऐ। पैहलें उंदी छड़ी इक झलक दस्सी गेदी ऐ ते फही उसदी रोबदाबै आली शख्सीयत ते ठाठदार लाबे दा ते लड़ाई दे मदानै च नुहाड़ी शानदार कारकरदगी दा बड़े बस्तारा कन्नै वर्णन कीते दा ऐ।

काव्य च गुलाब सिंह दी दुई झलक दुऐ खण्ड च मिलदी ऐ जिस च उंदे राजपूती जोश दा ते उंदी लौहकी उम्र दा वर्णन मिलदा ऐ।

“उमर दिक्खों कूल पंदरा साल,
चेहरे उप्पर राजपूती जलाल।
लाडें-लाडें सभै आखदे साहब,
बनी आया अज्ज सिंह गुलाब।

होनहारें नेइयों सिक्खना पौंदा,
कडें दा मूंह त्रिक्खना होंदा।”

चोथै खंड च गुलाब सिंह हुंदी रोबदाबै आहली शख्सीयत ते ठाठदार लाबे दा जिकर ऐ जिस च उंदा रुप छलैपा इस चाल्ली उग्घड़े दा ऐ जे उसदी झाल झल्लना बी मुश्किल ऐ।

“चैड़ी छाती पिंझा बट्टे दा दोहरा,
उच्चा माथा रंग जिन्दू दा गोरा।
चुस्त घटन्ना ते चानना जोड़ा,
कालियां पट्टियां रेशमी डोरा।
लक्क कमरबन्द बद्धे दा पक्का,
तिल्लेदार कस्से दा अंगरक्खा।
लाल पग्गा कलगी झलकाऽ,
लाल चेहरा नजर झल्ली नेई जा।
गात्तरा सुच्चा तलवार सुनैहरी,
हत्थें बरछी पिट्ठी ढाल सुआरी।
थोहड़ा बिदके लक्क लिशके कटारी,
दूए हत्थें खिच्ची रास सम्हाली।
मौती अगमें निकली सिर तानी,
दिक्खो लोको राजपूत जवानी।”

छेमे खंड च गुलाब सिंह दा युद्ध दे मदान च वीरता कन्नै लडना ते दुश्मन दे सिरें कन्नै खेढने दा वर्णन इन्ना खुवसूरत ऐ जे पता चलदा ऐ जे ओह युद्ध कौशल च किन्ने निपुन हे ते कवि ने उंनेगी डोगरे देसै दा अभिमन्चू आक्खियै उंदी ब्हादरी बारै जो वर्णन कीते दा ऐ ओह दिक्खदे गै बनदा ऐ।

“डोगरे देसै दा वीर अभिमन्चू,
दुश्मनें दे सीस खेढदा खिन्चू।
जिस पाससै धूड़ मारदा जंदा,
बैरियै दे सूढ तुआरदा जंदा।
बीर गुलाब दी बक्खरी टोली,
प्रलय दे दूत खेढदे होली।
सधें दे नमें जवान न सारे,
समझदे बीर गुलाब दे शारे।”

सतमें खंड च गुलाब सिंह दी कमाल चतराई दे दर्शन होदें न सिक्खें आसेआ तोपखाने दी गोलाबारी करी जिसलै आम जनता ते सपाहियें दे कन्नै कन्नै मिया मोटां होर बी धाबरी जंदे न तां गुलाब सिंह होर बड़ी कुटनिती कन्नै कमान अपने हेठा लेइयै सपाहियें च मुड़ियै उत्साह भरदे न ते अपनी नमीं—नमीं तरकीबें कन्नै दुश्मन गी भलकैरदे न। इस चाल्ली पता चलदा ऐ जे ओह सिर्फ जोश कन्नै गै नेई होश कन्नै बी कम्म लेंदे हे।

“मियां मोंटा आपूं गे घबराई ।
 चुप्प भौचक्क होई गे सपाही।
 कड़कदा बोल्लेआ डोगरा ओह शेर।
 त्रुटटी पवों योद्वेओं । लाओं मत देर।
 घोड़ —सवारो तुस घोड़ें गी छोड़ो।
 बैरी दियां रक्खेआ—पंगतां त्रोड़ो।
 आपू गुलाब ने थ'म्मी कमान।
 वीरें बिच्च पेईं गेई बक्खरी जान।”

अठमें खंड च बी उं'दी कुशल युद्ध रणनिती दे दर्शन हुदें न जे ओह कि'यां केई चाल्ली दियां तरकीबा लड़ाइयै अपने सपाहियें गी दुक्ख दिंदे हे ते उं'दे सपाही कि'यां उं'दियां नितीयां मन्नियै सफल होदे हे।

“तुन्द करी रक्खना सब तलवारां।
 सीटियां बजदे मारेओ छालां।
 दस—बीह आदमी खब्बें बक्खी जाओ।
 ढोल बजाओ ते दब्बी करलाओ।
 सुनेआ हुकम ते उठी गे सारे।
 अपने कम्में ओह जुटी पे सारे।”

नौमें खंड च बी गुलाब सिंह हुंदी गजब दी फुर्ती ते तौले थमां तौले रणनिती गी बदलने दी काबलियत लभदी ऐ जिस च ओह तबी दे पानी गी ढक्कियै ते फही उस ब'न्न गी त्रोड़िये कि'यां दुश्मन दा माली ते जानी नुक्सान करदे न ते अपनी विजय पताका फरहादें न।

“डोगरे शेरा दी दिक्खी छताब।
 जिथें दिक्खो उत्थें वीर गुलाब ।
 ठंडा पानी, जि'यां चीरदी आरी।
 बैरी सपाही नेईं जानदे तारी।

निकले जो कोई बचे-बचाए।
अट्ट सौ सूरमें कैदी बनाए।
लछमन जती आई जम्मेआ पक्क।
घर-घर छाया गुलाब दा जस्स।”

इस काव्य च पंत होरें जिस चाल्ली कन्नै गुलाब सिंह हुंदी ब्हादरी सुरबीरता ते चतराई दे दर्शन कराए दे न ओह सराहने जोग ऐ। शायद गै कुहरै होर गुलाब सिंह हुदें चरित्र गी इस चाल्ली कन्नै उभारेआ गेआ ऐ।

9.4 सारांश

इस पाठ गी पढिये विद्यार्थियदें गी दीनूभाई पंत हुंदी रचना 'वीर गुलाब' खण्ड काव्य रचना बारे सरोखड़ जानकारी हासल होई सकगां इस पाठ च विद्यार्थियदें गी बीर गुलाब रचना दा एह पता लगी सकग जे एह कदूं छपेआ ते एह किस विशे डोगरी दा पैहल खण्ड काव्य ऐ। इस च सिक्खें ते डोगरे मझारै होई दी इक दिनों दी लड़ाई दा वर्णन ऐ। इसदे लावा डोगरा जोआनें दा देसा दी रख्या लाई बाहर निकलना ते गुलाब सिंह दा सामने औने दा दृश्य ऐ। इस चाल्ली इस काव्य रचना गी नौं भागें च बंडआ गेदा ऐ।

9.5 कठिन शब्द

- | | | |
|------------|---------------|-------------|
| 1) मझाटै | 2) अंधीझक्कड़ | 3) गभरू |
| 4) कैम्प | 5) पुरखें | 6) कडकदा |
| 7) कूटनीति | 8) त्रुडेआ | 9) उत्कृष्ट |
| 10) घमासान | 11) ब्हादरी | 12) गिद्दड़ |
| 13) वीभत्स | | |

9.6 हेठ दिते दे सुआलें दा परता देओ।

1. बीर गुलाब दा साहित्यक मुल्यांकन करो।

.....

.....

.....

.....
.....
2. बीर गुलाब दे पैहले, दुऐ ते त्रिये खण्ड च वर्णत घटना दा जिकर करो।

.....
.....
.....
.....
.....
.....
3. खण्डें दे आधार पर बीर गुलाब काव्य दी समीक्षा करो।

9.7 सहायक पुस्तकां

1. डोगरी साहित्य दा इतिहास – जितेन्द्र उधमपूरी
2. साढे साहित्यकार भाग –1 वीणा गुप्ता
3. दीनू भाई पंत दा कविता साहित्य-वीणा गुप्ता

.....0.....

M.A. DOGRI

Course No. 102

Unit - II

Semester - I

Lesson : 10

Epic Definition, Features, Origins & Development

- 10.0 रुपरेखा
- 10.1 उद्देश्य
- 10.2 पाठ-परिचे
- 10.3 पाठ-प्रक्रिया
- 10.4 सारांश
- 10.5 कठिन शब्द
- 10.6 अभ्यास आस्तै सोआल
- 10.7 सहायक पुस्तकां
- 10.1 उद्देश्य

इस यूनिट दे पाठें गी पढ़ने परैन्त विद्यार्थियें गी महाकाव्य केह ऐ उसदे लक्षणें, तत्वेँ ते डोगरी महाकाव्य दे उद्भव ते विकास दी विस्तारपूर्वक जानकारी थहोई सकग। जिस कन्ने विद्यार्थी महाकाव्य दी परिभाशा, लक्षणें तत्वेँ ते विकास बारै कुसै बी चाल्ली दे सुआलेँ दा उतर देने च समर्थ होडण।

10.2 पाठ परिचे

इस यूनिट च त्रै पाठ न। पैहले पाठ च महाकाव्य दी विस्तारपूर्वक परिभाशा, भेद ते विशेषताएं दी जानकारी ऐ दुऐ पाठ च महाकाव्यें दे लक्षणें ते तत्वेँ दी विस्तृत जानकारी ऐ ते त्रियै पाठ च डोगरी महाकाव्य दे उद्भव ते विकास वारै विस्तारपूर्वक जानकारी दिती गेदी ऐ।

10.3 पाठ प्रक्रिया

इस यूनिट के सभनें त्र'ऊं पाठें च:-

- महाकाव्य की परिभाषा विशेषतां ते भेद
- महाकाव्य के लक्षण ते तत्व
- डोगरी महाकाव्य का उद्भव ते विकास

महाकाव्य की परिभाषा, विशेषतां ते भेद

रूपरेखा

→ उद्देश्य

इस पाठ की पढ़ियै विद्यार्थियों की महाकाव्य की परिभाषा, भेदें ते विशेषताएं वारै पता चलग ते विद्यार्थी इस सरबन्धी कुसै बी सुआलै का उतर देने च समर्थ होउन।

→ पाठ- परिचे

इस पाठ च महाकाव्य शब्द का अर्थ ते बक्ख-बक्ख विद्वानें आसेंआ दिती गेदियां महाकाव्य सरबन्धी परिभाषा उसदे भेदें ते विशेषताएं वारै जानकारी दिती गेदी ऐ।

→ पाठ प्रक्रिया

→ महाकाव्य की परिभाषा, विशेषतां ते भेद

- i महाकाव्य की परिभाषा
- ii महाकाव्य की विशेषतां
- iii महाकाव्य के भेद

→ महाकाव्य की परिभाषा

महाकाव्य की समझने ताई असेगी पैहले काव्य की समझना पौग।

• शैल सन्हाके शब्द का इक ऐसा ताल मेल जेहड़ा मनै की छूही-छूही जा, अपना इक टकोहदा थाहर बनाई लै ते पही मन करै जे अस उ'नै बोल्ले की मुड़ी मुड़ियै सुनचै जां पढ़चै ते तृप्ती पही बी नेई होऐ उ'नें भावें की अस काव्य गलाई सकने आं।

रुप ते रचना दे बचार कन्नें संस्कृत दे आयार्थ काव्य दे दो भेद कीते न श्रव्य काव्य ते दृश्य काव्य जिस काव्य दा आनन्द सुनियै जां पढ़ियै थोए उसी श्रव्य काव्य ते जिस साहित्य रचना दा आनन्द दिखियै लेता जा उसगी दृश्य काव्य आखेया जंदा ऐ।

मुख्य तौरा पर श्रव्य काव्य दे त्रै भेद कीते गेदे न:-

1. गद्य
2. पद्य ते
3. चम्पू (मिश्रत)

गद्य च उपन्यास , कहानी, नाटक लेख आदि सब्भै आई जंदे न ते इस्सै चाल्ली पद्य च ओह सब्भै छन्दोबद्ध ते स्वछंद रचना आई जदियां न जिदां कोई सुर, लै, ताल होए ते ओह भावपूर्ण बी होन। 'चम्पू' दे अंतरगत ओह रचना आँदिया न जिन्दे च गद्य ते पद्य दवै होन।

पद्य दे मुख्य त्रै भेद न:-

1. प्रबंध काव्य
2. मुक्तक काव्य ते
3. एकार्थ काव्य

प्रबंध दा अर्थ ऐ विस्तार आहली रचना प्रबंध काव्य च इक लम्बी कथा दा विस्तार हुंदा ऐ। प्रबंध काव्य च छंद इक दुए कन्नै कथानक दी कड़िये च बज्जे रौंहदे न उंदा क्रम अगं पिच्छे नेई कीता जाई सकदा।

प्रबंध काव्य दे बी द'ऊं भेद न

1. महाकाव्य ते
2. खंडकाव्य

'महाकाव्य' शब्द द'ऊं शब्दे दे मेल कन्नै बनें दा ऐ महत् ते काव्य । महत् शब्द दा अर्थ होआ महान। इसकरी महाकाव्य दा अर्थ होआ महान काव्य । इक ऐसा काव्य जेहड़ा अपने आकार च गै नेई बल्के विशे-वस्तु दे स्हाबे बी बड़डा होए। 'महान काव्य' शब्द दा प्रयोग सभनें थमां पैहलें संस्कृत दी वाल्मीकि रामायण आस्तै होआ। महाकाव्य साहित्य दी ऐसी विधा ऐ, जिस च जीवन दा सर्वांग चितरण होए दा होंदा ऐ। इसदी कथावस्तु कुसै खास ते बड़े बड़डे उदेश्य गी लेइयै चलदी ऐ। केइयें चाल्लिये दे संघर्षे चा लंधिये, खीर च किश शाश्वत -मुल्लें दी प्रतिष्ठा करदी ऐ। महाकाव्य आस्तै अंग्रेजी च 'एपिक' शब्द दी बरतून कीती गेदी ऐ। एह शब्द अंग्रेजी दे 'एपोस' थमां बने दा मनेआ जंदा ऐ 'एपोस' दा अर्थ ऐ 'शब्द' समें दे कन्नै अर्थादेश होई जाने पर एह 'गीत' दे अर्थ च बरतोन लगी पेआ। बाद च इसी 'वीर काव्य' आस्तै रुढ़ मन्नी लैता गेआ।

आधुनिक युगै च 'महाकाव्य' जिस अर्थ च बरतोआ करदा ऐ, ओह नां सिर्फ वीर गाथा ऐ ते नां गै कलात्मक काव्य। बल्के उस च मनुक्खी जीवन ते संस्कृति दा ऐसा मेल ऐ जे मते सारे विद्वानें ते इत्थूं तगर आक्खी दिते दा ऐ " जो यहां नहीं है, वह कहीं नहीं है। " अर्थात् महाकाव्य सफलता दा गै नेई सामूहिकता दा महागीत ऐ।

बक्ख -बक्ख विद्वानें आसेआं दित्ती गेदियां महाकाव्य दियां परिभाशां इस चाल्ली न।

भारती मत अनुसार

संस्कृत दे केई आचार्य अपने लक्षण-ग्रंथें च महाकाव्य दे सरुप दा विचरन कीते दा ऐ । सभनें शा पैहलें भामह दे 'काव्यालंकार' च महाकाव्य दा विवेचन होए दा मिलदा ऐ। उं'दा मन्नना ऐ जे महाकाव्य सर्गें च बज्जी दी कुसै महापुरश जां श्रेण्ट व्यक्ति दे जीवन उपर अधारत ग्राई शब्दें थमां रैहत् अलंकारक शब्द-प्रयोग आहली, कुसै युद्ध विजय वर्णन आहली रचना ऐ। आचार्य दण्डी होरें बी 'काव्यदर्श' च महाकाव्य दा विस्तृत विवेचन कीते दा ऐ। उं'दे अनुसार महाकाव्य ऐसी रचना ऐ जेहड़ी सर्गें च बज्जी , मंगलाचरण कन्नै शुरु होने आहली, चतुर्वर्ग धर्म अर्थ, काम, मोक्ष कुसै इक दी प्राप्ति दे लक्ष्य आहली ते जेहदी कथावस्तु सुसंगठत होऐ।

आचार्य विश्वनाथ होर अपने प्रसिद्ध ग्रंथ " साहित्य-दर्पण" च दण्डी हुन्दी परिभाशा गी गै विस्तार दिंदे न। ओह महाकाव्य दे बाहरलें तत्वें उप्पर गै जोर पादे न। उं'दे अनुसार इसदा नायक उच्च कुलै दा जां देवता होना चाहिदा ते इसदे अट्ट शामते सर्ग होने चाहिदे न।

पश्चमी मत

पश्चम च महाकाव्य दे सरुप बारै सभनें शा पैहलें अरस्तू ने अपने ग्रंथें 'पोइटिक्स च अपने विचार प्रस्तुत कीते। उं'दे अनुसार महाकाव्य इक धोषनात्मक काव्य ऐ जिसदा कथानक बड्डा ते नाटकी शिल्प-विधान दे अनुसार होना चाहिदा इस च नां-मुमकन घटनाएं गी बी मुमकन बनाइयै पेश कीता जाई सकदा ऐ। महाकाव्य च महान चरित्र दा चित्रें होए दा होना चाहिदा ऐ । महाकाव्य च जीवन दे समूलचे कार-ब्यहार दा, मौके ते प्रसंग दे मताबक वर्णन होना चाहिदा ऐ। महाकाव्य दी भाशा सरल ते भावें दे अनुकूल होनी चाहिदी पर जित्थै बी गति मंद होन लगी पवै, उत्थै अलंकारक भाशा दा प्रयोग बी करी लैना चाहिदा ऐ। महाकाव्य च शुरु कोला खीर तगर इक गै छन्द (षटपदी छन्द) ते इक्कै रस 'वीर-रस' बरतोए दा होना चाहिदा।

डब्ल्यू पी. केर नां दे पश्चमी विद्वान अनुसार 'महाकाव्य च जीवन दे सभनें रुपें दा चित्रण होंदा ऐ ते उसदे चरित्रें दी योजना अपने-आप च पूर्ण ते स्पष्ट होदी ऐ। महाकाव्य दी सफलता इस उप्पर निर्भर

करदी ऐ जे उसदा कवि जीवन दे विस्तृत चित्र गी किन्नी कुशलता कन्नै चित्रत करदा ऐ, इक होर पश्चमी अलोचक एबर क्रोम्बी हुन्दा मन्नना ऐ जे 'सिर्फ आकार बड़डा होई जाने कन्नै गै कोई काव्य रचना महाकाव्य नेई बनी जंदी । उस च किश होर विशेषतां बी होनियां गै चाहिदियां न। उसदी शैली ऐसी होनी चाहिदी ऐ जिस च कवि दी कल्पना, उसदा जीवन-दर्शन, उसदी विचारधारा ते इ'नें सभनें दी अभिव्यक्ति सहजता कन्नै होई दी होऐ। उसदा उद्देश बी महान होऐ, जेहड़ा महाकाव्य दी गति गी बनाई रक्खे।

सी.एम. बाबरा नां दे इक अंग्रेजी विज्ञान ने महाकाव्य दी परिभाषा प्रस्तुत करदे होई गलाए दा ऐ:-

“महाकाव्य बड़डे आकार आह्ला कथात्मक काव्य-रूप ऐ, जिस च महत्वपूर्ण घटनाएं दा वर्णन होंदा ऐ, जिस च किश चरित्रें दे क्रियाशील ते दलेरी भरोचे जीवन दी कथा होंदी ऐ। उसी पढ़ने परैन्त, असैं गी इक खास चाल्ली दा नंद मिलदा ऐ ते साढ़े अन्दर माहनू दी म्हता, गौरव ते उपलब्धियें दे प्रति दृढ़ आस्था पैदा होंदी ऐ।

वाल्टेयर ने महाकाव्य दी परिभाषा च उस दियें अन्दरुनी 'खूवियें उप्पर जोर पाए दा ऐ। उं'दा मन्नना ऐ जे महाकाव्य दी विशेषताएं गी संकीर्ण शास्त्री लक्षणें च नेई बन्नेआ जाई सकदा । लोकें दी स्वीकृति गै कुसै रचना गी महाकाव्य बनाई सकदी ऐ।

मैकलीन डिकसन होर महाकाव्य दे सरुप दा विवेचन करदे होई लिखदे न “महाकाव्य कुसै बी युग-विशेश दी लोड़ ते देन होंदी ऐ। महाकाव्य दा इक निश्चत सरुप होंदा ऐ। उसी संकीर्ण लक्षणें च ब'न्नना ठीक नेई ऐ। ” महाकाव्य च नायक दे म्हत्तव गी स्वीकारदे होई ओह लिखदे न जे “ महाकाव्य दा नायक जाति- विशेष दा नुमांयदा होंदा ऐ। महाकाव्य च उसदी जित जरुर दस्सी गेदी होनी चाहिदी की जे उसदी जित समूलची जाति -विशेश दी जित मन्नी जंदी ऐ।”

खण्ड काव्य

साहित्यदर्पणकार आचार्य विश्वनाथ मताबक काव्य (महाकाव्य) दे इक्कै ऐंश दा पालन करने आहली वर्णनात्मक रचना खण्डकाव्य ऐ। इस दी अपने थाहर बक्खरी म्हता ऐ। इसदी कथावस्तु दा बी आदि मध्य ते अन्त होंदा ऐ। महाकाव्य आह्ला लेखा एहदे च सम्पूर्णता जां व्यापकता नेई होंदी। एह जीवन दे कुसै इक पैहलू गी लेइयै चलदा ऐ। एहदे च इक्कै रस होंदा ते इक्कै घटना दी प्रधानता होंदी ऐ। पर एह कहानी एकांकी आह्ला लेखा अपने-आपै च पूर्ण होंदा ऐ। घटनाएं दा सिलसला , कथानक दी गति ते पात्रें दा विकास खंड काव्य च बी बरावर होंदा ऐ। एहदा विशे बी होई सकदा ऐ पर पात्रें दी गिनती मती नेई होई सकदी। संस्कृत विद्वान आचार्य विश्वनाथ होरें खंड-काव्य गी 'इक देशानुसारी' आक्खें दा ऐ। खण्डकाव्य दा प्रबंध काव्य दे साहित्य च अपना विशेष थाहर ऐ।

ii) **विशेशतां :-** इ'नें भारती आचार्य दी परिभाशाएं उप्पर विचार करने परैन्त निश्कर्श दे तौरा पर आक्खेआ जाई सकदा ऐ जे महाकाव्य दियां किश विशेशतां ऐसियां न जि'दे उप्पर सब्भै इक मत न। ओह विशेशतां इस चाल्ली नः

1. महाकाव्य दा नायक देवता जां उच्च कुलै च पैदा होए दा गुणवान व्यक्ति होना चाहिदा।
2. इसदा कथानक भाएं ऐतिहासक , पौराणिक, काल्पनिक जां मिश्रत होए पर ओह लोकें च पैहलें गै प्रचलत होना चाहिदा।
3. इसदा लक्ष्य चतुर्वर्ग (धर्म, अर्थ काम आदि) चा कुसै इक दी प्राप्ति आहला होना चाहिदा ऐ।
4. इसदी शुरुआत मंगलाचरण कन्नै होई दी होनी चाहिदी।
5. एह सर्गें च बज्जे दा होना चाहिदा ते घट्ट-शा घट्ट अट्ठ सर्ग जरूर होने चाहिदे।
6. इक सर्ग च इक गै छन्द बरतोए दा होना चाहिदा।
7. सर्गें दे आकार च संतुलन होना चाहिदा अर्थात् सब्भै सर्ग आकार। कलेवर च इक जैसे होन। कोई मता बड्डा जां मता लौहका सर्ग नेई होना चाहिदा।
8. इस च शंगार, वीर जां शातं रसै च कोई इक रस प्रधान रूपै च बरतोए दा होना चाहिदा ते बाकी रस उपकारक रसें दे रूपै च बरतोए दे होने चाहिदे।

iii) **महाकाव्य दे भेद**

भारत दियें सभनें भाशाएं च मिलने आहले लगभग सब्भै महाकाव्य 'रामायण' जा 'महाभारत' दी कथाएं उप्पर अधारत गै मिलदे न। 'रामायण' ते 'महाभारत' च बी उ'ऐ कथां आई दियां न। जेहड़ियां इस धरती उप्पर मौखिक रूपै च इ'नें ग्रैथें दी रचना थमां बी पैहलें गै प्रचलत हियां। 'रामायण' 'महाभारत' दे रचनाकारें उ'नें सभनें गी इक ग्रैथ दे रूपै च संकलत कीता। इ'यै कारण हा जे इ'नें महाकाव्यें दा मुंढला रूप वाचन-शैली उप्पर अधारत हा। रामायण च ते गल्ला दा स्पष्ट रूपै च उल्लेख बी कीता गेदा ऐ जे लव ते कुश ने राम कथा दा जनमानस ते राजसभा च वाचन बी कीता हा ।

मौखिक परम्परा कन्नै सरबन्धत होने करी गै इ'नें महाकाव्यें दा आकार लगातार बधदा गेआ ऐ। इक कवि दी लिखत रचना च गै नेई उसदे प्रकाशत रूपै च बी बदलाऽ औंदा रेहा ऐ। इससै करी इनें, दौने (रामायण' ते महाभारत') महाकाव्यें गी 'विकासशील महाकाव्य आक्खेआ गेआ ऐ।

इस चाल्ली महाकाव्य दे मुट्टे तौरा उप्पर दो भेद होई सकदे नः-'

1. कलात्मक महाकाव्य
2. विकासशील महाकाव्य

1. कलात्मक महाकाव्य :- ऐसे महाकाव्य , जिं'दी रचना सार्वजनक वाचन आस्तै नेई होइयै , बल्के कलाकृति दे रूपै च होई दी होऐ । भारत च ऐसे महाकाव्यें दे उद्गम ते प्रेरणा दे रत्रोत भाएं विकासशील महाकाव्य (रामायण ते महाभारत) गै रेह न। पर इंदे मूल रूपै च मता बदलाऽ नेई आया ऐ।

2. विकासशील महाकाव्य:- ऐसे महाकाव्य जिं'दी रचना सार्वजनक वाचन आस्तै होई ते जिंदें मूल रूपै च लगातार बदलाऽ होंदा रेहा। ऐसा महाकाव्य गिनतरी च भाएं बड़ेधट्ट न पर जनमानस च एह मते प्रचलत ते लोकप्रिय रेह न।

इनें भेदें दे अलावा डॉ० नगेन्द्र होरे अपने ग्रंथ 'भारतीय महाकाव्य' च इक होर भेद दी चर्चा बी कीती दी ऐ जिसी उसे रम्याख्यान काव्य गलाए दा ऐ।

10.4 सारांश

इस पाठ गी पढ़िये विद्यार्थियें गी डोगरी दे महाकाव्य दी परिभाषा, भेद ते विशेषता बारै जानकारी हासल होई सकग। इस पाठ च महाकाव्य दी बक्ख-बक्ख विद्वाने द्वारा दिती गेदी परिभाषाएं बारै जानकारी हासल होई सकग। इसदे लाना महाकाव्य ते काव्य बारै बी सरोखड़ जानकारी हासल होग। इस पाठ गी पढ़िये विद्यार्थियें गी महाकाव्य दी परिभाषा दे लावां भेदे ते विशेषताएं बारै सरोखड़ जानकारी हासल होई सकग। इस पाठ च महाकाव्य दियें विशेषताएं बारै दसदे होई एह दस्सने दा जतन कीते दा ऐ जे महाकाव्य दा नायक कोन होई सकदा, महाकाव्य दा रुचानक कनेहा ऐ ऐतिहासिक, परैणिक जां काल्पनिक वगैरा। इसदा शुरुआत मंगलाचरन कन्नै होनी चाहिए।

10.5 कठिन शब्द

- | | |
|-----------|-----------------|
| 1) टकोहदा | 2) थाहर |
| 3) तृप्ती | 4) श्रव्य काव्य |
| 5) रूढ़ | 6) वीर गाथा |

- | | |
|-------------|--------------|
| 7) कुल | 8) पौराणिक |
| 9) ऐतिहासिक | 10) मंगलाचरण |

10.6 अभ्यास आस्तै सोआल

हेठ दित्ते दे सुआलें दा परता देओ।

1. महाकाव्य दे भेदें दी चर्चा करो।

.....

.....

.....

.....

.....

2. महाकाव्य दियां खास विशेषतां केह होई सकदियां न। इस सुआले दा परता देओ।

.....

.....

.....

.....

.....

- 3 बकख –बकख विद्वानें आसैंआ दित्ती दियां महाकाव्य सरबंधी परिभाशा देओ।

.....

.....

.....
.....
.....

10.7 सहायक पुस्तकां

1. डोगरी साहित्य दा इतिहास – जितेन्द्र उधमपुरी
2. डोगरी शोध 2003 – डोगरी डिर्पाटमैण्ट, जम्मू
3. डोगरी शोध 2000 – डोगरी डिर्पाटमैण्ट, जम्मू

.....0.....

M.A. DOGRI

Course No. 102

Unit - IV

Semester - I

Lesson : 11

महाकाव्य दे तत्व

- 11.0 रूपरेखा
- 11.1 उद्देश्य
- 11.2 पाठ-परिचे
- 11.3 पाठक प्रक्रिया
- 11.4 सारांश
- 11.5 कठिन शब्द
- 11.6 अभ्यास आस्तै सोआल
- 11.7 सहायक पुस्तकां
- 11.1 उद्देश्य

इस पाठ गी पढिये विधार्थिये गी महाकाव्य दे तत्वे बारे पता चलग ते विधाथीर्ये इस कन्ने सरबंधत कुसै बी चाल्ली दे सुआलै दा उत्तर देने च समर्थ होडन।

11.2 पाठ-परिचे

इस पाठ च महाकाव्य दे तत्वे बारे विस्तारपूर्वक जानकारी दिती गेदी ऐ जिस कन्ने महाकाव्य दे स्हेई सरुप कन्ने विद्यार्थी परिचित होडन।

11.3 पाठ प्रक्रिया

महाकाव्य दे तत्व

महाकाव्य दे तत्व

1. प्रबन्धकाव्य दी महाकाव्य विधा पर सभनें शा पैहले भामह ने बवेचन कीता हा। उं'दे मताबक महाकाव्य दी कथ इन्नी लम्मी होनी चाहिदी ऐ जे उसदी बंड सर्गे (ध्याये) च कीती जाई सकै।
2. महाकाव्य दी कथावस्तु इतिहास पुराण प्रसिद्ध महान काव्य होनी चाहिदी ऐ।
3. महाकाव्य दा मुख पात्र कुलीन घरानें दा मन्ने-तरमन्ने दा माहनू होना चाहिदा ऐ।
4. महाकाव्य दी भाशा आम फैहम नेई होनी चाहिदी । अर्थात शब्द ते अर्थ दवें आम लुकाई दे स्तर थमां उचरे स्तर दे होने लोड़दे।
5. नायक दी उन्नति दा, दूत भेजने दा, सलाह सूतर कीते जाने दा इस च खासा वर्णन होना चाहिदा ऐ।

साहित्यदर्पणकार आचार्य विश्वनाथ होरें महाकाव्य दी होर मती खोह्लियै व्याख्या कीती ते गलाया जे महाकाव्य सर्गे च बज्झी दी रचना होंदी ऐ (सर्गबन्धी महाकाव्यम्-साहित्यदर्पण परिच्छेद) जिस च अट्ट थमां घट्ट सर्ग नेई होन ते खीर च औने आहले सर्गे दी कथै दी सूचना बी थहोई सकै।

6. कथावस्तु इतिहास पर आधारत होऐ।
7. नायक गुणी, कुलीन, ब्हादर-सूरमा होऐ।
8. शंगार वीर ते शान्त इ'नें त्र'ऊं चा कोई नां इक रस प्रधान रुप च बरतोआ दा होऐ।
9. उद्देश्य धर्म, अर्थ, काम मोक्ष इ'नें च'ऊं चा कोई इक होऐ।
10. वस्तु वर्णन, दुष्टें दी निन्देआ, भंडी, भलेमानसें दी प्रशँसा बड़ेआई दे कन्नै-कन्नै महाकाव्य च सं'ज, भ्याग दिन-रात, वन, समुन्द्र आदि दा वर्णन बी होना लोड़चदा ऐ।

पच्छमी मत दे अनुसार महाकाव्य दे तत्व इस चाल्ली न।

1. एह बड्डे क्लेवर दा विवरण -प्रधान काव्य होंदा ऐ।

2. व्यक्ति दी बजाए जातीय भाव ज्यादा प्रधान होंदे ते कोई जातीय संघर्ष होंदा।
3. विषय लोकप्रिय ते परम्परा कन्ने प्रतिष्ठत होंदा।
4. इसदे पात्र शुरवीर होंदे ते देवतें दे साथी होंदे। उं'दे कम्मं गी तोड़ चाढ़ने च प्रकृति ते देवते दा हत्थ होंदा।
5. नायक दे कन्ने सारी कथा इक सूतर च ब'ज्जी दी रौंहदी।
6. शैली च विशालपन ते उच्चता होंदी।
7. इक गै छन्द दा प्रयोग हुंदा।

11.4 सारांश

इस पाठ गी पढ़ियै विदार्थियें गी डोगरी महाकाव्य दे तत्वे बारै सबूरी जानकारी हासल होई सकग। तत्व गै न जेहड़े कुसे बी रचना गी बन्ने दा कम्म करदे न। डोगरी दी बाकी विदाएं आह्ला लेखा जि'या कहानी, उपन्यास नाटक बगैरा दे छे तत्व मन्ने गेदे न। हस्सै चाल्ली महाकाव्य गी तत्वे च बन्नियै पूरा कीता गेदा ऐ।

11.5 कठिन शब्द

- | | |
|------------|-----------------|
| 1) सरबंधत | 2) सर्गे |
| 3) आम-फैहम | 4) नायक |
| 5) सूतर | 6) साहित्यदर्पण |
| 7) कुलनि | 8) क्लेवर |

11.6 अभ्यास आस्तै सोआल

- 1) महाकाव्य दी परिभाशा लिखो।

.....

.....

.....

.....
.....
2) महाकाव्य दे तत्वेँ उप्पर लोऽ पाओ
.....
.....
.....
.....
.....

11.7 सहायक पुस्तकां

- 1) डोगरी साहित्य दा इतिहास – जितेन्द्र उधमपुरी
- 2) डोगरी शोध 2003 – डोगरी डिर्पाटमैट, जम्मू
- 3) डोगरी शोध 2000 – डोगरी डिर्पाटमैट, जम्मू

.....0.....

M.A. DOGRI

Course No. 102

Unit - V

Semester - I

Lesson : 12

डोगरी महाकाव्य दा उद्भव ते विकास

- 12.0 रूपरेखा
- 12.1 उद्देश्य
- 12.2 पाठ परिचे
- 12.3 पाठ प्रक्रिया
- 12.4 सारांश
- 12.5 कठिन शब्द
- 12.6 अभ्यास आस्तै सोआल
- 12.7 सहायक पुस्तकां
- 12.1 उद्देश्य

इस पाठ गी पढियै विद्यार्थिये गी डोगरी महाकाव्य दी सिलसलेवार विकास यात्रा बारै जानकारी हासल होग ते हुनै तगर रचे गेदे डोगरी महाकाव्य दे विशे दे बारै च बी डोगरी च रचे गेदे महाकाव्ये दे बारै च पुच्छे गेदे कुसै बी सुआले दा परता देने च ओह समर्थ होउन।

12.2 पाठ –परिचे

इस पाठ च डोगरी महाकाव्य दी विकास यात्रा दे कन्ने-कन्ने डोगरी महाकाव्य अज्ज किस मुकाम उप्पर खड़ोते दा ऐ उस बारै विस्तारपूर्वक जानकारी हासल होग।

12.3 पाठ –प्रक्रिया

- डोगरी महाकाव्य दा उद्भव ते विकास
- डोगरी महाकाव्य दा उद्भव
- डोगरी महाकाव्य दा विकास
- डोगरी महाकाव्य दा उद्भव

डोगरी महाकाव्य हिन्दी महाकाव्य शा प्रभावत होइयै लखोआ। हिन्दी च बक्खरे – बक्खरें काल च बक्खरे –बक्खरे काव्य लखोए। इन्दे च वीर-गाथा काल दे महाकवि चन्द्र वरदाई ते उं'दे पुत्तर जल्हन दी कृति 'पथ्वीराज रासों ' ते ' आल्हा खंड ' प्रधान महाकाव्य न। भक्तिकाल च जेहके महाकाव्य लखोए उं'दे च मलिक मुहम्मद जायसी दा 'पदमावत' गोस्वामी तुलसीदास जी दा 'रामचरित मानस' केशवचन्द्र दा 'रामचन्द्रिका' मुख महाकाव्य न। इत्थें एह गल्ल आखनी बड़ी जरुरी ऐ जित्थें 'पदमावत' ते 'रामचरित मानस' बिच इक स्वतः चलने आला काव्य प्रवाह ऐ, उत्थें 'रामचन्द्रिका ' च छन्दें ते अलंकारें दी पाण्डित्यपूर्ण बरतोन काव्य गी क्लिष्ट करदी ऐ ते इस्सै करी आलोचक केशव जी गी क्लिष्ट काव्य दा शनि बी आखदे न। पर केशव जी दा किश अपना गै स्हाब ऐ ते ओ अलंकार सम्प्रदाय दे अनुयाई होने करी गै एह गल्ल आखदे न- 'भूषण बिन न राजई कविता , वनिता मित्त रीतिकाल विलासपूर्ण काल रेहआ ऐ ते इसकरी कोई ऐसी म्हत्तवपूर्ण रचना नेई जिसदा विशेष थाहर होऐ।

अज्ज दे जुग दे प्रसिद्ध हिन्दी महाकाव्यें च कामायनी , साकेत , ते प्रिय-प्रवास प्रमुख न।

डोगरी भाशा च महाकाव्य लिखने दी मुहार मसां –मसां खुड़ी ऐ शम्भुनाथ शर्मा हुन्दी रामायण इस पासै पैहली गै ही। ओह रामचरित मानस दे भावें ते भाशा दे आधार पर रची दी इक रचना ही। इस करियै अस आक्खी सकने आं जे डोगरी महाकाव्य दा उद्भव हिन्दी महाकाव्य दी परम्परा शा प्रभावत ऐ।

→ डोगरी महाकाव्य दा विकास

डोगरी साहित्य च महाकाव्य लेखन दा श्री गणेश स्व. पं० शम्भुनाथ शर्मा होरें 'रामायण' लिखियै कीता। एह ग्रँथ 1961 ई० च प्रकाशत होआ। सन 1984 ई० च ज्ञान सिंह पगोच होरें 'न्यां' छापियै जितेन्द्र उधमपुरी होरें सन 1985 ई० च 'जित्तो' प्रकाशत करिये ते इस्सै बरें प्रकाश प्रेमी होरें 'बेददन धरती दी' छापिये इस परम्परा गी अगड़ा बधाया ऐ। ज्ञान सिंह पगोच हुंदा 'महात्मा विदुर 2003 ई० च ते श्याम दत पराग हुंदा 'बीर जोराबर सिंह' सन 2009 च छपेआ। हूने तगर डोगरी च इ'यै कुल छे महाकाव्य उपलब्ध होए न।

इ'नें महाकाव्यें दा विस्तृत व्यौरा इस चाल्ली ऐ।

1. **रामायण** : शम्भु नाथ शर्मा हुंदा एह महाकाव्य सन 1961 च छपेआ। एह कवि दी डोगरी साहित्य गी इक महत्त्वपूर्ण देन ऐ ते इसी लिखने च उसी पंज बरें लग्गी गे।

गणेश , सरस्वती ते भगवान राम दी वंदना ने इस काव्य दा शुभारम्भ होंदा ऐ ते एह बालकांड दा गै इक हिस्सा ऐ रामायण दी कथा सतें कांडें च जि'यां बालकांड , अयोध्या कांड, बन कांड किशकन्ध ा कांड, सुन्दर कांड युद्ध कांड ते उतर कांड च बंडोई दी ऐ। काव्य च महाराज दशरथ द्वारा पुत्र प्राप्ति यज्ञ , उपन्यन संस्कार ते त्रौनें भ्राएं दे ब्याह आदि दा चित्रण बड़े विस्तार ते सभावक रूप च होए दा ऐ । भगवान राम दे ब्याह गी दिक्खिये ते इ'यां बडोईदा ऐ जे एह अयोध्या ते जनकपुरी दा ब्याह नेई बल्कि डुग्गर प्रदेश दा ब्याह ऐ। ब्याह, जान्नी चढना, सगन मनाने , सिठनियां , देहल बंडना आदि दे वर्णन च ते असें गी आंचलिकता दी टकोहदी शाप लभदी ऐ। कवि दी समर्थता ते कुशलता दा परिचय मिलदा ऐ। कवि दा उद्देश्य इस महान ग्रंथ दी आत्मा गी मातृ-भाशा राहें डुग्गर दे जन जीवन तक पजाना ऐ। ते ओह अपने इस उद्देश्य च पूरी चाल्ली सफल होंदा ऐ।

कवि गी अपने नायक भगवान राम दे प्रति पूरी आस्था ते श्रद्धा ऐ। ओह उं'दे ताई पूरी चाल्ली समर्पत ऐ। उसने कुदरै बी उं'दे चरित्र पर आंच नेई औन दिती। शायद इयै कारण हा जे उसने अपने इस ग्रन्थ च 'सीता -त्याग' दे प्रसंग गी कोई थाहर नेई दिता। रचना च सूखम ते मर्मस्पर्शी भावनाएं दा चित्रण बड़ा सजीव ते कलात्मक ढंगे ने होए दा ऐ। भाशा बड़ी जानदार ऐ। थाहर-थाहर मुहाबरे, खुआनें, रूपकें ते अलकारें दा सुन्दर प्रयोग होए दा ऐ। किश शब्द चित्र इन्ने सुन्दर ते सजीव न जे दृश्य साम-धाम अक्खीं अगें आई खडोदें न। मसाल आस्तै महाराजा दशरथ दे खीरी दिनें दे वर्णन ते भरत मिलाप दे इस दृश्य गी गै दिक्खो:-

प्राण कण्ठ आए राजे दे अंग पेई गे ढिल्ले
ढौन लगा ज्यूड़े दा तम्बू पुट्टन होए किल्ले।
इक्कै सौले, इक्कै सोहने इक्कै हिरख अगाध
सौन बरै दी दौन्ने पासै गोते खा मरजादा।

2. **न्यां** :- सन 1984 च ज्ञान सिंह पगोच हुंदी डुग्गर दे प्रसिद्ध शहीद करसान बावा जित्तो दे जीवन पर आधारत जीवन-गाथा 'न्यां' प्रकाशत होई । पगोच हुंदी डोगरी च छपने आहली एह पैहली साहित्यक रचना ऐ। एह गाथा सतें सर्गे च बडोई दी ऐ ते इसदा आधार बावा जित्तो दी कारक ऐ। पर कारक दे लोक-कवि दी गैहराई , ओहदे चिंतन, अपार वेदना, भाशा-प्रवाह ते कला-पक्ख दे मकाबले च एह ठैहरदी टिकदी नेई। पर फही बी इस रचना च महाकाव्य दे मते सारे लक्षण मजूद न जि'यां इस च मंगलाचरण ऐ। इसदा नायक बी डुग्गर दी जनता च लोकप्रिय ऐ ते उसदे पूरे जीवन दी गाथा इस

च वर्णत ऐ। इसदा उददेशय बी मंगलकारी ऐ।

3. जित्तो:- जितेन्द्र उधमपूरी हुंदा महाकाव्य 'जित्तो' डुग्गर दे महा बलिदानी करसान बावा जितमल दे जीवन , परिस्थितियें , संघर्ष ते समाज पर आधारत आधुनिक संदर्भ च रची गेदी इक श्रेष्ठ रचना ऐ। इक उपलब्धी ऐ ते इक इतिहासक दस्तावेज बी ऐ। एह काव्य सन 1985 च छपेआ ते 260 सफें पर आधारत ऐ। जित्तों दा किरदार कुतै बी देवी -देवताए आंगर चमत्कारी नेई दर्शाया गेदा ऐ बल्कि इक आम करसान दे रूप च गै ओह साढ़े सामनै औंदा ऐ ओहदे किरदार गी काल्यनक ते बेमेल सुनी-सुनाई गल्लें ते घटनाएं शा बी मुक्त रक्खेआ गेदा ऐ। जित्तो डुग्गर धरती पर पैह्ला करसान हा जिसने बेन्याई , जुल्म ते सामन्तवादी शक्तियें खलाफ आवाज चुक्की ते संघर्ष कीता। एह इक खुल्ली बगावत ही।

इस महाकाव्य च नौ सर्ग न ते एह करुणा रस प्रधान ऐ। वीर रस वर्णन ते प्रकृति चित्रण बी बड़ी कुशलता कन्ने कीता गेदा ऐ। कवि ने काव्य दा शुभारम्भ डुग्गर बन्दना कन्ने कीते दा ऐ। जित्तो दा कथानक इतिहासक ऐ ते ओह जननायक ऐ। जनता दे हिरदें च ओहदा बास ऐ। कथानक दा विकास क्रमिक ते व्यवस्थित ऐ।

4. बेदन धरती दी :- प्रकाश प्रेमी हुंदा।। सर्गे ते 276 सफें पर आधारत एह महाकाव्य बी सन 1985 च गै प्रकाशत होआ। डोगरी भाशा दे इस महाकाव्य गी अस नायका प्रधान काव्य गलाई सकने आं। नायका दा रूप नारी, धरती ते प्रकृति ऐ ते एह त्रौनें दी इक सजीव , सुन्दर ते मार्मिक कथा ऐ। नारी ते धरती दमै जननियां न। दमैं अथाह बेदन छपैलियै शलैपें गी जन्म दिन्दियां न। दौने दी बेदना सांझी ऐ। इस रचना च पौराणक तत्थें -कत्थें दा समनवय ऐ। आदिकाल शा चलदे आवा करदे नारी दे स्वाभिमान , सत्ता ते ओहदे पर निरन्तर शोशण दी दास्तां गै इस काव्य दा केन्द्र-बिन्दु ऐ।

काव्य दा कथानक मुख तौर पर रामायण पर आधारत ऐ। मते सारे पात्र पौराणक न पर उनें गी आधुनिक सन्दर्भ च दिक्खने दा जतन कीता गेदा ऐ यथार्थ कन्ने जुड़ने दी कोशश कीती गेदी ऐ। राजा राम इक आदर्श , यशस्वी राजा , बीर योधा नायक ते कुशल नीतिज्ञ दे रूप च साढ़े सामनै औंदे न, ना के इक अवतारी रूप च। कवि ने पौराणक घटनाएं ते कथाएं गी अपनी कल्पना ते सिर्जन-शक्ति राहें बड़ी सफलता ने संजोया-परोया ऐ। चरित्र कुतै बी नीरस जां बेजान नेई बझोंदे। उंदा अन्तर्द्वन्द्व सार्थक-सजीव बझोंदा ऐ।

कथानक इक जयाणें बालक दी सृष्टि दी विकास कथा प्रति जिज्ञासा शा रम्भ होंदा ऐ। ते इसदा समाधान इक वयोवृद्धों राहें होंदा ऐ काव्य दा अन्त बी इनें दौ पात्रें कन्ने गै होंदा । दरअसल जिज्ञासा ते बृद्ध समें दे दो प्रतीक न। शैली वर्णनात्मक ऐ।

5. महातमा विदुर :- ज्ञान सिंह पगोच हुंदा महाकाव्य 'महात्मा विदुर' 2003 च प्रकाशत होआ। महाकाव्य दी कथा विश्व प्रसिद्ध महाकाव्य 'महाभारत' दे इक पातर 'महात्मा विदुर' दे आले-दुआले घुमदी ऐ। महात्मा विदुर इक सोहगे -स्यानें माहनू, कुशल कुटनीतिज्ञ, धर्म दा पालन करने आहले धर्मात्मा ते इक महान संत हे, जिनें महाभारत च महाभारत दे धर्म-युद्ध च सच्च दा साथ दित्ता। महाभारत दे धर्म -युद्ध च जिस चाल्ली धर्म दी जित होई उस धर्म दी जित गी हासल करने च महात्मा विदुर दा इक अहम योगदान हा। एह ज्ञान सिंह पगोच हुंदी पैनी सोच दा गै नतीजा ऐ जे उ'नें विदुर दे चरित्र गी खोहलियै पाठकें सामनै रक्खे दा ऐ ते स्हेई-मायने च उ'नें गी महात्मा सरुप प्रस्तुत कीते दा ऐ। महाकाव्य गी पढ़ने परैत पाठकें गी मसूस होदा ऐ जे विदुर सच्चें गै महान आत्मा ही, इस करी पगोच होरें 'विदुर' गी जेहड़ा 'महात्मा' दा खताब दिते दा ऐ। ओह पूरी चाल्ली स्हेई ऐ। नमें सर्ग च बंडोए दे इस महाकाव्य गी 2007 दा साहित्य अकादमी पुरस्कार बी मिली चुके दा ऐ।

6. बीर जोराबर सिंह:- श्याम दत पराग हुंदा महाकाव्य 'बीर जोराबर सिंह' मशहूर जरनैल जोराबर सिंह दी काबलियत ते बहादरी दा नमूना ऐ एह महाकाव्य 2009 च छपेआ। डोगरी धरती अपनी शुरबीरता ते बहादरी करी विश्व प्रसिद्ध ऐ। ते इस धरती दा इतिहास गुआह ऐ जे डोगरें म्हेशां अपनी मातृ-भूमि दी रक्षा आस्तै प्राणें दा बलिदान दित्ता ऐ पर अपनी धरती मां गी आंच तक नेई आन दित्ती। मशहूर डोगरा जरनैल जोराबर होरें बी महाराजा गुलाब सिंह दी सरपरस्ती च केई बहादरी दे कारनामं कीतें जिं'दे च डुग्गर प्रदेश दी सिमाएँ गी लद्दाख थमां गिलगीत ते तीब्बत तोड़ी फैलाने दा जिकर मिलदा ऐ बीर जोराबर सिंह दे बहादरी दे कारनामं गी विस्तारपूर्वक अपने महाकाव्य च पेश करियै पराग होरें उंदी शुरवीरता गी बड़ी खुवसूरती कनै दर्शाए दा ऐ।

अभ्यास

हेठ दिते दे सुआलें दा परता देओ।

1. 'डोगरी महाकाव्य हिन्दी महाकाव्य परम्परा शा प्रभावत ऐ, इस कथन दे हवालें कनै डोगरी महाकाव्य दे उद्भव दा जिकर करो।
2. डोगरी महाकाव्य परम्परा गिनतरी च भामें घट्ट पर साहित्यक तौर पर बेहतर ऐ, सुआलें दा परता डोगरी महाकाव्य दी विकास यात्रा दे संदर्भ च देओ।
3. तुसेंगी डोगरी दा केहड़ा महाकाव्य मता पंसिद ऐ ते की ?

सहायक पुस्तकां

1. डोगरी साहित्य दा इतिहास

जितेन्द्र उधमपुरी

2. डोगरी शोध 2003

डोगरी डिपार्टमेंट जम्मू यूनिवर्सिटी

3. बीहमी सदी दा डोगरी साहित्य तकाजे ते उपलब्धियां डोगरी डिपार्टमैण्ट जम्मू यूनिवर्सिटी

12.4 सारांश

इस पाठ गी पढिये विद्यार्थीयें गी डोगरो च छपे दे हे महाकाव्यें दी विस्तारपूर्वक जानकारी हासल होई सकग। इस पाठ च डोगरी दे छे महाकाव्यें में कथानक बाटै जानकारी हासल होई सकग। डोगरी दे छे महाकाव्य रामायण, न्या, जित्तों, वेदन धरती दी, महात्मा विदुर ते बीर जोराबर सिंह महाकाव्य बारै जानकारी हासल होग। कन्नै गै उदे लेखके ते उंदे छपने दे बारे बारै पूरी जानकारी हासल होई सकग।

12.5 कठिन शब्द

- | | | |
|-------------|-------------|-----------|
| 1) वीर गाथा | 2) भक्तिकाल | 3) मुहार |
| 4) परम्परा | 5) वदना | 6) बझोंदा |
| 7) यज्ञ | 8) श्रदा | 9) आस्था |
| 10) जननायक | 11) वेदन | |

12.6 अभ्यास आस्तै सोआल

1) महाकाव्य दी परिभाशा लिखो।

.....

.....

.....

.....

.....

.....

.....

2) महाकाव्य दे तत्त्वं उप्पर लोऽ पाओ

.....

.....

.....

.....

12.7 सहायक पुस्तकां

- 1) डोगरी साहित्य दा इतिहास – जितेन्द्र उधमपुरी
- 2) डोगरी शोध 2003 – डोगरी डिर्पाटमेंट, जम्मू
- 3) डोगरी शोध 2000 – डोगरी डिर्पाटमेंट, जम्मू

.....0.....